

83659

89879

13

黃潭浦集卷三十六

騷

賽騷凡九章

昭質第一

芳與澤其雜糅兮惟昭質其猶未虧

賽雲漢之昭回兮固散榮以為度望舒讓其脩盈兮又食之以顧兔世猶訾其不純兮余將安所慕哀姬日之閔殷兮不惠諒於同產尼父生而博篤兮世又悲其少賤舉二哲以相傲兮固猥媚之所惡謂高媿之不倫兮故擔播而不下余剖膚以託藥兮洵自濟大馬不敢逸於巢丘兮亦奚取乎鉉之野既三世而皆然兮必余醜之不化咎與譽其相根兮鳴鶴共為晝夜彼扁石之塊然兮固莫爭其汗媿

忍終古第二

懷朕情而不發兮余焉能忍而與此終古

忍與此終古兮道何確而不可忘擣美瑤以療癘兮亦有濟乎厥瘡苟吾軀之已隕兮雖毒痛其亦已矣猶飲息而無害兮冀降割之不再霰既狃此枯草兮雷猶憎夫癩木知愛者之信殷兮何謗者之已酷耕歷山而肆號兮初猶疑其猜中憫四顧而靡逃兮乃寤言其所同凌天地以無畏兮遂表素而體獨循生理之攸歸兮乃然疑而不作

淑郵第三

超氛埃以淑郵兮終不反其故都



何所其無氛埃兮遂淑郵而罔患揣星辰之數擊兮或全搏而大散鬼神之駢爭驅兮故迸星而流電徹至人之扁心兮不可與之程理自三皇而降兮其傳者幾帝窮奇戮而不死兮厥黨騰而爲厲世無有明宰兮儼齒髮之相制貳危之猶有餘尸兮知丕鼓之不衰積不淑以填虛兮諒無有閩界賢者還於自然兮凶能九死而救世何所無氛埃兮寧榮立而靡悔

天式第四

天式縱橫陽離爰死

余不及古之人兮無以玩此天式使軒轅疏附兮世固慕其靜逸蛇鳥爲余先後兮世又伎其不直蒼龍爲余奔走兮彼蚪鯁而不肯尊收禦侮兮彼又黷然而自聘帝不存於厥中兮無以告於司命斗下夷以挹漿兮遂薙草而有柄傷喜樂之無居兮徒怒哀以爲廉貞審太乙之孔孤兮訴九五而無與明譬問烏之雌雄兮而使鳩爲之定涉江海之茫茫兮固不得其正勝

秉鞭第五

伯昌號衰秉鞭作牧

羣小休於犇狼兮固秉鞭之不易以伯昌之神靈兮猶須牧於九載尺箠分於十夫兮固將逸而肆潰求芻蕘於勾芒兮又告余以不戒賜弓矢與斧鉞兮忽化而爲穉穉虎兕立於吾前兮始責余以不退吾固知鼎之將覆兮無與之更載也負鹽車而絕筋兮衆果以驥爲快也

流厥嚴第六

動聞夢生少離散亡何壯武厲能流厥嚴

美勳聞之流嚴兮知垢賤之自回秉淵志之彌專兮雖靡胥盡其亦有豎天道憤於揚越兮牛斗之人善怒亦云柔之制剛兮何億今而踔古哀余生之散離兮世既罔有君余獨罔有父無美子兮愁苦

正始昆第七

篤察天隱孤寡存只魂兮歸來正始昆只

吁嗟權輿莫與承兮有始靡昆孰與正兮瘡痍執準矇瞶爲之操繩兮夷齊行權微箕守經兮嘗舒造矛伯禹脩城兮跛鼈在前驂耳後乘兮糞彼稻梁雜以冰兮揖讓升堂忽縱橫兮亂我豆籩叢青蠅兮雲門皇皇雜以筆兮南轅適貊吾誰與程兮

近禹磨第八

直贏在位近禹磨只

帝始蹈兮日已藏燎譽衣兮焚堯裳秉禹磨兮安所杭從河伯兮尋舊疆餌盟鱸兮膏蕭香構机成羣兮驅陸梁近禹磨兮安得光垂戈兮羿矢雄狐兮九尾蚩尤旗兮何旖旎雜游兮都市擁禹磨安尋理

掌夢第九

巫陽對曰掌夢上帝其命難從

煌煌神宗告我自勝積精者強有覺無兢春容乃聲以俟其定勒二十年佩此心鏡太宗不怡垂幃以思執彼鬼中謂吾已知三九四七蘿圖歷茲嗟我小臣其何能維赫赫太祖告余江渚瓊瑣雲卿竟舍我去余曰不敢朝廷舍臣非臣敢去臣今欲去將安所之天地翰呀岳瀆崩墮人臣視君惟力是視力竭身枯則安所濟嗟我小臣既羸以厖何交於天一祖二宗二十五年語如鐘鏞召彼故老訊茲掌夢咸曰天命告爾曷用

廈屋將顛一筵梁棟傾頽之鳴曷其有控嗟我老臣實爲此來痛言當心雷霆爲開以身許君安逃厥災繫於故官頹仰低回陟降上天將毋此階丁寧命余則安所懷涕泗滂瀾何能不哀亂曰上帝命余何不從兮神明離幽微以通兮齊力已衰負蒼穹兮去將從誰誰適逢兮感我高皇及二宗兮歸死於茲猶禁中兮龍胡耗耗迷遺弓兮招我餘魂射高墉兮

續招魂凡三章

號招第一

號魂兮歸來魂尙歸來號來不當悲往不當嬉魂尙歸來號醜顧則美遠顧則邇君何樂乎離思魂尙歸來號玉苓旣發菟鬚朝歿蜀山之陀顧鏞以搗魂尙歸來號鱗嚙彼潭淵而詹詹猿狖之癡癡喪彼中林魂尙歸來號棄劍比牘澤陽反鵠耿美一人擇不得木魂尙歸來號壑蕙而霰江蘋以風而胡垂老界以蟲蟲魂尙歸來號爾有雁鴻悲不得誤爾有蘭茝紉不得考或行千里再迴而阻魂尙歸來號發羽以繳迅而反執匪甘厥鞋所求未集魂尙歸來號水有泝流俘彼靈鼈彼鳥曷爲三化逾烈夫余不足卹而有女之整覽魂尙歸來號莫邪則飛遣彼盤根使驚驅耕而登彼高臺魂尙歸來號甫生於喬曷困以藜甫登於岡曷墜以谿魂尙歸來號或發爾笱以淩爾後魂尙歸來號有烏必哺銜蟻四顧不念厥巢遺之中路魂尙歸來號環厥箒篋不棄以籜曷以絛塚而捐其肉嗟子雖貧旣時爲谷魂尙歸來號璧則未剖不毀厥鏡明月之育孰斷彼胎魂尙歸來號太陰明明死以獲甦怒不再盈過不一成魂尙歸來號魂不歸來百里節解魂尙歸來號彼鴟之中林亦懷厥好音子而無良不若翔禽魂尙歸來號雖有亂絲一割而理雖有覆盆一發而起魂尙歸來號不以霜枯春而不華以溲塗而焚其車何必樂居居則余家魂尙歸來號彼鶴之巢爲長水石誰

以窺之翺翺鷓鴣魂尙歸來號應龍飛天則不得露覽彼滄溟選而下擊魂尙歸來號如彼青蚨以血塗圓則亦克飛母子遺遺魂尙歸來號亦有飄花而膠厥蒂亦有離髮而以爲鬕曷爲一去渺不予跡魂尙歸來號或揚而蕘或朽而起善不得理以爲帝恥魂尙歸來號憐者受肺讐者受齒魂尙歸來號魂不來歸魄不來光處閭恒幽蛇龍不章魂尙歸來號德不終晦亦不掩罪靈內屏之式嘗於外魂尙歸來號螿蟲之陵迤萌芽以春弊冕不裂以觀後人魂尙歸來號雖有錢鏗不竟厥數或延以時而永於千古魂尙歸來號魂不歸來曷曠以棲魂尙歸來號霜雪遞至暄若擊澤挾以烈風上下去色魂尙歸來號魂不歸來予母予子曷以爲恃魂尙歸來號嗟爾巫堅爲遯厥魂魂兮歸來號

廣招第二

號魂夸曷不歸魂尙歸來號南有燔燻之焦硫磺熬波沸金漫漫其臣回祿雜以長蠻輓載駘驪而燃桑爲關魂尙歸來號東墜天阱驅駭萬雷魍魎獨馬銜相播有神吐談橫數萬里黏人而食連弩不避號又有蛟涎觸之則沒吞蛟之魚只若天關商羊以入三年而化其骨魂尙歸來號北有巨壑連冰爲巖噴雪之鼠牙毛毳氈氍成羣實淪爲鹽豎人之顛播以爲函魂尙歸來號亦有茂林龍蛇所居冥不見天得人若魚魂尙歸來號其西爲陰鼎魔神之府怪獸鬻鬻臨人之戶亦有飛首昏而旁午牛鬼蛇精踴不勝數魑壘之徒束結萬首以餌白虎魂尙歸來號三危之陰其獸爲獼髮如披囊四角而饜又有鷓鴣挾龍而食左營右鷓骨骸狼藉魂尙歸來號閩風之下積爲弱水方壺祖洲素濤嶽嶠雖有神人化爲魑魅魂尙歸來號閩浮所都金石酷烈獺貍爲御而嗑金鐵出舌盤地迴齒若轍羣帝噉隰茹人以血魂尙歸來號魂遺歸來無自罹號天門九層列戟下牙雖無虛勢不得階號其神尙奢金礫火軌邈人以賤舒越萬里魂尙歸來號魂遺

歸來出戶以咫尺若懸水出戶以尺若闕不測過其歸來去無極號下不得鱗上不得翼號中土五嶽峻巖
不治白日而霾劉落深谿魂尚歸來號宅彼百靈則翼而角垣棘畫塹以爲犴獄魂尚歸來號又有孟門太
行委羽白龍具區雷澤九疑居庸皆隕輕折勁摺膝而齊胸魂尚歸來號其外有連臂之帝夜噪崩崖奇稽
穿胸銜箸殘尸乳目臍口操干而嬉語處非人目不敢睨魂尚歸來號嗟魂歸來號假雲爲輿駕以霓虬鼉
霆所驅而廓不得哀御彼涼颺土囊爲響青女削之汨以浮漚魂尚來號蒙汜圓闕豎縱不執上冥以笮踐
履不及魂尚歸來號蟠桃彌千底茲未花櫻杞萼南而翳神麻魂尚歸來號炮鳳之臚不若烹臍削草爲脯
不若飲匏魂尚歸來號雖有霓霞裁不當衣軫鬱結繪雲雷掣之香氣象闕終不可處洞壑汨律而迷寒暑
魂尚歸來號烏髻紫苓元鳥嗽精道以丹薑而調百鑄朱介翠鏤丹膏玉肪馮夷所貢香若杜衡魂尚歸來
號又有綠荷薦以元酒碧菜紫苻以錯素藕享彼黔羸泰壹先後魂尚歸來號曲室蒙茆伏茨清陰善卷披
衣而鳴擘琴雖不克歡亦既當心魂尚歸來號步不踰庭以耘瑤草樹蘭之晦而生火毒雖不萬年亦得所
造魂尚歸來號蕤鳳間溫以臨高山履間轟虛剗危隄安望博獵暇左從連魂尚歸來號交襟悅女直水
激楚不越跬武而喪遠野魂尚歸來無遠舉號列荆藉茵斥搏纖麗飛赤佐白各倡其志魂尚歸來語合望
醉魂尚歸來無離異號余服不改以質古昔遂取近沓樂獲其極敬而不局好無數號魂尚歸來好不若兄
弟號清觴既舉遠就道號利劍潔脩佩縷潔馨合所作號魂尚歸來合不若妻子號嗚嗚以調釋怨喪怪屬
屬之與不態而備約出以入剛外而懿內魂尚歸來號魂尚歸來人生之樂屬而迫人玉虎盤纏以麒麟
集彼日月而揚清塵魂尚歸來號華不可久而營不弭縮氣約體與帝者理魂尚歸來號固名永窮體膏而
安服調以內娛維所擇號時不得避善不得翳履之章章爲來地號魂尚歸來無甘遠棄號聲名如日曷不

利號乃役列星執璇帝庭舞獸翔鸞震霆不驚佐魂以游而百物咸寧魂尚歸來號嗟魂之慮蟪蛄當戶省
彼四方難不可赴妻子之邦以爲樂土魂尚歸來號

禮魂第三

陰以風兮天晦晦將靈車兮不得屆波生兮江中路齒兮山外靈約詞兮曷從再雲披披兮雨下來棘嬰嬰
兮生車衣濡足兮創肌予從靈兮方何期靈之來兮日蓋暮陰不開兮天益下蟲號兮啾啾遲嘈兮不得
語裂余衣兮江上棧渡深兮涉淺望夫君兮不一反靈語兮坳堂兼草生兮雜以蒿翹微風兮聲不揚靈迴
車兮迅前速峻臨淵兮不得度君思余兮粟以飄余思君兮然疑作施者固兮往者輕冰高兮水薄靈來重
兮耿余思汝以哀兮吹參差魚鱗鱗兮鳥下舞琴薛蘿兮茸君所靈不安修步焉離余亦將兮離居山崧崧
兮泉漣漣白石生兮闕余室靈從左兮間余右路差池兮曷同宿衝風至兮百草衰蛟龍藏兮君焉依來長
楸鳴兮顧余馬靈襄襄兮擊余鼓佩不同兮締則均思不一兮各及春桑庚飛兮鳴鴉鳴冰洩洩兮水渙渙
栢檝兮蘭舟與君期兮河中流靈之來兮前颺颺余從駕兮樂文鸞荷生兮蕙穗不及衣兮猶得佩靈中疑
兮邇則阻日皓皓兮間微雨語雖曠兮猶所親室雖曠兮猶匪野折芳草兮拳辛夷思繁兮草稀蔓子生兮
何萋萋猿狖嗥兮日昧昧霜未降兮露先戒陳琴瑟兮離以歌靈不來兮傷如何

續離騷 凡二

離騷上

黃子曰道周少負節不合於俗十年於世動見棄擯窮不能治蔬粢以憂其親每負米數千里外必爲風
雨疾病之所摧折鄉里之人至目爲放浪之士益輕其親羅網綰弋幾於上下旣處濁世僻遠海外不足

有明於是其父悲鬱恠傑負奇以死道周時年二十有三不能自具殯斂又竄於荒岵窮谷之間無戚屬知故之助嗟哉已矣古賢士失時窮止其身辱不逮親以視道周何如者屈原力不及宗哀懷客死故懷沙沈汨以殉其君嗟乎巖穴君不若父道周今日誼不得死乎子止祇不嘗藥伏劍而死世猶罪之聖人有作又何所置我也魯有男子爲風木之哀者直服號哭告於孔氏投河而死此以际湘纍又爲何如者哉仲由曰始吾親在則無以養今羅五鼎而親沒矣嗟乎人子一菽一水不及其時則五鼎千鐘無以贖之况處末世道與時忤又不知鼎報之何如也然道周有母且奉遺骸以畢茲生俯仰之間進退無據於是呼天標心而哭曰古之君子不善於一時則俟之後世不獲報於百年則報之千古道周之辭不足以傳後之君子有閔其志而知其行者亦其惟茲

羌黔雷之寡厥孽須兮置罔竇而不字肆余祖於彼霄兮蟻瑟嚙譎而不吾睨漢漢之數數兮涉自天而來戾言窮彼往牒兮諏子屬之所載亦鼻始彼軒轅兮與元囂而爲昆季夏首浮於南服兮羌有熊之錫氏惟泰占卜之曰後有達人兮曰在於荒瀟歲闕逢以執徐兮有龍躡躡而在野豐隆其跳伏兮屏翳離離而不下怪彼靈之栗泄兮悍不顧其非所遭時宜其已艱兮固沫處之藜寡翹翹糾轉以喪播兮夔躡躡而嚙蹀天吳職磔彼淪波兮挾馬銜以肆跨既警骨之不靈兮又捐胡之不可詐世不知龍之爲彩兮逐蜴蜴以就羈馱塵瀟之穉玲兮信匪龍之所居賽既負此施艾兮曷不戮彼馮夷悼兩螭之香過兮顧流踢以中理帝既憐茲之介兮將錫厥土而有悔操她躡足而謫詆兮詆兮鍾魁舉又附耳與珮曰寧縱之困兮俾徐鼓於後粹端蒙冠於作噩兮予小子乃越水魚而下暨始龍夢彼乾精兮嵌鏤錙其若鏡趨嶠翠而結紺兮旋盤磚於腑內羌誕余以屆期兮闕彼澤之味味槍楫踰盪而靡據兮恐失龍之所在龍既愛余之偃蹇兮

恐予中之不堅乃飾予以美好兮而申之以蘭茝既濁處而飲清兮從余之所先思華渚之遺芬兮恐不與世乎相善緝雙翅之翹翹兮將御茲以四薄羌一舖其九祝兮日晝起而宵作載搯指以比隰兮亦擊腕而較膊思予疑以就立兮若賓帝而享乎鈞樂夫喜余之日邁兮不自歎其歲却也剗彼臆以爲餐兮羌罔省其自瘼也悠爾頑之無知兮錮厥衷而不可授枕鋌鏃以爲嬉兮凶蒼龍之九百口猖獗以致辨兮窮奇困敦雉盟而先後詎撥穀而出臚兮醜浙以爲糗匪緣牆而躑躅兮羌嗜險而利蹈行則與僞謀兮衆故不郵乎予幼喬狂怒余岐嶷兮將噬予之含髮髮四墜以披離兮厥角鬚鬚而鬻懸顧睇余不可噬兮復寘余於所懷彼龍挾雌而請購兮双陽致欺以中猜帝謂余之蹇產兮將放余於二華之崔巍羌悲龍之躡躡兮復然予之塵灰知夫予之爲崇兮顧愛而不忍置也彼奇節之不改兮又曷脫天所累也龍閭闔而俯詔兮遂門驪儼而最奧擢招由之犀犀兮拳伏鼈以爲幟怒百龍之眦予兮德乃反而爲厲鑿九疑之危冠兮龍束其垂條屈雄虹而結珮兮將曷用此蘭蕙彼彩則不彰兮而約渾敦以華綺衆馳蹕以避予兮必窮僂之態服彼貝之帔阨兮曷不觸夫所忌不念彼龍兮遷婆纂堯而喙觝賽予有此脩姱兮憤與戚其交敗繳天吳之罔及兮素虬去不可醢不自諒其靡勝兮徒積戾而中慄悔齟齬之多躓兮將叙處以證聖史魄既利予之盲兮鬼曠又妬余之善聽勦七靈之髣髴兮薛戴匡之司命余忍竄以就頽兮哀彼龍之悽怛歲既化而爲殘兮又孰使爲余正魑魅誑誑而設禱兮髣髴而致祭貢烏喙以爲參兮羌忍余之不就瞑夫帝烈厥戮兮而罰之不寧曷懲彼龍兮以重厥刑柔則蠲而條傷兮醴則瀦而搗餅嚙爲卵而顛巢兮嚙爲孟而覆其型化長穹以爲羅兮臨九遠而設宇肅爽喪翻兮何尙一翎桂中爽而多畫兮固不若乎尊建信彼頑之僂僂兮夫不可以爲予怪芘肢而果被兮復雉冠而鶯嘴帶蜂羽以蟬綏兮躡躡趾而人縱螭則吟而

虎攫兮蟻則踏而蛟起羌鼠嘯而獸搏兮曷不去而自治山都讎而乃親兮竈神喋喋而不見理太陰搔癩以遠避兮顧歎然而自是嘗帝望夫彼聰兮嗟而言之已聾刺被犁於崇麓兮 芳餌於餒腹與脫輻而濟川兮檣櫓駕夫崆峒彼龍輓略以長號兮中憑蹇而有忡顧爾頑之致辭兮又誰以爲余善命攝提而傳余兮護司理以爲薦司理爲余其靡謹兮攝提又導余之罔變羌百整之內集兮感自咎而中戰嗟選者之罔追兮撫將來而展轉亶忠信以爲操兮締條履而四綱劍陸離以就鑠兮翼檣裂而不敢鞠裂長裾之猶縈兮天弧葺葺而就拔棲樛枝以臨淵兮巢折葦而垂濤凜夜處於嵒巖兮虎豹而四嘯上驅以迅雷兮而下錯之以鐔鏃龍既善余之剛律兮又恐余之不克肖外委瀕以綽諾兮中努礪而自劭頤精誠於上游兮而彼 之不余弔執跛鼈於孟門兮騰黃屈跪於泥淖禹鼎斷以鑄兮鐘玉律而爲鈞巢大鵬於蚊睫兮鷓鴣假羽於鵝鴨鷓鴣以擊鷄兮竊脂市而長噉彼鷓鴣之蔽胸兮從桑扈而有不可枵厥腹以上素兮飄颻賦而下墜大德與戾而爲媾兮憐以妬而相破騏驎鑿落以前御兮封豕又御轡而駘左測圭景而以渺兮履虎尾焉用跛積既薄而靡勝兮又曷足以遠禍兪兒駸駸而遠去兮畢方躩踞以下鄰覩妖狐而珮璫兮乃兮誨余以長暨凌陰起於窈窕兮蒺藜蔽帶於中閭魍魎羣逐而索賴兮過獯陽以反唇既竊余之蓄藉又繫撥余之所陳懸賂幣而取酬兮鵠援衣而索恩余與茲其靡辭兮奈彼龍之瘰疹霞幘其上杳兮矯周迴以焉準煇燿離而恐聖兮又鍾搗之使燼石轟空以下壓兮猶恐其不克隕慨彼澤之滂沱兮而涓滴以爲余慈媧房熾嶸於岱華兮蠶剝產而若贖胡兩螭之躬躡兮剔摑摑播而不肯進夫四土之覆汗兮曷余茲而孔瘡陰霞起以氛集兮云彼帝之所都鉞南命於兩闕兮斗北揭而下對敖客嗷嗷其欲噬兮又襲之以矛弧羌巨靈之手撲兮亦屏顏而不得俱擲无實於溼沔兮芻狗登於玉輅錦文犢以秦時兮麒麟折

足而就捕媼母主聖以爲妃兮無鹽嬈而自嫖彼婉孌之佚女兮乃踰時而靡娶亦有命其在天兮又誰審厥故嗟爾整之不極兮詎援茲以爲解曷不脩厥職兮顧儻怳而多怪齒噉誓而設梧兮衷良壘以爲若繩泰山而使直兮不自知其狙獠厥有緯而罔治兮又遑恤乎其外彼龍輓格而流沫兮已憐憐而爲薑謂彼組之皆腥兮憤懣懣而出嘔惡鱗介之愿恣兮執河伯而剖之訾炮醢之莫享兮攝醜祇而咎之夫安酌彼銀漢兮漑巨澤而爲溲羌疇疇之必汚兮昏不念其所貞中忤怔以自數兮慶彼蠶之不克若慈鳥菹翫而蠶處兮厥歎哈喃而反嚼天女嘔軋以哺離兮鵲鷓還思其所託睇飛駭之登巢兮子向戶而負箔攫狙料番於樛陰兮猗猗顧而四攬彼狝生而咆哮兮猶銜齧而反却胡戴弁之頰裏兮日奢語而不可度水狐賽於江涯兮雞溺爲巫而麗鸞鷹乃旅於介邱兮傍司祝以鴟留摑膺厥醜以爲餐兮拱鼠致而余授足楚且以中尼兮將安貢以爲羞忍并舖以就死兮嚙與龍而分謀縱改節其爲服兮惻吾心之彌憂金曷雨於上時兮粟曷降於中嚙 孰白鳥而角馬兮乃底茲而不克究羌彼頑之不惠兮信非帝之所晏雖樂體其莫報兮又力食而曷憚揉折木以爲櫓兮剛金圍而用鍛師王良之策御兮擊杵白而坐歎厥羣植材而焉實兮蓋屋馮礪其用憲舉軒轅以爲車兮又實彼牽於河之嘶轉毛若而靡舉兮固掩睇其曷庸詢古哲之所履兮余又罔知其適從夷探刺於首山兮棄墨胎而不共嚙匪親之遺體兮而捐射之若蓬引夏父之未効兮伯遠墜夫厥宗挾執哉以刺裸兮隘二儀之靡容嗟諸昆之懿德兮而不可以爲軌將偷怙以上征兮用博審其所紀羌茲世之斷斷兮諒不一乎余是百川淨泐而鼎沸兮華嵩離殼而營壘雷震於頽廷兮坑塹生於後趾荊棘差牙而不可餐兮余又安能以久此也告彼龍以言邁兮從招由之所向審厥土之嚙可兮將御茲以方攘秣素虬之赴趨兮八駿戮其跌陽過閭浮之所都兮夕以屆乎都廣齋沉瀝以爲饌兮徵

鳥喙而致餉羌焚輪以內騰兮凌雲霧之沈澗顧窮荒之無人兮中霍繆以自疑鬼血辨於丹丘兮雀網總
縷於八維蟠桃之未華兮羌傲人以調飢涉聚窟之傀譎兮載奉裳而揭之昔厥龍之故居兮又掩袂而避
之筮東南其喪朋兮將西適於崑崙怪野金母之寡處兮載勝雲鬢而未曙胡夫人之罔俾兮鬢易紀而爲
殯愴念茲其中閔兮素虬齧驪而不可反飲弱流之泌潘兮擬龜梁以顯駭聞風鼎器而駛驪兮日費煇以
南出訊彼黨之所尚兮又謾嚙豎縱而靡實託神鷄以爲媒兮青鳥又笑余之求匹始余駕以南翔兮長離
邀余於中路告朱明之所就兮將借余以共住舉雜珮之櫛旋兮神女靈媿而相慕舉流霞於紫觴兮釀扶
桑之垂露羌信美而靡娛兮又孰知余之不敢娶也嗟厥衷之筆策兮挽彼漢而用瀉肆商羊以暨被兮望
白榆而繫馬渺彼龍之所處兮極蒼茫而不得下咨雙鳥之所宮兮巡房心之次舍既次墜窳寧而靡親兮
復敗毀其焉求羨玉體之苾芬兮束神麻而爲芻苢妃愚余之莞結兮佚瓊漿而肆酬炮玉兎於瑤瑤兮臚
丹雘之庶羞鼓娥皇而命韃兮簡狄揚其清眸羌厥情之闕闕兮寬容瞬而易世素女攤其繁音兮又呢嚙
而拭淚夫彼媛之婉婉兮而曷克乎余計胡子喬之輕蹕兮捐厥親而遠逝乃祖覽於四極兮顧歎爾而不
一詣召安期以前導兮將溫履乎大荒怪瓊苗之芊眠兮亦有硤石以爲蕘稂種飛節之九嶷兮鬼目代以
爲漿神瀆灌於堊渠兮洞酌茲而曷嘗貯青鸞之紫膏兮剖羶羊之素肪鍊神堯之翠非兮稷伯禹之餘梁
禹梁既化而爲枳兮翠非變而成蕘羌詹廉而不敢薦兮實龍葬以中懷顧彼龍而中憚兮耿籌繆其若怒
允處茲之匪所兮蹙四聘而蹙蹙異夫函蓋之祚贖兮而靡所等夫餘轍也羌塵積以爲墜兮又焉所而得
潔也策余駕以迴邇兮邇舉登嬰前疑而靡聊夫彼老之罔俟兮霰滲滲其將瀟瀟蕤蕤以自是兮寶希蔭
於長條棄彼土之不居兮乃凝思於赤霄冠珥纓巖以如焚兮復手摩於鉞斧綴鋒芳以爲珮兮復帶鐙之

葆虎懸遠去而罔執兮不計龍之所怒既播塵以屏捍兮又曷禁乎外侮羣九尾之鑄鑄兮儵鋸鋸齒以爲
鯨蛟借鏃於射工兮梟授翼於獬豸中迅迫其若磐兮助爲弦而中抨羌委孩於林薄兮又窺之以兵魍魎
矚泣以窺人兮日又嘯學而將暗舟顛沛於駭波兮乃楚誓而索纜服蹙憤於羊腸兮又搥刺而使颯信俾
龍以得寧兮余雖逞其靡德帝即惡余之莫理兮曷纏彼龍而使不得遯獨劇余之筋骨兮余亦其誰敢怨
羌賦龍使垂兮又則龍之中寸直爾頑之爲祟兮將斥逐而罔遠爽彼龍之啟轉兮而不獲其所依岱宗
奮以梁甫兮乃克駢其崔嵬斫番屑以復齋兮將曷保其嶽崎絲縈繚於懸岸兮環璜瓚而綴之載寶鑄於
詹諸兮凌瑯瑤而決之譬彼偃之不戢兮泉日瀉而終泄井則恩於窪瀆兮誰用食其所溧世未劓夫余咎
兮詎云其不余好昔遠徙於汗漫兮又安審夫嵬喬之不余傲也縱奇節之曰改兮誰呼帝而庸告也 余
屨於滯濺兮又曷計於安蹈也金母辛辛而苦訓兮曰余思其所答世既微蘊以莫知兮將髀髻而罔合夫
子不揚親以爲名兮顧遂逸而於邑羌駢首以就殍兮世又孰知夫爾心呂鼓刀以獲載兮甯叩角而哀吟
伍趨起夫江上兮乃行乞而用潛彼介子之馱僂兮厥與親而俱灰若旌日之靡庸兮亦自棄其匪材胡崇
伯之爲戮兮而禹不以隱處重華友彼木石兮顧念厥宗而式序蟲有蟄而後起兮水有迅而先沮恐促織
之邀翔兮木葉紛而來下夫余茲之所懷兮羌顛唱而靡言路嶸嶸以鬻風兮目瞪睜而內智余初服彼歲
蕤兮結留夷以爲縉中愴肅以上戾兮將以詣於天門屬強禹爲先容兮乃告余以未啓呼雲嬰而使牒兮
顧歎歎而不見禮彼銀漢之濯濯兮又漸帷而不得濟曷不覩夫彼宮兮闈要渺而莫底超欲舉以中尼兮
徒駒鈞而踟躕擗牛女以挹清兮謁彼嶽於陽區厥神鬚鬚以四叱兮顧自寶其所愿目攝余以退避兮余
將從平泰壹允彼古之不可方兮而余曷敢以有寧羌厥醜之罔噉兮又安敢以云醒長沙降而余語兮謂

余堅其所脩爾縱縲以就隕兮世實罹於厥尤不念彼龍之從殆兮將厥罰以誰受也二儀映劄其焉稅兮
羌左右以何求既顛精於罔獲兮益重龍之所羞揆簞茅以言筮兮策安兆而能淑義箕苾苾以余告兮天
火變而初六既出門以靡咎兮胡遯尾而得厲猜但中以再瀆兮乃外革以爲明夷曷登彼天兮而傷於地
云貞不可息兮又明而用晦劑三卜之所尙兮是爰得乎余志鑿白石以爲巖兮爰遯乎窳窳之宮緝揭車
以四綱兮駟鷗交而相通服齒齏以爲飽兮又續之以巨勝龍噉嚼彼菘蕘兮乃攷領以爲順胡厭世之詭
囂兮與麀狸而結信鬼車确轂以哀鳴兮魍魎列而爲陣昔天吳之所鄉兮將更茲而彌創與衆爭於此土
兮衆亦嘗其不亮羌身世之相仇兮料脩名其盡喪既不可以爲子兮又何適乎世用縱帝錫彼璇宇兮亦
匪爾之所娛天磕厥其將裂兮顧策貽其焉驅握筆憊以爲節兮繫蝮蛇以爲繻覲徘徊其忘所兮不計龍
之所虞禍有重而罔更兮僂有過而罔理操蛇說謊以行譖兮鍾魍魎然而坐眇帝不卹余之靡據兮遂挾
龍而遠徙歲疆圉以爲難兮日月值於矛蛇鬻贊跑踣於首山兮虎豹嗥而羣誇巨闕夕以爲湖兮不周陡
折而給飭惡彼頑之不從兮猶瞿然而四擊委子子於中野兮將曷避此飄飄長松摧以爲薪兮恨不一覩
夫白日荻荅發以爲塗兮詎鬼絲之足卹羌曠茲而得贖兮又曷靳乎百身天熾厲而日高兮海汎瀾而日
淪淼然規夫故宮兮夫不知其所臻予信愁其罔顧兮曷金母之不爲慮云茲土之踟躕兮不如捨而遠去
挽飛輿以夸父兮徐吾起而爲助緩則須以千古兮促則不及乎一語湛盧掩馭而赴淵兮貽鉛刀以盤錯
步景駘於天駟兮乃鹽車而駕犢嗟彼生之有適兮胡獨余其靡祿也且多藝而不庸兮考爲醢其得所娥
宛轉於水瀉兮精衛舞於江渚乃彼龍之無子兮又不見其愛女始呼余以若孺兮今乃知其爲豸也蜥蜴
羊羶以羸拉兮顧瞻然其敢視也慶有難而罔俾兮又曷鞠乎此子也珠已溷於溝渠兮乃必碎之爲是也

百靈戮力以下夷兮詎捕龍其未軌也縱一日之有寧兮又胡所而不得死也帝錫余以後因兮不如無毒
之爲美也茫滄漫汗而爲腥兮余又安知其所底也忍風轟以長視兮將以報夫後社也亂曰二儀脂車兮
五嶽爲輻余往挽兮余奈何魂魄就陰兮變鳥爲罔余往留兮余奈何岱華欲頽兮渤澥傾波予往支兮余
奈何亢角爲磐兮機槍爲戈余往敵兮余奈何天壹爲豎兮東皇爲魔余往驅兮余奈何滄海爲田兮石髮
爲我余往採兮余奈何馮夷爲舞兮湘妃爲歌余往廣兮余奈何歿者勳然存者雙蟠余往殉兮余奈何將
來兮如何未來兮如何橫江潭兮思如何

離疚下

黃子曰道周作離疚時甫踰月中緒雜亂百感俱集其比類解辭鬱結遠出不暇刪割以歸於雅而間錯
以憤世之語有非孝子所得言者雖在今日亦不自知其所至也既閱有四月稍審人事乃徵其遺緒罄
其幽曲不敢以辭云

長夜守歲兮明星隱之敦敦虎豹踞關兮徒內戒而不覩乎天門羌馮下以香遠兮又錫乎繩之以寸執胖
蠶之必答兮詎號迅哀以不聞羌下上之異照兮而鉅細之必反夫彼衆之離離兮又曷計乎余身左鉞斧
以右圖兮固宜其不余卹恐好脩之有懲兮願得儻乎一語嘗獲怨於爾靈兮信非龍之故也曷彼醜之就
繩兮獨夫予而改步也世既不得以爲正兮余將捨茲而焉告靈氣理弱以莫勝兮將曷固乎余導中泌洌
以消消兮又安能使余以不怨初服改之不早兮底於今而爲患雖創余以厥艱兮胡彼戮之過殫也羌中
閩而窘步兮颺卷空以晦冥喬木槎而爲灰兮蘆蘆化爲茶荳詎盜龍彼貪狼兮俾踐躡乎司命厥操數之
倒置兮迷不知譴之源賢人留輿以就屏兮余又曷忍乎苟全羌奔走以四觸兮夫誠不知其故宥提孩於

傷宮兮復奪之乳哺出遊釜之鬻賜兮而實之於窘澗豈有愛於予兮而重余以不惠羌余溢以就死兮亦不足暴乎余罪也龍垂髯之率勳兮續續壇楨而不得擊鵬鳥藉藉以彌嘴兮嗚鶴雛之肺肝呼徐吾使贖余兮曷必羈彼雙鸞魯爲鼎而不可抗兮精羽若以徒濤孰則駕而可追兮製余冕乎吾將去地天絕其莫通兮又悵然而失路顧四體之靡實兮揭乎若撥之樹被粘漂於洪濤兮安用載此獲樽君既溷彼滙川兮而洄酌於潢渠羌緬度於所終兮不如反乎其始水則絕地源兮終以塞於泥滓紛怔忡其靡勝兮未及圖夫所悔塵塵碩碩以歧俾兮題肩藉薦而相趨草蕪蕪而榮密兮咸傲予以不如彼庶踰踰而靡情兮乃知夫奇節之有奇禍羌言更以莫及兮事固小而終大始亦彼靈之余恣兮又焉省其不可幼乘余之淑艾兮又飾之以俱表紛飛節之綺纒兮羌不吉之爲兆屈軼生於途隅兮曷任夫世之綦履弱棘負夫豫樟兮斧必尋其枝蟻彼鳥之啞啞兮繳者必怨於其母紛其樂於余禍兮日計余之將壯羌余長之復用兮濊不棄而殊傲亦知夫蕭脂之爲腥兮而艾纒之爲香顧彼性之所嗜兮亦安能驟改於其常責華聊以弭首兮日是吾將釋女繫鸞朋而以翮兮云吾必得爾子靈亦謂匪其故也既使余有此婚質兮亦胡邈不知其準曷呼余以升兮而納之阱指咎由使執則兮日爲余聽極莫含怒以待余兮人有過亦思其得始假余以彼養兮余亦曷其敢求女鷹鷹相失以哀號兮余亦不在獸之野予既思以極兮將告乎其來下謀底茲其罔庸兮亦使尋夫痛之緒縷厥咎之總總兮又不知其信然將上下而求索兮憫乎吾將周流於天路信遠其靡極兮夫孰察余之所至中駢駢其曷寧兮風颺颺余上戾羌吾衷所自裁兮又哈喃以誰告余將高馳其孰引兮惡夫靈氣之數化孰異事而同情兮將以重於余悼余將登於炎洲兮攬魂魄之所棲世既不憫於余生兮余獨往其又何疑齊吾既赴此傾嶽兮恐我龍之不終棄余將東說彼青皇兮而勸勾芒以爲使將攬

彼蒼籙兮故曲跪扶服披履而陳詞願彼人之不諒兮謂與余其匪昔又傲余以震電兮謂余之不足直葬納納其焉屆兮則不見夫靈爽上彼宇之覆覆兮海水下起而湯湯余將下底於幽宮兮价文魚之鱗鱗發游鼈之彫梁兮以考於鮫人余將賂彼六虬兮俾助余而求索乘淪波之薄薄兮夫亦何所獲闕壘閭之激絕兮余將從而下之銀漢隆隆以杳曠兮余將縈而上之紛離離恍其奄忽兮白日亦避而不親中欲絕以被涕兮駕逍遙非余正余將反於故宮兮凝召精神以四馳喟馮心乎不敢視兮辟質中其長飢進不足以有遂兮退又何得以帖處恐失時之不吾矜兮靈將離而遠去余將征夫研山兮嚙白石之盤盤朝發余於留骨兮瞬息稅於壺輻迅余佩之揭揭兮不敢乎少緩近崦岫其彌迫兮日且暮其吾何從路側裂余莫辨兮醜語屢遷而不可通渴飲余彼弱流兮日夜而不得濟羌續殷以相望兮終然棄於輪之外余將極於陰都兮約土伯之鬻鬻下既而不見天兮欲升之無階爾既不省於世之人兮又何足白乎余罪余將駕彼文麟兮下抗以颺翼駢鷄鷄之宛慕兮周覽八垓余乃息紛披離以四去兮各笑予之不量既蒙難其亦已兮又何所而得尙鴻既搏於紫墟兮繳者猶視夫中澤羽既逝彼長波兮猶欲乘而爲翻彼龍源之已降兮又孰概之於天夫予之所懷兮曷邇乎人言孰有求而靡獲兮孰精專而罔格余將登於瑤臺兮望陰陽之所薄察中氣之分兮從升降於左右余將訴彼司命兮爲余語而究之涕浪浪以下被兮信遼廓而難當望已遠則不力兮耿將迴乎故鄉既鞠築其不任矣中但薛兮吾焉捨前闕翳之莫因兮後又孰爲余藉肆蹇產以咋噩兮雖信幅而非禮言如葦以中薰兮關廣嗒乎吾將躋顧疇衆之匪余類兮亦不辨余之非是中有喪其安集兮邈邈不知其何止余將叩彼紫宮兮願一告而少休孰肝腹其異實兮帝錄人以爲仇余將命鷓且爲伴兮繼之以射豹集命於中消兮又匪爾醜之道哀彼輿之連連兮余將遂以至老也余信賤以莫

伸兮亦胡衷之不得報也帝召余以前戒兮曰既往之不可復咎與人而俱逝兮其又將焉度或事與數而相適兮亦不計乎其後爾則累以及親兮又嗷嗷而繁舉羌好脩而賈福兮則誰以市女飲毒者而驚號兮將以速其殞爾固才之爲苗兮猶肆恣而焉騁羌及今以亟反兮爾不知夫禍福之則信彼言之要眇兮余亦安省其極余中之所懷兮終不可乎一釋願一見其罔從兮即重予禍其亦曷顧余將贊彼白茅兮檻瓊華之茂茂沐江離與蘭膏兮吉日乎泰壹將來下揭婉婉而就之兮彼其不余妬紛彼申於帝詞兮將進余以異術曰爾反於無思魂將自壹爲十日寂將反於其室馮馮倉倉乃重之逸重曰奇兮爲帝之所秘百靈亦其好諛兮爾乃不識乎諱忌孰不固而能存兮孰翫而不可見棄夫彼人之爾遠兮又孰奪而去之瓏幽執而墮之兮又孰扼而拒之羌余亦知其然兮願偕存以再爲憶中屏而遇之乎蓋愴夫所思羌彼膺之癘腫兮安能禁其多息維首之中潰兮安能慨然而劃之余匪今其罔變兮羌有所不忍也哀彼路之既窮兮徒行告而滋疹恐靈之反夫故宮兮又皇然而不見余帝閣扇不余望兮反首乎吾將趨天下垂其欲折兮風雨前之颯颯青女凌於余孤兮飛廉迴復而相尼夫靡龍之故兮余乃不知其所恃頽余此中天兮又辱夫余理余亦忍以苟全兮尙以觀夫皇祖莫載世之德兮迄於余而墜之哀人生之忽忽兮露與霜其遞至龜屢瀆則不余筮兮詞信紛其莫從愆內美之猶未化也不如責於其躬金母降以汝謨兮羌亦與余乎同言訊彼蒼舒兮亦謂余其適當帝重華之無子兮故飄然而終逝伯禹種德兮去還復乎帝啓咎由不及爲命兮益故以膺於上服陟克宗彼訓兮乃邵其先德武丁思過兮祀乃不棄於豐腴周室捐彼二仲兮亦厥季之有緒且克事彼鬼神兮武乃用以不死尼父不聖厥德兮今亦知其孰氏蘭芷鬱以綉馨兮芬歷茲猶未改瓊瑤之賡踏兮履險益其不息願自昔而已然兮胡乃今而是謀火及燄而將炤兮夫乃築其重篲

既表首以行馳兮而討之內固譬樹則顛兮猶視衰其枝葉夫余衷之所急兮非脩名之不立也允彼名之爲禍兮余又安省其可也女嬃頰頰以懇告兮曰爾勉圖於其終若行邁以底舍兮厥四驚其曷庸夸父不絜彼力兮終然死而莫殞焉子燦其肢體兮厥姊亦終以不順伯奮偕於仲堪兮乃表彼高辛味既口師彼元冥兮般庸祀於彼 匪媵脩之足尙兮曰其宜爾彼物之不更作兮尙曰今其維茲集芙蓉以爲裳兮夫不可以終歲挹揭車之蒙蒙兮夫焉禁其不敗尙鑿彼華嵩兮余冠高之巍巍東雄虹以爲輓兮飾以明星之徽徽上衣以霽雲兮下裳之霓華攬宇宙之章章兮日月來其車紛信美以悅目兮顧余衷之所戚也羌彼世之所慶兮將重夫余弔也譬則墜於下土兮圭乃升於文几餅則搗於彼壘兮晚轆轤而佐祀將遠舍而去之兮終甘彼蓬藜羌兩美之不合兮又孰讚夫余決及余年之未邁兮亦不忍以此乎終沒既獨行之罹咎兮恐衆是而不可遷羌假其有义兮亦衆之所平夫既不獲夫成言兮恐訾余以不義灼墨食而兆之兮象濛濛以若涕條金變而成斷兮由日鼠首其有悔介石不終日作兮將討乎而罪摶余衷而投之兮余安忍以向割耿弱質之不固兮至中道而就棄顧余之所懷兮羌彈古而不可變也上下求其罔獲兮余安遺夫所戀也吉日歷於嘉兆兮衆告余以可駕既百神之有悔兮豐隆抑其來迓賽將重以高馳兮匪余衷之數化紛前乘以鸞鳳兮乃不薄夫余德上駟當以應龍兮從鸞鶴之比翼紜盤專以嶺余兮余安能以有解勉戢志而相從兮孰知夫余衷之所在先余馬於九疑兮訊重華之內則言還彼會稽兮證伯禹之遺極曷寵彼皇考兮非夫帝之是享生不逢其時兮羌信高而莫尙誓上昊之彌彌兮睇崩雲之霍霍登高遠顧其悠悠兮迅飛鳥之矍矍捐余珮於縣河兮涕汎瀾以交襟縱象輿之四逸兮羌余信其莫禁告閩風而言下兮夫余亦誰爲期彼瑤臺之有女兮固不念而至之呼帝閭使登余兮遠不見夫予背倚閭闔以四望

兮亦不見夫其外馳馳哀而莫勝兮顧余咎其中疑曷帝之余縱兮喟喪志以歷茲反余施於窮桑兮夕秣於元池繼日夜其不休兮余尚有所思乘明星之薄薄兮及晨暎之皜皜救過則遲兮爲德則早約余衷之冤冤兮凌長空之浩浩指北斗以爲正兮直千秋兮余依路漫漫而靡端兮夫孰知其是非亂曰象輿霓旌曷方攘兮賓彼元都不可方兮奈何爲期永相望兮有鸞戩翼聲中商兮雙離陸離閣迴翔兮御彼竹實前稱觴兮千秋萬歲獲商羊兮重曰命在天兮不可爭名在人兮不可營在陂兮思以平寧兮思以傾報死兮事生余艱兮以貞

九繹 凡十章

貴者延第一

奔濤磔駭兮摧珊瑚蘭嵌巖兮春未蘇旣積雪兮不得泮芬曷第兮中枯春風來兮吹絳帷蕭以脂兮然則辭神苾薌兮莽徘徊日在天兮露未晞露未晞兮春不憩握手兮天爲誓與君期兮朝暮至來施施兮從沛沛夜繼晷兮數則滋晷倏夜兮不半世登斗杓兮觀四時日冥冥兮何其思公子兮君不知

大藥第二

爾瞿瞿兮曷所望筮崑崙兮乾爲鑄西來兮商羊烹蓐收兮熬扶桑余有猜兮中自放躡鼉梁兮心養養寧太壹兮呢嚙削賓連不敢享則虺圍兮疑故宮踞始兮予曷戎雖則不孤兮淒中荃不允兮余靡庸告王母兮心有冲欲前兮喪辭薦石蜜兮懷瓊芝畜不素兮能無疑能無疑兮甘素芻藝木蘭兮去其茅蘭雖短兮以馨蓀信芳兮千秋

巫咸告第三

襲騎電兮驅雙虬君誰須兮風上颺衆莫知兮從所游招不來兮挽不留靈氣肅兮紛颼颼咸爲先兮巫爲後告予兮靡訖予不可兮軫以憂燕飛兮差差蟲號兮啾啾曷不駕荃兮上逍遙荃棄予兮時來思予棄荃兮不得又筆策兮暮奏日遲兮月驟路信遠兮不及足天信邇兮不及首夕想兮瞻瞻日望兮貿貿荃不思兮維余咎君告予兮靡訖胡帝子兮不余宥

以難第四

眺彼嚶嚶兮百鳥續明夫人有歌兮自不得唐回涼颺兮曳幽池欲有言兮復中止桓桓中原兮白日則迷締蕪蕪兮繁以苾逐兔兮騶虞茶登兮稱豐葶憐媿媿兮不予媿非娥眉兮則妬予含顰兮不得笑衆導余兮羞窈窕朝入門兮誰以歡暮入門兮中盤桓余所思兮傷肺肝借青鳥兮生翠翰欲言兮以難

知不及第五

靈脂車兮藥流波靈迴旂兮挽長河松栢凋兮傷女蘿女蘿兮不足顧嬰丹脂兮朝復暮置高堂兮飾金當神欲來兮然疑作秋風兮曷常瀉白茅兮澈九疆知生死兮曷溫涼生雖悲兮死則已貴如雲兮賤如水曷捐去兮不余視繫長庚兮登九疑回歷曜兮眇若思濯銀河兮雙纓垂知不及兮聊言歸

荃之顧第六

宅箕尾兮鼓幽幽享素妃兮羅百珍日淹淹兮不見人闕下土兮生清蠶蛟涎兮鴻溥毒草繆眠兮魍魎侏侏藥爲機兮構爲輪嘶軋活兮苦以辛紛腓離兮櫛下塵日遄遄兮不得陵及暮兮待朝及霜兮待春思憶憶兮艸艸蹇蹇兮絨絨荃不知兮所親荃所親兮匪予人有子兮不可陳安得荃兮排秋 訴上帝兮哀余貧予貧兮不若君何爲兮不還顧

下土不可居第七

君回攬於九州兮乃知雄鳩之未巧余使鸕鷀為媒兮鸞鵠臬而來教狸戴勝以結珮兮御雙麟之嶽崎與
猶則冠兮九衝而馳價價垂唇兮又益之以嗜妖麗如山兮刻以為龜土車兮踰躡而鸞追逐相柳兮錦封
絺祭百神兮以為尸劇二華兮封三嶠胡其轄兮娃其衣春冰兮渙渙而將泮築長垣兮余殿屎鵬為巢兮
鷓鴣之眉杞棘兮禦飢儻高駝兮奔迴豚允不可留兮在此子不良兮曷以為

江潭第八

森長江兮紛以瀾去乘槎兮不一還東有尾閭兮南有焦山人何之兮存世間園扉兮不得叩訴陽侯兮
莫予受採宿莽兮中不舒約不就兮憂不除葆有人兮懷趨趨非所師兮彭與胥湘妃來兮愴由與拳重華
兮飄珍裾亦各有親兮罔念余余胡為兮鬱扶廣南薰兮聽鼓瑟舞精衛兮增六律雖以娛兮各銜恤

戮赤菟第九

靈囿圻兮肆蒼傲紛四下兮翼以岷山靈兮遼邈而奔逃赤菟自尊兮跑唬荃蒨辨兮蘿葛相綯忍以聞兮
中刁刁謁狐裘兮媚之毛曷以為漿兮鵲鳩之膏豈不祥兮予所操辰之月兮甲旦予告兮將遠呼司虞兮
為予斷開陰岷兮昇北牢驅殊類兮不得憚鷓何為兮中洲獺何為兮江畔鶴之與兮拳角端追奔車兮儻
得歡齊擊鼓間鳴鸞

黃農沒第十

木葉青兮鳧北翔苔生兮夾堂菊將華兮紛以霜人生時兮不當帝高駝兮曷從翔攬中州兮渺無方毒艸
案倏余曷以嘗縱有瓊華餌不得長岐僉喋喋兮徧九疆安得起兮享餘糧診蛻成羣兮鳩鵬為祥百草蕪

蒙而方獲雖有至人底老不揚黃農沒兮余則悲不獲近兮獲以離紛美人兮綠余思登首陽兮採綠薇回
商山兮拳紫芝

惜將來第十有一

怨莫極兮逝者哀思莫煩兮惜將來將來兮曷期嚴霜降兮木無枝處幽豁兮聲不長照寒嶽兮顏不光木
末披兮鳴鶴鳴卷阿難兮江之岫時不違兮以華鬱泥滓兮生蕩蕩與君期兮水涯麥蘗蘗兮張兔置酌椒
漿兮與君醉慨以歌兮山之外年未逮兮歲未改言及時兮捐所穢涕淫淫兮思爾生攬轡兮吾將行
亂曰余何瞻顧兮遠不得止兮君子履艱不得言命兮憂蘭厥中語曷竟兮堅固余秉兮執以為信兮或以
諒之冀有定兮

九盤 凡十

迷九遠第一

輝目翳翳兮青鳥告電駕言游兮中若鷗喪馬兮薪余朝繫鵲首兮輞園枵總七曜兮齊如組蒼龍滯續兮
膺白虎斐徊兮中路蹇將趨兮不成顧西臨眩腦兮鬱賦陀左森漫兮山為波鬼凌陰兮騎園豹蝦蟇兮擁
道羌兮予兮中劍盤匪焚輪兮胡自寒隕躩兮危棧彼美人兮不余善裂指南兮醴騰黃七聖兮悵悵囑余
家兮聞自傷

邇苗第二

帝騎掃兮卷下土降瓊池兮鑿誠齒紋室兮變嶠宿麒麟兮今撰隸勅百神兮改圖君曷為兮反古纓長虹
兮冠紫霞箭之舞兮殷之車裳木葉兮餐朱華五石鈿闌兮誅神蝸重巨靈兮孽陰岷毀鼎兮辟邪塞龍門

兮翰爲注拯彭咸兮水涯靈均憩兮余之家檢白骨兮鬼爲馬友調饑兮師沒者寤想兮不寧巫傲傲兮來下

在野第三

屬象與兮鳳爲駕紛來迎兮匪乍帝謂余兮不平百靈中叛兮余在野閔沈瀟兮細長空霰如簪兮紛飛瀉
窪壘兮樓榭魑魅鳴兮前奉肆萬木怒兮知秋十日登兮猶夜夜何盟兮長不辭春何違兮長不思中悒
傑兮茹荼登堂兮併採芝介猿獠兮闕都市鼓鉦鉦兮犴犴駛塵蔽山兮如靈羅中絕兮誰之子

利用折第四

齊敝敝兮晝雨霜二儀交戟兮義駕西藏飾長劍兮曷爲割終南兮埋土囊園冥兮不從交馳兮心有忡游
八極兮扶六歸立會稽兮剗防風歸余兮發慨紛陸離兮余佩鞶洞庭兮韜兩華口英英兮不隕挽雄虹兮
飲滄雖海不遂兮中所快中所快兮靈不從星燐燐兮火鎔鎔君不利兮思所宗信利兮誰可通截崔巍兮
剖陸峒匪任兮曷庸厲不貞兮永凶

假余第五

假予徜徉兮飾艾厭百靈兮徂檜播微繩兮正之挾橫準兮平方外策園駒兮凌轟厖還騰蛇兮北臺東有
岱嵩兮臨滄海中崑崙兮戮章亥說炎暉兮官巢燧排王良兮下世幽貪狼兮東弧矢滅六國兮銷白帝危
冠兮游零縵衝陽兮旋繁星沐河漢兮濯南溟襲徊四極兮廓裕行趨泰皇兮追溟滓曷歸來兮自治骨爲
度兮轉爲規禍將延兮余眉陸梁兮曷爲

胡不適第六

彼美人兮胡不適中想思兮輟若怒素牀兮竹筴衣蓋膚兮雜玻璃萑疏兮宵階欲前兮有遠璫不長兮約
蘭芷薛爲帶兮騰爲鞶靈綃兮錦房桂不焚兮翻自香信美兮匪余所茶余甘兮不苦鸞與兮霽帔沐神靈
兮膏園露青鳥兮樓織女前兮成流蘇來無期兮日不月蘋垂垂兮涼颺發夫人兮天靡他歲暮無子兮愁
如何

石髮第七

石髮披離兮春濤拳拳裳兮激迴湍波爲霰兮傾以山朝復暮兮余則難余則難兮潮復沙石髮生兮岬之
側秋風兮鯨涎鱷吐子兮鷺綿曷不從兮渡黑水盛贖珠兮蟪爲盤踟躕兮誰所思擷其彭兮曷貽鸚鵡
迴翔兮羽用儀鵬南集兮永飢

不詳第八

咨葆稅余兮聽舍言余御葆兮朝軒轅葆有疑兮中捐恣葆兮不余繁世謂葆兮不詳葆兮莫有明獸率舞
兮陶唐胡封狹兮跳梁鳳巢兮彼阿胡鷓鴣兮以戈麟在野兮傷百罹鷓鴣爲冠兮峨峨葆則不固兮疑者
多邑犬羣吠兮知如何葆有謀兮余思胡去余兮傲傲關日月兮振舉鸞來吻吻兮愁二儀愁二儀兮曷所
適羅在天兮坎在澤履百艸兮不傷銜園芝兮將誰食

羽人來第九

羽人來兮超若集駕六麟兮不可繫馥騰膺兮鞭以娟拓落兮凌風立禽躡兮鶴蹈婉戀兮又疑躁遭男女
兮不分情不一兮各所好吹玉笙兮撫瑀琴前呢嚶兮鳴余心聲含笑兮間微吟外不從兮曷禁態莫多兮
日相眺愛莫深兮知者少月就沈兮日東暈歎不極兮妬相要語微吐兮不得授君可思兮遠以驕信然兮

爲余醜君何爲兮獨逍遙誓不從兮君懷僕乘迴風兮攀紫籀

曷渡海第十

君不樂兮無與娛命陽侯兮舞銀鍬馮夷翻兮河伯御駭湘妃兮奏脩竿信美兮傲儻鞭白石兮沒列嶂濯
新冠兮掛扶桑扶龍車兮支雙杖君昂爲兮渡海服匹離兮登崑崙誰併君兮戮之起夸父兮追不逮日落
兮風西來虎豹嗥兮猿哀古木稠繆兮翳意遷列國兮望崩臺語則窮兮託微嘯維余舟兮軋四棹舊好兮
倏若銷雲悠悠兮疑然邈赤匪狐兮黑匪狸思君兮有標安得馮夷兮鼓鼙繼來虯鱗兮開余羣

來胡遲第十有一

人不良兮匪天則爲日虞淵兮游不歸泥首兮號帝闈索百神兮不肯祈百神兮交不素陟陞兮曷余顧亟
歸來兮胡越且挽覽輿兮少回駐覽輿兮不可干霄兮倏以挫知予尤兮傷如何巢顛兮敲破君不料兮思
切惻種辛夷兮焚則芼夕不離兮誰懷抱睽一息兮不得報一息兮千世雲暝暝兮嘯余跡君信哀兮胡稱
辭傷來兮胡遲

亂曰維矢則縱不得繫兮言鑿厥膺不及背兮蟻生於穴垣則墜兮積垢在餅不獲漑兮藜藿彼牆衆所跡
兮烏棲於庭君則諱兮君信愛之曷不謂兮毒攻乃躬躬自療兮狡兔則脫罹厥雉兮子不克職爲親累兮
皇皇后土誰職戾兮

九訴凡九

帝無臣第一

帝不憐兮軒輅陶陶闕闕兮無人闕班流兮生清慨級琪花兮不足佩下徵荅兮齋元圃級霞文兮縞爲組

幹焚輪兮葉以縹長不代兮蘭蕙息蕙馨兮韜燭電御紫宮兮開清宴斥青皇兮討朱明荃謂爾兮不平日
暮暮兮騰龍宮荃將樓兮博山河漢凝兮長漫漫窈不親兮天之顏言借翼兮飛世間梓不迴兮軫不還哀
余思兮涕滂滂

大司命第二

肅寢宮兮寂不可方中有人兮顯類蕙擊玉衡兮韻以頰不得執兮君惟常君信巧兮陰與陽雙斗犀犀兮
雖爲量厭塵紛兮離九疆清庭兮寂房叫屢兮儻而荒緝紺雲兮高八牆列虎豹兮齊以戕焚木難兮闢
神羊屹不得近兮睽睽若盲安得御兮攬故鄉舞七魂兮荃之旁斬操虺兮誅陸梁君不可兮中逾傷信存
兮疑亡惻徘徊兮飛安翔

少司命第三

與君游兮九疑君自尊兮予自卑有言兮不盡辭君飄飄兮曳絳旗君須兮余後來攬九州兮煩若思終別
絕兮交無時恩不固兮怨終至春辰兮爲期霜慘慘兮而在內君屢辭兮非君爲賽不顧兮恍然逝星搖搖
兮日將出草披披兮而在墜與君兮結好思所終兮捐其早勉出涕兮爲君道

偃往第四

交不夙兮情不素哀相去兮歡相慕歡相慕兮惠然顧倏相并兮爲余誤春風颼颼兮生蘼蕪華旣實兮衆
英殊言入出兮與君俱君解衣兮降白露逐間道兮不一遇幽谿深兮多靈雨天不高兮雲欲下君何爲兮
漢之渚言思君兮不得去夙何時兮君中堅約蕙芷兮同精專握手兮交行雖無言兮誓不捐誓則捐兮變
鹽海蕩故宮兮及余罪付予美兮尼子車天漫漫兮誰干載

山鬼第五

離木末兮降白羽朝楚楚兮不得暮揭車兮射千縈為蕙兮曷以餐美人兮氣若蘭雲轆轤兮倏而散霍離
余兮江之畔既嘲余兮又微盼余不信兮君之惠歎折柔桑兮雜碧草將貽兮遠道莫授余兮云未老江有
瀟兮生白沙瀟瀟兮樓羅窈窕冥冥兮奈若何秋青兮夜紫游虬蛇兮橫深水君卜家兮余里紛以縈兮
榮茅茨歲既暮兮風若其君離余兮余不思

龍女第六

江有瀟兮天益高君叫怒兮生瀟瀟日冥冥兮思君勞君不來兮中膠膠靈何方兮森若逃暮期君兮江上
車來無期兮為君怒羌知君兮不得敖翔露露兮中相綱自有雙虬兮焉得朝追雲車兮鳴天響橫銀河兮
曷容刁君視余兮非所操賦位華兮崩長壕銜木石兮過奔濤與君異兮今已遙欲從君兮從斷鼈中不任
兮上訴達帝子兮方含怒君顧余兮為誰故

三尸第七

靈鼓集兮間清吹紛娛人兮樂以萃魚何為兮水周樂何為兮庭際予何來兮前最最春風平兮草茂蕤鬱
黃庭兮開絳旗寂寂浮碧兮奏元池燼百神兮舞參差余攜子兮將施施予無家兮予所私荃則仁兮以蕤子
不創兮禍所歸來莫知兮予所為白雲生兮蒸蒸水流兮磷磷將高駝兮為帝陳

東華帝子第八

明靈冠兮芙蓉佩予取雲兮為君蓋霓裳兮紫衣予奉虹兮為君帶日生兮鳴谷照扶桑兮生華萼碣石高
兮臨水深蟠余髮兮為君沐君歡予兮不肯庸應予馬兮紫雲龍紛所登兮向以穹從君左兮不及右與君

御兮交手花駢駢兮日色耀歲將暮兮與君違君交多兮不專多貴游兮棄賈賤雷闐闐兮交鼓鳴玉兮雜
土予有言兮不得聞朝暮伺兮見微氣東風颺兮雲從散日御君兮不一見從小吳兮非予善予獨處兮思
離離魂飄搖兮為君旗日向昏兮中心悲

諾皋將軍第九

伏靈輻兮石上雲下睇以金喬氣龍羣予所宮兮中為君藉芊眠兮闕元垠君不憚兮予急急予跳號兮君
則不聞聞闐闐兮帝署署灑銀河兮滌衆慙百靈登兮瓊纒紛擁長劍兮擗霞文升所知兮上帝欣安得荃
兮結君勤下泰華兮攀莖芸酌太陰兮御清氣哀下人兮筮予魂與君處兮晨以昏渺不知兮君恩亂曰天
門以幽不可方聲高以邈神哉襄神哉蹇蹇霓纒纒予美好不得歎持人以怒中齋嚴望而不賸何踟躕
脩絮以誠冀有明晉矣不征誰為感東風離離余將行

劉招

楚將逐諸宗之服美者曰是倣儻煇我族子景差與焉葦舟至於激尾將屆吳會於是屈原未死酒齋桂醕
搗瓊漿謂巫涓曰江水東逝往者不反彼美之汎汎遂反於亂爾為掌寤其能無言巫涓曰唯吾將招之不
究厥性未審乃度何釋何戀何畏何慕乃汎招曰爾盍歸乎爾邦之人於爾乎無猜爾盍歸來曷舍爾之樂
上而就彼蒙昧爾行不載焉居不載鳩曷為漾漾而乘輕舟爾盍歸來天下之有家不如吾匏之瓜色失在
塗血白如椰爾盍歸來父母之委蛻則有妻子困不可慰劣不可鄙高門之人矚目鋸齒一睇百笑面諾反
鬢爾盍歸來獨行之苦苦於捫幽谿谿鬼稜生冰影呼如豸前有不敢號退有不敢思一鳥銜髮白肉委地爾
盍歸來爾盍歸是安盍歸是歡松栲桑其樂千端虎窟有肉莫之敢取驪珠在海裳裳去之爾何為平舍

爾室子自稱逆旅爾盡歸來逆旅之賤賤於浣淪則遂塞寶澤承糖蒙髮鼻口易治締冬續夏爾盡歸來爾夙好之乖外而況於殊輩日生植柴頸延連釐或十擬而一對猶未得其類爾盡歸來爾曷不選聞汰色食簡苟活城齒重關樹舌不拔爾曷自奔逸批耳嚙膝汗血及踵漉水莫食爾盡歸來爾曷昆弟之疎而童僕之親誰守誰居廓落怍怔相彼僮僕乃利乃貫裕則多患約則多怨爾曷自乘藁揭足與濟黑疥而就厲爾盡歸來春秋之不可淹數徙之松頗南去須羌於今而不愁將及於黃土爾盡歸來少居性親它人異心田父秀驕交多肌銷爾盡歸來遠方之人不可與謀屈原聞之歎曰是其辭繁而不曠吾不能復用巫涓也乃重招曰爾盡歸來東方不可以游露澤之天吳摩牙欲嚙我蝦西方不可以游峨岷之虎兕摩牙欲嚙我蝦爾盡歸來天上不可以游天上九關一關九虺狡狴十犬鈎爪電手嚼金沒鼻嗜火如酒爾盡歸來地下不可以游地下之昏昧層淵重湫蛆蚓之爭鬪如奔牛鬼窮骨酸常啼啾啾南方不可以游南方之熱熱而愈下北方不可以游北方寇虜折骨如城剝婦槩孺斷彼娃晦以鬪纖媵爾盡歸來四野之清阜無如我鄉鴛鼠鴝鳴變爲鷓皇鵠鯨鯨鮫鮪佩蘭以芳錦竹文犀遠郊連垌導爲脩徑重翠複格網紫褐翠以造媾室岑淵所迴冬秋無風因埠隆窪別階西來賓從誦言奄申德義皆燦赫之沃而眞素之貴鉅生鴻儒簧游磬驚動與皓月摩肩行與炯星交連靜躁脩情各其所會蒼光濯足而起重陰呂望晞髮以跂東海信衆吁之非靡或獨唱以何悔伏臘歲時饒霜寶曠轉鴉炮離燿鴿粉魚象箸兕觥晶盤紫榆雕鐘鼎篆文璧書起而行之親友相賸窮窳卻步少長遞進接衝泌之孔嘉去伐檀之太甚信人生之有命雖譏惡之何禁欲布名乎天下恐不如塊處之爲審亂曰爾盡歸來喬木無陰尙可息些竹實傾筐尙可食些不謂爾鳳尙有翼些不謂爾麟爾豕未折些爾毛羽故不憚些四方多眼翳白日些我躬不閱爾愁疾些未可以出遠無極些爾

盡歸來涕沾臆些微子之故我不能食些

續天問

甲子之電有神下集勒數鴻相別櫛玉岌授余魚書曰獲厥藉靈策五九以紀天地九首之皇四萬五千歲凡三千七百餘歲關一天地以唐甲辰迄胡丁未數文以龜賢士出涕余曰疑然孰固而移孰畫得避余將迅之曰二隱五章孰從比只脩越短差孰從理只別千派支何所繫只厥遺渾窅行何止只何與人謀爲衆規只列宿何旋與人相舐只軫還蒙鴻觸何戾止孰懸孰醜荒洞曷擇百神馮馮何所暨只帝何慕奇爲世厲只衆曷所遠聖曷嬰只日安不及曷偏味只背元陽虧胡不得砥只月死復育星曷克墜只盤古曷歿瘞骨南海而曷流膏以漫渤解只三女協產而自爲匹曷殛腔峒復育巨翼只康回朝極女媧胡職而帝不力只十日并暎女丑曷斃曷揮袖自翳以爲雲雨只脩行胡貞不得其生厥宿爲李濂淫曷行只投壺何失負矢何直電曷以 日曷以棘查問何洩懸漢何極只欽鷓及鼓曷殺其祖帝戮崑崙而曷以矯翼只窳窳啄害曷云無罪見斃負貳帝曷嬰之乃變龍首神何聽焉而爲之宅守胡鳳喪羽而不見弔又胡因白雀而不隸於鳥戾橋三世曷黎克寧地嶺堙塹而曷爲禎萬羊兩龍胡夢是兢藥彼四季環七十二巡鳥號之倫曷懼以神炎帝何服不及其女精衛西使而何所取箴之有黃蓬天晦芒而曷大昌甯封善化曷不從帝而焚其骨怪義白阜以通水脈胡殺黑龍而濟冀穴又胡伯禹以相其尾黃雀赤首日旁焉止羿何墜鳥而喪其妻生髮齊足語何所師金德不競又胡帝彼天曷赤龍產堯而不棄之寒冰稷爲厥曷只胡命蹇而終懲黃星靡鋒上象曷替大魚曷沒元龜曷繼偃佗飼堯赤松曷棄曷止何候而舜舉及帝襄城之野七聖胡迷胡納大籠而鏤用晰夸娥之子而負二嶽曷高密以聖而竊帝息風日就崩四害選征曷二百歲龐眉以登七

十二載而不得明覆蛟叩天隕星如雨丹州之鳥曷銜珠土曷龕山之女羞而化石曷禹不惡而躡彼甫滄水之神以貢碧珪鬻鬻負舟禹用焉疑厥受珊瑚而却玄既禹何利只白環帝庭鞠體王母帝何每只越絕既王裸何理只犬豕園衣而前何底只代紘之鳥曷去禹塚何所事只驅虎伏辜石榔胡傷賁山之乳以爲予子而析薪曷殃師門曷殺而埋於野孰負去之若豚厥馬龜扶何寃與羿不當而假逢蒙胡神之能而恢小康胡啓以德而終斃夫大羊胡益終薦而阜陶之無後綿臣胡親胡生僕牛胡覆玉筐二女而一字曷爲多聖而無父之子空桑負祖以自爲是曷蛟妾化人而告桀以吉凶曷徙之外國而御彼龍西門何負東日何起馮夷何告費昌何喜又何尹而聽於妹嬉胡七年不禱而日躬爲犧應龍肆橫戮尤及甫胡竄於南而澤不及土帝何寵魃以敵蚩尤焚澤及枯又何所求支祈之獄孰云解只非封龍過孰共載只伊尹告逝曷晝晦只咫尺之魚曷共務光而負以背只曷傳說舍箕而舛於杵白又胡夢之形遍視羣工而可以求胡武乙作博與帝而爲讐有蘇之女胡比膠鬲而爲周胡義窮門而羨里之不慈胡九侯之女貞而昌以妖姬折蓋震乘武胡不悖積雪平丈五車何止且何所懲尙何所試蒼雲七蟠負斧曷躡三載不獲璜鈐何勳曷服澤衣而瘞之無尸厲神灌壇曷爲避只曷避其神而輕其主曷克事神而且用栩栩胡紂未亡元子竊器而先馳地震四方莫之或移胡納金騰而發用起白魚爲鳥而曷以興赤龍有瘳而曷以崩姬出天龍曷終崇只卜紀三十曷不繼只八十一而舉誦亦只犀之克承穆瞞肆荒曷以西征曷借盛姬而殞於寒澤曷鼓化她而與神奕王母何峙而將之來曷誓復野而以終乖天帝暴醉金隕石墜曷反之河而使內穢下享無郵賜之饗犬深目蝦喙號牛曷反武靈飢死而何以飛舉涉於秦野所得何語采女告王鏗何以去綏山厥高度之幾許赤鳥銜書曷喪國廬曷私厥檢不爲世取獎惑何良返舍而喜災烏何蹇夾日而死射之中日曷

蝕彼月貢金爲土而蜀曷滅木爲陷父乃不得報墨翟覆衣而詣何道沙蟲營營姬瑕何造白鷄繞烟之推何告曷莖白霓而禮其師曷斟雉羹而帝是滋曷良善御而騎箕尾曷吠狗寶服桂而不死曷以子晉而賓彼天曷甚宏而以怪佞斃曷去土伯竊帝之紀曷以消彭而獲不死曷願卜亞聖以爲地史曷鄒人子以抱犢治嗟罔冥之罔聽只塊軋靡極以誰爲靈絕地通天誰升帝庭彼人事之錯語只縱臯由而不能聽譬彼溟魚掉而自噬譬彼蟻蟲知其所居譬彼軫蠹雷轟穀轉蟪蛄然不與譬以多觀舞風過電 不知其故譬鳥之翔見下而不見上譬空桑集蟻自爲帝長置目於九墟譬海乍涸而萬 皇皇譬蠶以幽則迷其方卜策鑽兆孰審厥要謀人以鬼不獲其理閭闔阻遠誰納厥瞻惘矣下土以爲疑府攬茲違茲曷違余龜維千萬年誰宗余天

叢書 凡十有 五章

若弗及第一

汨余若將弗及兮恐年歲之不吾與朝率阨之木蘭兮夕攬中洲之宿莽日月忽其不淹兮春與秋其代序維草木之零落兮恐美人之遲暮

嗟飛廉之颺忽兮夫不可與爲期始告予以整馭兮逃離離乎喪其所之日季夏以有征兮倏尊收之代至野莽莽而黃萎兮遂以及於長楸菱荷衣之莫勝兮紛木落而施兔罟百獸窟其向穴兮獵者其何所得實純矢於荒隅兮枝輶車於絕域長子憤而遠去兮怒僕之不善御使僕改轡兮又不知于處天鎬鎬以有聲兮日濛濛而失路羌有追以不獲兮顧左右之維谷余嫉夫時之太固兮時反以余爲戮梗柁拱以違秋兮羌及壯而襄志進不得以有明兮退不足以久恃蘭及茲而競策兮芙蓉妖嬈以啓秀夕萎夫其所甘兮余

故譏其太驟譬獵之逐獸兮不從左而發軌彼颯之駭而喪其形矢兮亦不娛夫長子世謂余其好異兮曷不及春之芬敷余固羞與同華兮不忍棄於中途矜予年之少壯兮不知夫美人之遲暮也知霜雪之將降兮余亦何能以不顧也赤地伏其將舉兮雲濛濛而覆之迅鵬力之將薄兮風颼颼而足之既歷茲而不然兮夫誰以俟余中若矢以四射兮乃不得其數愛載則當先兮愛爵則當後攬列宿之躑躅兮羌反却以無裨涕願望之覺寤兮尙得窮乎四時

亂曰已焉哉登輿不謀則謀之既傾已焉哉畜鵠不飼則飼之天已焉哉捧玉不戰而戰戰於淵大椿植於傾崖兮則安能以八千年信覽草木之未得兮徒嫉時以不遷

哀衆芳第二

余既滋蘭之九畹兮又樹蕙之百畝哇留夷與揭車兮雜杜蘅與芳芷冀枝葉之峻茂兮願俟時乎吾將刈雖萎絕其亦何傷兮哀衆芳之蕪穢

時既不得以余埃兮喬木剝之無陰四野廓不見人兮日糴糴而就沈醫閭闔藉以廢色兮又何況此百畝羌悼蘭之不華兮而種彼荆枳昔愛蘭之耕殖兮集藁本與射干舒彼桑之膏土兮而焚其柔蘂夫乃捐厥服兮曷遑郵乎其佩苗蓬蓬而不理兮饑則不可以載猶顧茲其罔捨兮夫匪余之所哀余信有此芬質兮雖菴繻其不改世非迷彼黔哲兮特其中之所怪余不茲孤芳兮衆亦不余害獨悲夫天駟之紛馳兮使衆芳之不揚天旂旛而失色兮草叢叢其懷傷彼荆枳之就棄兮猶不足爲余惜既捐彼倚桑兮孰爲余而白之歎曰愛彼蘭馨棄所覆兮泣泣彼桑垂白露兮亦不遂故兮噉曰蘭則利秋喬木棄之甘藷改節孰則利之委於彼野抑執載之春則借敷孰及治之亂曰彼植蒨蒨則紛百英木葉來下紛棄於野衆榮共失失

所仰也零露以華焉得尙也哀彼蕪穢在庭之外誓不過之中自慨兮

民生各有所樂第三

忽反顧以游目兮將往觀乎四荒佩繽紛其繁飾兮芳菲菲其彌章民生各有所樂兮余獨好脩以爲常葆長兮江涯葭生兮水滸營施兮洲中羅張兮屋下鳴鳩兮幹幹而追呼元亂兮屬屬而相乳鸞鷹兮銜銜而橫阿猿狖兮聯聯而承土鱗鱗兮蕤蕤而淩波狡婉兮蘭蘭而扶莽雲生兮霏霏虎兕鏗鏗兮在野衆卉兮披披風思思兮日夜迴岑兮婆娑而晚余水周兮夷夷而怨女狂童兮與與來還兮楚楚美人兮棘棘而中冤威施兮陶陶而含緒鶴雛兮將將鳥獸兮孳尾而羣處日永兮豫豫石峻兮尋尋誰忍此兮與終古歎曰阿俗長諛媚而違中儂質肆誕巧而多窮沫澤附脂肥則不駿約體就悅美則不豐行言若謠其後有矛步止儻儻其前有鋒擊鼓秉習魂遠去之泛深以流將溺其躬叛約以耽君子所鄙內厚若訥與大人從孰揆厥正以固余命方回爲愚構机爲聖孰艱孰娛不究其竟

亂曰貞女由冶不善睇兮葑亦有足不善衛兮佞倖而走謂予蹶兮蹇蹇之言謂余戾兮飾飾率古謂予贊兮疏質坦中謂予替兮時相而舉謂予滯兮當而不疑謂予捷兮疑詞勿明謂予蔽兮疑食弗甘謂予厲兮狐銜厥尾曷以濟兮雖允則樂非予計兮允則不樂曷終歲兮

無女第四

朝吾將濟於白水兮登閩風而縹馬忽反顧以流涕兮哀高邱之無女又曰思九州之博大兮豈惟是其有女

紛余既係此章佩兮又飾以瓊玖俗乃厭乎異芬兮余亦以爲是信余服之有當兮何必申以攬葢此黨人

之嫉余兮雖改佩不以爲美忍初志以固塞兮求予匹之所在及陽谷之方登兮飲若木之晨露許余願以永好兮與美人乎相慕世薄余以有媒兮哀二姚之不當女雖醜以信妍兮求者雖媵而不屬世反質以好媚兮將文履而設悅鸞襲帶於中閨兮匪九戎之不賴余命婺女爲媒兮將捨此而遠彼宓妃之躑躅兮羌信高而匪耦詢九疑之遺妹兮曰霄明與屬煌彼湘妃之所訓兮又儻傲而不可尙使余騁以從馳兮忽超越之無所惟睨世之佚女兮益康淫以日去珮縱縱彼雜鑄兮與瑯珩其不合朝將覽彼九州兮思少康之已家信博大以中疑兮既捨此而焉知婺女還贄以致謝兮曰余不余理美無匹則莫擇兮德無耦則莫紀伯禹通夫命山兮羌不用乎行媒孰自往其不可兮若升高以無階有熊納於螺祖兮尙彤魚之未室解芳纒以上詒兮余不當其日彼九州之膠廓兮將覽集而焉下衆女而一姓兮焉知其不妬蹇反施於舒憂兮信不任乎獨宿余衷詰遇以莫勝兮世不知予之好淫召泰祝而占之兮曰獲乎余心羨榮華之方艾兮謂戒予以忽隱兩美其何合兮恐焦瘁而不及嗟黨人之多嬖兮雲交交其下麗粉顧茲以驕邀抑孰知乎余志也

釋塔第五

昔予夢登天兮魂中道而無抗吾使厲神占之兮曰有志極而無旁又曰懲余藥者而吹鑿兮何不變此之志也登釋塔而升天兮猶有曩之態也

電有神集於余之庭兮雜靈鼓之闐闐羽紛紛以霓霓兮氣苾勃而縱橫賽告余以趨俗兮謂及余之未老羌中幹而外疏兮帝亦以爲不好曰靈宇之匪所兮將棄茲而不居孰改服而可合兮將退處以從余中狐疑其不諒兮恐上下之異昧既脩質以莫容兮何內美之足貴茲世類其難入兮雖信化而罔是告彼神以反舍兮神怒余之不服曰帝可藉而不可抗兮過可悔而不可直孰違時而能章兮孰處暗而不墨羌始不余諒兮終抱戚而不濟初余發彼闐風兮戒驪連以行李望下土之塵塵兮中輕喪而遠恃顛忠信以爲媒兮介之以精專曰余眠於彼階兮乃知其不然集窮奇於太阿兮鞭韃余之左右曰余棄於下土兮復凌厲而焉究審彼黨之所尙兮亦與茲乎不遠世各捨以逐末兮夫孰明其本上下沓而口豁兮恐蒼黃之必反譬勾吳之文體兮以桂楫而莫取蛟螭迅而鼓脇兮必假之毛羽雖信執於厥故兮固非其輔也繩人以所薄兮是以招侮也矢曰蹈古守法兮乖彼衆兮俯眺二儀兮憶若夢兮矧方以圓兮則適世用兮余信不能莫余抗兮亂曰孰云汎海則可以匏孰云升天則可以階釋而他從固其義也釋而去之猶異態也知不可兮不可改也涕之瀾瀾焉得再也

僻遠第六

苟余心之端直兮雖僻遠以何傷入淑浦余值回兮迷不知吾之所如深林杳以冥冥兮乃猿狖之所居山巖高以蔽日兮下幽晦以多雨霰雪紛其無垠兮雲霏霏而承宇哀吾生之無樂兮幽獨處乎山中吾不能變心而從俗兮固將愁苦以終窮

山中兮不可以久居去土離鄉兮渺懷予親戚叛散兮廓獨處栗冽兮巖高而谷虛人迹滅兮獸追趨升高騁遠兮中踟躕價回兮嶺絕而木疏烏迹縱橫兮橫縱若鋤薄雨將降兮山氣舒戒以寒風兮百蟲祛祛日暮兮宵行燹火相搏兮鴟目猙猙悲猿兮終歲而不得寧語相聞兮匪所親交游屏絕兮獵獍爲朋雪飄飄兮焚薪幽道塞兮谿載平朝鑿水兮倏爲冰體骨浹裂兮望不見人草蟲屈勢兮寂寥而無聲鴻鵠南翔兮噉噉而自明回中庭兮不得行歲將終兮時將更觀百草兮中營營去則不反兮約無成來何期兮絕響

丁丁年老兮別子而遠征秋風兮羈旅而懷呻林深喪道兮霜雪四并查不見天兮島崑兢兢猿狖兮失耦而哀鳴孤雛離羣兮羅之以罾已焉哉百草搖落夫何再生樛木上慄夫何得升山中兮無鄰欲歌兮填膺不再得第七

發郢都而去閩兮怛荒忽之焉極楫齊揚以容與兮哀見君而不再得望長楸而太息兮涕淫淫其若澣過夏首而西浮兮顧龍門而不見

嗟玉隕於泗淵兮冀岸壑之再更被粘剝以爲標兮乃不得乎復榮彼鳥高翔以迅急兮欲繫之不及託審顧於故宮兮中多懷以泗泣思美人之願靡兮蹇中轍而不化貌儻怳以不親兮從之而不可爲往數數乎彌遠兮忽不覺其高去匪余情之靡固兮時乎促不得御毛羽絕而莫通兮今罔知其所都履坦道以臨淵兮齋瓊華而爲茶上絕則不至天兮下馮馮之無戶從橫波於沃焦兮信不事乎檣櫓既四駕以莫登兮不如反而有謀築瓊官以遐眺兮安得瀉於我憂哀見君之無期兮雖流涕而不得君有德則若忘兮孰職報而可釋哀報亦其靡庸兮願及君而一見因飛雲而致詞兮安得及乎其便

冀壹反第八

曼余日以流觀兮冀一反之何時鳥飛反故鄉兮狐死必首邱信非吾罪而棄逐兮何日夜而忘之
賽予既棄此故邦兮共哀吾處之非土謂余好此離異兮忍與此乎終古禍既重而莫避兮情雖密其罔訴
晉繳信機其在上兮羅網信張而在下美俯仰之多故兮余安可乎中處余幼有此遠志兮既爲莖而改之孰暝晦之可娛兮又攢厥蘭而穢之世耽耽而擬予兮予焉能以無害也匪郵予之故兮夫以莖而共載也鳥則避夫機矢兮故遠集於荒野肱既折於絕途兮故捐輿而去馬乃邁彼凜風兮又送足而折羽夫亦不

知其故也余既錯此南服兮已審其變態帝囿余茲域兮信不思乎其外既故土之不保兮將去此而焉屈譬漠則不方兮乃徒涉而莫濟孰棄舟於衝波兮曰忘其所事予信譬以口禍兮亦孰謂不可允罔計夫所至兮乃履冰而下墜羌天棄厥孽子兮則終靡所容王屋歧而在首兮九疑起而當胸匪余土之足戀兮爲魂魄所自始執手負此重璧兮乃外出而棄之足不忍乎太章兮中踢踢乎忌之曰鳥飛必反鄉兮狐死必首邱余安忍乎是之曼余日以流觀兮恐濛雨之終蔽草木萎而獲起兮不知春之未至上既質之無天兮又下據之無地中抨抨以自數兮孰得尚乎余志亂曰履咎雖艱莫使中辛處禍雖烈莫爲世論中雖不幸莫使難陳世雖不論莫使愛憐重曰處彼幽篁不見天兮日月昭回時及旋兮老思其邦中拳拳兮子雖不良安得捐兮

有鳥自南第九

有鳥自南來集漢北好姘佳麗兮伴獨處此異域既惇獨而不羣兮又無良媒在其側道卓遠而日忘兮願自申而不得望北山而流涕兮臨流水而太息

生既離此末俗兮又託處此荒瀟紛吾以此多難兮又無良媒在其側信雄鳩之已巧兮乃斥逐此鷓鴣世猶哀其性拙兮使終得乎此志嘗僻陋之莫伸兮顧羸癯其罔視驥赤汗而喪羣兮故屈伏以受繫鷓鴣棲於杙樛兮與雞鷲乎何異思帝闕之歸窺兮下羅之以列星芬與澤其交還兮萬象趨之征征路信遠以莫通兮虎豹又起而司晨屬長庚以致明兮左營域而不將既乘此微風兮又遇豐隆而不揚哀吾憲此異禍兮從高駝其焉駕羌伏處此絕壤兮猶余罪之未播將階蘭以共萎兮莫以定乎其可虞仲死不及親兮終去國而莫祀重耳不與彼位兮乃踐土而履之子止爽其莫藥兮故刎頸而就死胡匪所親兮乃歌狸首而

避之指丈人以爲正兮呼哭泣而聽之世既莫知於余哀兮又何必昭於予行予既莫及於先兮何必指後以爲信世謂余之扁舛兮不圖乎其富孰錯節之既蠹兮而適於器用望白日之悠悠兮底黃昏而中愴倡曰有鳥自南兮哀鳴以思音變以商兮羽變以儀翱翔帝庭兮不及其徘徊南服兮達莫致之亂曰三秀生兮荒之野谿自出兮臨其下芙蓉燦兮木末罽罽施兮嗚括括朝往採兮暮不歸言思君兮襲裳衣蘭芬兮菊晚下上堂兮君日遠路偪側兮來者艱望夫君兮雲之間

大故第十

進路北次兮日昧昧其將暮舒憂娛哀兮限之以大故

離離者菅葉下敗兮嚴霜未降露先戒兮榮華未謝猶及載兮馳之逖逖言肅逮兮霜霰既降日昧昧兮芳芷以枯多蕪穢兮守志不固果爲害兮質難以征猶昔態兮陷不得濟進不得退兮非余所甘余不諱兮焚彼峨冠詎惜佩兮非余所急余不慨兮揭裘喪領詎執帶兮中怒若狂進以憤兮毀節喪檢名不足愛兮濟險棄輿衆爲怪兮祛焰以覓勢不得益兮中固以貞不反外兮譬之狷狷維余誨兮過有式履罔所悔兮憂不得舒咎不得代兮蹈懷異路寡異采兮顧蘭以桑時不忍刈兮世不吾知思所在兮孰則限予維予界兮君子履矩爲世會兮

改此度第十有一

獨歷年而離慙兮羌馮心猶未化寧隱閔而壽考兮何變易之可爲知前轍之不遂兮未改此度車既覆而馬顛兮蹇獨懷此異路

余既降心以從俗兮猶未得乎世直紛處此岐途兮又坐斃於荆棘知余往之不僧兮乃陷於罔測聽斯谷之已改兮故南轅而命北德有時以不信兮守有時而不力孰予心之可化兮而彼世之莫易涕泫泫以交被兮予匪甘於改服也既上下之無當兮不如反之爲得也繫騰黃以窘步兮故見鄙於鷲鶴鳳逐於原兮乃就師夫黃鵠哀九州之信靡兮不一明乎此義信公道之能白兮亦何郵乎余志纒信長之爲侈兮不及視乎其佩雖哲者之有識兮亦不足爲怪思予荃之懷憂兮中益悼而莫措謂余有此離跂兮終捨茲而遠去彼世紛其曷合分羌杳迷入之門不敢劇乎茲芬兮故瞻然而內冤悲所懷之不獲兮顧皇路而掩涕呼轍而不及脂兮世果謂余就利余信毀其軌範兮世亦孰知其不合信駕於康莊兮世亦孰知其道予憂世之就頹兮不及反於中古譬余魂之遠去兮今迷其故土登黍邱而招之兮哀以率於曠野雲翬翬而四下兮不及見於皇祖世寔遠則寔隔兮思去荃之逖逖從彼俗之莫可兮闕橫流而太息亂曰委瀾若波乖素眞兮行與世違乖乃親兮執調厥中俾無僇兮車覆馬顛路不可殉兮曰改余軸何所遵兮執轡者非驛留見擯兮匪予所思予不得論兮

誰與第十有二

開春發歲兮白日出之悠悠吾將傷志而愉樂兮遵江夏以娛憂驪大薄之芳蒨兮攬長洲之宿莽惜吾不及古人兮吾誰與玩此芳草又曰誰可與玩此遺草兮晨鄉風而抒情高陽邈以遠兮予將焉所程傷哉蘭茲信其不芳兮吾將襲而幽之離房既不藉俗以有艾兮又曷待之而揚高辛遠其可尙兮冀內正之得明世信燥以不馨兮焉能代之爲傷惜古人之不及余兮使遺失此芳草賤則飾以爲綦兮吾將適乎遠道覽大薄之豐豐兮將遠究於七澤辨雲夢之錯產兮望芙蓉之爍爍既信美以不永兮乃知夫此之爲貴襲而幽之既已矣中孤疑以自異璞不泣以有明兮孰審其爲瑞雖遭此親昵兮不及辨乎余志鷓鴣集

於荆榛兮世亦惜其文采彼不及於虞廷兮故哀鳴而莫止季女飢而失職兮怨女曠而見毀彼漆室之幽思兮獨與此乎不似世共採此萎萸兮孰內顧以爲棟荷繁采之足贊兮亦何避乎就巷交晴比於長離兮余固羞乎此尙也世淪胥以及余兮余不得乎爲障也巨鱗蟲而負鼎兮衆信笑其不量也知子則莫若父兮荃固哀余之莫抗也始予猶顧此庭蔭兮今孰頡而慰之蔓荔薛之雜揉兮羌亦匪予彙勉就世之芳澤兮不必託其臭味信世亦謂余馨兮又孰起而飲之豫讓毀體以成志兮雖妻子不知其故椽茹汚以見節兮故顛沛於異路車旣顛於泥潭兮勢不潔其下體舟楫旣喪兮必援木而得濟世亦孰知乎余汚兮而責余以非是道獨舉而無朋兮過亦自引以莫白夔龍黨之莫及兮羌咨度而無脊蹇離畔彼四土兮獨憂余之宗而亂曰處若集木非予蹇也履而視地非予跳也躡而前後猶不余善也披髮之首不任冕也朱投之火不得辨也銳方以圭何得轉也漣漣兮遭時之珍也揭揭兮涉時之淺也郁郁兮知之遠也礧礧兮不知其反也

雖少第十有三

秉德無私參天地兮願歲并謝與長友兮淑離不淫梗其有理兮年歲雖少可師長兮行比伯夷置以爲像兮

昔與蹇脩爲理兮索美人以求匹執衡陽而誓之兮曰撫壯以有室旣余駕此覓輿兮乃辭余以幼艾曰將俟於後期兮時遂去而不再哀美人之旣老兮榮華落而就歲將去此而遠求兮今信不得其配世旣重老而輕少兮故不用此攬葭採芙蓉於向夕兮故瞬息而就萎余非負此脩媿兮信美人之與期余知夫銳進之爲咎兮羌終退而莫居世數馬則以齒兮今之相者舉肥飛節產於江淮兮與澤草而一跡衆不知夫所

有兮故擲獨而捐棄夫自昔而已然兮羌底余其何尤傷美人之難遇兮霜雪選其離憂追奔風以輕車兮羌不知其遠去師鴻鵠之高馳兮猶不得乎朝舉俗溷濁以不清兮雖至老猶未得譬河水之恩淪兮俟何時而將提蹇將違而孤守兮世誓予之矜刻與世混以雜處兮又非余之極呂望隱於鼓刀兮至七十而始庸范蠡吠於狗寶兮亦華顛而得宗余固無樂乎躁就兮願抑志而守窮去彼黨以待清兮躡伯夷之高風苟幽懷其不墜兮美人心亦與吾心同亂曰行若縱轍時不得控兮處若握樞道不得讓兮道與時違直不見諒兮賤而理貴不爲世尙兮紛其可喜曷娛衆兮衆言易搖中若喪兮內顧以疑恐不得當兮桃則七載訛爲權兮受命不遷思橘頌兮

無施第十有四

望三五以爲像兮指彭咸以爲儀夫何極而不至兮故遠聞而難虧善不由外來兮名不可虛作孰無施而有報兮孰不實而有獲

夫貧賤而脩媿兮信昔人之所恥固予稟之所極兮今不得乎始息覽下上以周流兮乃知名之所起羌幽貞以內娛兮終與敗而爲軌善相齒而來光兮名相耳而來集火焰則就燥兮水下則就濕孰不求而能至兮孰不追而能及羌報者之不待施兮而獲者之不待實世旣樂夫射虛兮故去鵠而多失必何極而不至兮故有失駕之道物畜守而能豐兮善多取以爲躁九折肱而或醫兮余今亦知所蹈非美人之故兮亦不忍乎改此舟旣覆而得壺兮乃幸喪其所有衆女妬其蛾眉兮乃幸不謂余美恐其不善媚兮猶改服而不見理故狐疑以莫正兮欲捐去而不決昔予夢徒於西夷兮路欲劈而中絕倏操棹於嶮巖兮望彼漢而將決卜不知其所占兮羌守常之爲可必變易以創濟兮終與途而相左善猶不得福兮詎薄積之無禍將顧

竣於四荒兮攬氣會之遷化九變態則已極兮今不知其何更尚音言與後祀兮予尚乎有朋反曰榮華既不可逐兮荃不忍乎久瘁羌斂榮以向實兮故為世之所貴亦孰種而不穫兮孰織而不衣必棄德以為美兮亦孰德之為累亂曰處禍雖烈兮世以為常操德雖固兮世以為狂發言以衷兮世謂不章反覆冀明兮世以為伴佩不當長兮醴不當漿余何所施兮而報是望

登石樹第十有五

登石樹以遠望兮路渺渺之默默入景響之無應兮聞省想而不可得

僕夫戒予將駕兮予下處之不足窺履窺窺而不章兮噫遡風其不得辭登長壘之嶢嶢兮余所涉其若茲天信高以莫及兮復障之氛霧攬林薄之黝黝兮日復匿而就夜左右去莫余從兮既處絕而無路猿狖跋之札札兮藪不可以語昔與靈有此約兮今不知其遠去審不忍乎離余兮奈時之不可為步躑躅以日窘兮心羈羈而不開締不得解絃不得尋兮來不得將往不得歸指余道於幽谿兮當石峻之崢嶸何哀之嗚嗚兮猗何逐而不遑山河寂之無聲兮木何淒於嚴嚴飛鳥過不可因兮亦迅高而颯下涕泗交以凜風兮虎兕亦時不在野雲捲起之塵塵兮信涼而不可駕呼巨壑之硤研兮世曷辨夫予音乘長颺以北征兮余不樂乎自南羌不知荃之所方兮故羈足而維心望故土之不遠兮乃限以不濟闕淪波之磕駮兮習鼓柁以從遊凌沈澆之無規兮中泆擊之嚙嚙顧美人於中島兮又飄忽乎水濤側白石以江涯兮故余祖之所宮悲涌湍之瀾瀾兮舟與車乎不違劍已失於奔濤兮乃畫舟而繙水器已擱於傾崕兮又安可以守此孰相土而遠集兮今莫命其所是歲忽忽以將壯兮猶不得乎為理序既秋余懷悲兮恐魂委於霜露荆枳葺以為衣兮江蘼棄之中路曼長夜之悠悠兮雖遺之不顧時有閨而能章兮道無明而不汚廓渺渺以焉

止兮今亦不知荃之心解洪波之繫纜兮吾下上乎浮沈處與立而相疑兮傷白日之就陰羌羽翔則鱗游兮怪言從之不獲聞省想而莫通兮執捨此而求索路杳杳以儵儵兮登高臨下余焉度倡曰幽巖高兮多冷風幽谿深兮多靈雨靈不來兮虎豹怒霜雪紛兮寡寧土願從之兮天羌高天羌高兮不得下亂曰金石尤剛時毀泐兮列宿錯耀時昏蝕兮河之懸懸時以提兮晦不得彰明不得息兮鴻之嗷嗷來者弋兮或以不鳴貽乃賊兮雉華以羅鳳見德兮不怠厥儀不以時忒兮往矣莫追來有極兮不為世憐為世式兮

聞雷賦

洪思曰此必辛未六月子以救梁輔能錫調官苦賜抱病上疏乞休未下時之所作也蓋周亦崇將何言延儒也錢輔之獄起於史豎而延儒亦稍解且言吾當一日德惠上前而生之故是

梁王新藝奇卉於合蘇之園根葉未抽雨澤不下自二月至於六月小暑將降厥夕乃雷其為雷也殷殷庭庭在梁山之陽王疑其不暢意有沛澤當與百艸共之乃命枚叔吾丘先生為之賦枚叔曰唯吾王之游豫陶芳澤於嘉卉睹作解之夷猶歷春夏而憔悴拳擲壁之孔艱顧桔槔曰不惠挽白渠而已遠悼西成之不濟非無瓊玕莫植自天非無珊瑚不莖自淵包煩壤之焚緼庭吾生之倒懸警禁汗而不發呼醇醪曰激之

醜鞠芎與鬱金引豐隆而食之厥有微聲聞於垣端若暝若眩將號將譁彼野人之疎曠賦何縣之幽鼓願
太卜而占之知雷夢之初寤屬吾王之喜色告嘉卉曰惠心謝乃公之雍容何金玉乎爾音枚叔成王錫之
雲雷之爵吾丘先生曰臣亦有賦爲王奏之爾何雷者陰陰依依鄭政曰依依諸本皆作隨隨非股股之
師曠云雷初起其鳴格格洞吾王之聲穀竊吾王之膏雨爾何雷者唯唯諸諸竊吾王之膏雨洞吾王之聲
雄雷也其鳴依依唯雷也穀麥薪既枯游龍既凋天步多艱雷車乃驕東鄰擊缶西鄰瀝釜爾來已遲勃率誰語但遲來之猶可知遂
往之愁苦纖雨牽兮霏霏虹游兮不歸橡栗生兮山果肥王孫爭兮是與非嗟枚叔之多材獨持王之金
魯於是鄒陽喟然而進曰臣非雷何以知雷之遲速一至於此也臣聞雷者發於地脈形似肺石藏於天府
聲似鱗鼓虞水因之啓疆東山因之破新胡一旦而輕發齊春夏而乃泱美藻舒兮澤未竭玉髓枯兮石未
裂惠終風兮來何早瞻雲漢兮誰憂擣洵商霖之彌望胡興歎於蒼草枚臯中坐揚鱗而欲有言王曰爾讓
叔乎何昔敏而今鈍也臯曰歎天道之語默或多躁而寡吉惟精幹之審固乃先爽而后得彼雄舉之揚厲
固不如雌鳴之括實遲草木之瞻注信天心之寥郭庶霏然之有章慰臯臯之朝日幸吾王之不怒擊諸子
而太息王爲欣然陶陶終夕黃初四年時又苦陽應阮在於陳留王顧二子曰吾望解澤久矣昨日聞雷爾
念梁園之事乎阮瑀應聲而對曰觀雲門之始作蓋翕然之在麓肆成池之將奏若鳴雉之初响簪林鐘之
何轟發卻而遂語料洪音之必試雖晚暮而何懼抱土鼓之重遲積瓦缶而不訴但祈澤於當厄豈必笑而
屢顧歷盛夏其始奮故以渥於鴻露德躉奉鳩稱賀謂思王曰阮生之賦善矣曲終雅奏誰亂以大王之風
者王曰微吾子孰能之德躉起而賦詩詩曰隱其雷在南山之陽何斯來斯天一方翦拂朱鳥開炎霜滌除
火樹垂蘭房掀眸神女舒電光燭龍然鬢盤扶柔雀鏤寶窈窕銀牀爲雷推車排未央琪華承藩覆以芳妙

言漢思娛梁王薄怒不肯觀高唐何爲朝暮吟繞梁大王好樂斐文章小臣宿齋安敢荒一本有鄒國新詩

二句
洪思曰錢華亭之賦人皆曰以定地案故也而周延儒與潘仁實主之初蒙自兵部尚書梁廷棟廷棟未敢任御史方以內通諸帝自謂者遂任之即被糾劾尋以袁崇煥之獄有連廷棟爲成定海衛華亭初出獄意謂解而大者王坤亦無生運見華亭言泉上款時有可恨甚多卿等豈能盡知之語挽回殊費心力未幾體仁亦至華亭爲延儒語謝曰非公等力救何以得生體仁曰泉上原不甚怒也於是聞者皆憤延儒虛僞此聞雷賦所由作也

梁山錄山賦

洪思曰子以削諸歸海時之所作也先是子舟至留都便自做小舟以五十日遊盡黃山白以九華院臺匡廬諸勝既歸石養因念吾都梁山二山一百三十五峯之奇皆過於九華黃山在外不求人真知吾人亦少有知者子獨愛其蕭然人

壬申五月泛鍾山東下買舟沂江而西出貴池捫九華之巔既歸八月再出焉聊度筑嶺入黃山九華以青蓮得名黃山託軒轅騰譽其山皆嶙峋率律萬仞不及羽客縹流鬼營烏集九華自南天臺而下黃山自溫泉而上杖履瓢笠蠅蟻不絕其哲人逸士亦多覽覽折龜而從之游雖其久近殊顯而爲衆所攀附稽禮一也予重蘭經涉既數十日坐臥雲海栖遲蓮萼髮髯夢寐思其儔匹吾漳浦之南二十餘里有都梁之山絡繹峻削亦數千仞其洞壑巖瀑皆高峭遐邇其峯有蓮花香爐紫雲金光爵目瑞屏齊帝葛仙隼立鳥翔九十有九一一與九華相似或有過之無不及者漳浦之西九十餘里有天錄之山飛韻攬睨亦可萬仞鈎梯懸絕猿鳥四時騰空逕度其巖廊峻嵌或數千步皆在山脊如束腰帛其垂瀑飄注或數百尺皆自山肉而下如作響結其峯有師子文殊玉女靈通鸞嘴白塔積石天池龍潭鸞舉三十有六一一與黃山相似或

有過焉無不及者然以僻在遐荒舟車阻脩瓢鼓限於瀟津冠蓋迴於雁翼徒爲樵夫牧子驚顧動色雖在
鄉邑之內無復知之者故德無崇卑通途者貴聲無奄達習耳者佳苟託處之離羣宜脩名之不立苟清明
之在躬雖遞世其何聞乎下阪鄙士適有欲賦梁鋒二山者因爲賦之詞曰
維南極之融爍精魄離於瀟海籟下土使輔予得茂駿之所在曰彼漳之陽服有二峨之絕峙字都梁與天
鋒排蒼昊而拔地盤鱗鬣於迴壑齶舌吐於千里蹇萃吼以駟騶不自棄其荒陋疑蓬古之儼匠挾舟載而
下究出章亥之遺武遂選駕於遠驟扶輿既有此清淑乃仍儻而自匿悟居遠之終泰聊避囂於遐僻服烝
母以凝顙牧幽睚而納日藐一世之圖貌耿獨照其脩姱天下既不吾知吾亦甯然喪其天下顧崆峒之既
遠睽女几與終日師隗茨而不足分陽首之匪匹攀太姥以連卷曰予鄰而求親慢亭脩其璫簪實未免乎
鄉人信予羽之高駝鼉以降乎北渚靚黃山與九華霍予遺乎夙晤園牝嬉其孿子何二丘之似女九華既
妹於都梁黃山又弟於天鋒呼鸞鶴之成羣盡從媵以魚龍停湖海之盈沼錯更置此僻怪樹鯤鵬之翹翠
何所別其內外徒以地判隆窪八分高劣附邇者以多助徵聲處遠者以無交危絕曜光蔽虧風雲遂私天
鋒旣擱其首都梁又斂其蛾眉看幽秋深豹嘯猿悲玉女之清臚獨眺洛妃之薄怒自持翩然不可期胡然
我念之嗚呼道得時者駕時失地者謝膚寸合於泰山霜雪栖於姑夜鐵勒有阻冰之蛆日南有長然之松
象以馴而庭中兜以闢而曠野嘗何爲乎綺園慶何爲乎狼藉諒物之葦置固高高而天下彼二峨之何知
乃屹然而遠矚夜因假寐見二丈夫偉然告曰鳥旆魚肝何隆何窪鶴脩鳧短何近何遠孺枝自繆霞液何
周日華何私日蔽何虧傍衡之核希收邇郊之禾多求采散於練門金氣銷於吳丘乃若七澤之多迷人二
陵之繁風雨荆山之饒熏艾綿田之多灰土皆貌近於爲教乃形似乎陽虎繼招之而不往將磨之以何去

洞庭賦

吾誠不能分鏡於愚公假道於蜀主因翻於次仲借車於尼父故復塊然共守其處

洪思曰壬申八月以歸南時之所作也予一出都門志在名山東南與區游放殆盡謂門
人曰何爾杖屨遂包斗牛之美先自孔林孟林而下次及黃山白嶽五老九子乃還慈大滌與門
人講乘歸雲之洞始後西浮洞庭望縹緲之巔俯仰浩然絜有樂乎此者雖自謂勞人棄子
下已不復知身世問猶有編旅婦弋之事及歸津海謂門人曰吾旣放浪南歸值徐霞客買舟西浮
洞庭探林屋登縹緲峯有詩數十章旣浮沈不復可問
同存此篇因偶會卷中後之覽者亦將有感於斯文

既凍秋矣胡不歸乎爾乃舍滄海之萬頃就具區之一笠譬龍足之卷蹕就鮒尾而喋喙於以陶汰萬有盪
寫伊鬱俯散塵淖仰視日月悟滄者之皆定知危者之皆安信歸轍以同觀雖河海其何間乎若迺天假逸
資人借勝具進無滯曳之規退無羈縻之慮波臣勉其遐思風旌導其徑趣龍魚安棲篙艣試事來往惠然
如縱坂驥此亦造物所償於勞人真宰所飭其棄子也方夫處暑云徂涼颺已發鷓首西傾忽聞薰風甫解
香山之原遂凌蠅嶺之江及於日暮風迴舟鄰備戒葦縱菱橫舴艋沛予已繫纜石柱從容安寐出破塚
而不知入呂梁以何怪旣焉宵興風息疊帆復懸舟繼迅轡人忘長年消夏之灣已過元陽之洞在焉乃復
攔板渡渚引纜通阡還探靈威之穴嶂疑宛委之編訪毛公之廢壇意劉根而未然嗚呼如圖經所談林屋
尙矣以爲通好岱嵩巷遇王霍曾一邱之未成何衆美之能度夫當楚莊之世不迸句吳洞庭之書尙連禹
穴而好奇者以爲青簡之別都仲尼所寤說豈不過哉故山有瓊迹則異物來歸士有幽光則孺名胥附以
彼外負阻深中包腴腋倚霸勝之餘風資儻愴之末說以遠射蓬瀛近覩嶽瀆使希至者駭其鮮聞經涉者
寶其舊服則亦宜矣是以竊古蹟俗海張帆不視圩岸閱談多所怪歎羨生於所不足歎生於所不見以
所不足而羨縹緲以所不見而歎刀布達者猶然而况於寡陋之侶乎嗚呼自之眾而南塌石而西番禹而

東洱海而北予足迹所不至則亦多矣要於洪濤奔嘯蛟蜃徒宮出沒象緯開眸盪胸自予所習翫則固有十倍於此者也而予固樂此者予樂夫百尺之波十里之山朝暮之風晨夕之澗幽人所棲漁父所理得其道足以長生不得其道不足以稿死得而生不必安期之棗美門之李不得而死不必丹室之艸鳴琴之市嗚呼如使林屋復開龍蛇傳餐上觀夔極下覽房闌左揖富商右莊峨冠雁行而前羊裔而還能有一人得太古長年之道者乎即復不然別鑿包山左通會稽右綿瀟湘別將男女具芝朮種餌其中央能有一人得太古長年之道者乎夫既不能則是林屋雖湮宛委雖滅東無差子之靈西無莊子之烈猶足以想晤禹德樂死無極也故夫志廓者不滯於舊聞見多者少怪於新趣諒岸谷之恒遷省枕漱之未誤若夫林屋以西碧嵯含風削困成團壁勢如弄復有石匠天仇破骨出窟補洞成庭撐顛得腦泊夫石弄而北溟多魚齒宛轉嵯峨沓合湖水遶魚所穿環牙壁理大者摩嵯瘳鶴小者游蟬側鯉固水石之恒觀不足御夫君子惟有日出波平煙銷颿輕登縹渺之絕巔涵赤澤於太清指三江於歸墟瀉五湖之未平更隨月吐假檻東山瞬息揚帆復通胥關於斯時也不知身有羈旅之賤世有增弋之艱張季鷹之尊鱸乍熟梁伯鸞之杵臼初聞淵岳已平函奧又寬破滯銷憂不知其端爲之歌曰湖水滿兮潮水深江月生兮滄海陰朝晞髮兮夕抽簪浩然同觀兮何傷乎予心

平一賦

洪思曰予在桐林時作素宗初東歸後賦西禮水西商州安者二賦皆口悉平

列風舉而螟蟻枯黃星曙而鋒距息望人有道截清波伏以理接之不其然乎方顯皇之初戰天下多賴命誠三出薄震四屆豐巨稽首誓膝問外迨於末年澤廣膏深柯稠灌密屬甲斲於鯉魚蕭斧依於雲室天下

熙熙雕衣饌食匪茹之民日步作之而忘帝德東西

靈趨見戒雖懷腐而就施亦忘戰之害也觀夫董

虺既殪杲兕再發科勺之檻已送仰暹之魂重奪酌醴而注猩唇恐蕭而蕪髮於斯時也先丁三日顯皇

方升蓋甫在旒冕之齡也維貽謀之夙張故赫怒而可繼肆於我皇懲恙用典殷憂乃啓思武丁之潛發感

千羊之未替灑埽戒別克詰揚厲厲虞張目而威契猶編離動翻以鼓鷹鷲招搖所歸雷竦電掣敗者爲之

驟奮眇者爲之擊眦東試而徐賊殲西試而水蘭燈洪思曰水蘭謂水西安邦蟲落之首聯於續珠防風之

脛結於象齒髓腦余吾之勢炙口成炊盾鼻崖顛之文逢足而是天子曰嗚呼此其小小者烏足以媿我皇

祖之事乎昔我皇祖沈幾睿照武無臣而不勝文無微而得貌仁涵日斧之威義滿月弧之數問寺之

駟糞其黃金束帶之儒樂其白豹動則祗席行師居則旨酒長道是以雲無礙車風稀筆築圖列九五星陳

四七不勞組纓而海西送逆大咤則小叱則既又十年英風益上嶽頓五指海平一掌

甫鼓而清靈川再鼓而匡平壤接轂而還棹則陳精不缺於倉流水不絕其鑿於都赫

哉維二祖之威靈故假溢而遐暢囑師武之不力乃東顧而多讓於斯時也播灌充庭迪爽溢署人筮賢龜

家籌七箸醫巫閻之殺氣將蘇之何慮大司馬若念虎螭不懋熊羆逸制則或告以簡士致日

立表譙誓三千之試方叔二廣之掖楚子越踐臨期而三汰其卒魯起焚扣而再致其死大司農若念轉輸

不繼泉貨澆渴則或告以營屯因地徵草就水公劉以三單徹田元老以菑畚采芭棗杜之謀臧霸世充國

之言熟人耳黃扉之內若念鼎不易舉材不再借既禮樂之未遑何樽俎之多暇則或告以南仲之城朔方

吉甫之歸自鎬周且踰嶺石之山召爽界盧龍之道異弩之驅羣羊雄風而噓塵壅我皇上憑軾而聽之以

爲洵如是吾可謝拊髀之憂受求寧之報也於園平冬十月草枯霜結木弧折於嚴颯馬酪渣於積雪誇畫

龜文帳飛綿葭山白義厲之魂海青 之血 爾 將斂樺皮灼羊骨搗雞兀反覓髓延頸靡耳樂聚於巢穴之下蓋亦恫於我武將暫徙而避野七萃之士日射意跨坐舞不禁呼勇欲買以爲是鸞翰之林可投炬而赭也然且天子愀然思肅慎之誰庭諮有苗之曷格既同德而均施何豚魚之異責爾詩書所陳固得無長者而稱之乎於是元宰獻臣格人碩輔或誦江漢纓常武咏雨雪之風按六月之譜合進而隲曰夫古之繩武躋聖揚休有光者豈必棘信宿之烈哉蚩尤鬼方之師亦或三四年矣所貴於治天下者明刑而刑不干明賞而賞不僭禁削炎帝之桐城佩秦昭之劍醜區中以流和總八荒而恫念非獨遺禽之失不誠於前亦龍蛇之奮時圖其漸也昔者倍堯養辜而貽帝舜文命繼澤以試困征漢文大畜而詒景武景武勛力以燕元成雖惠敏之殊致各因時而同紀豈謂前積者功收於善藏嗣振者德口於後競乎故夫聞竿而思聚者鳩民之屬也鑿門而陷凶者從戎之督也反身而脩文者主相之服也鵠民而聚聚不疑故有兩造之縣入金矢十家之戶賦鼓粟從戎而凶凶不悞故有顛頡之項借以威曼子之頭報以福主相而脩文文不胸故有霸王登類於勝人上變捧心於伐國信三事之分趨良何苦於越畔苟外憂之未除又何果於殄愠今方皇靈旁敷天降無艾師錫駢蕃多士克配宵衣之哀鴻雁葆旅之獨狙獐老成焦思弼謨於內樞輔枯髯囊略於外丙魏合謀於丹宮楊僕潑刺於下瀨辛趙分奏於金城韓李明徵於遠塞况又 山 髦頭星渺貂瞰屍而垂盡金易粒而絕少 之才既竭 之部欲撓扇頰未以故斷絲發號猿而臨驚鳥故漏傳之鋒可以不削而月支之 可以坐蹠也天子維曰都哉允塞克壯其是之謂乎吾今乃知七旬三年之異效而同質也於是園昊感禋神物游錫白狼去而銜鈎園菟來而貢識廟郤渥注之歌丈翻海宴之譯蓋不踰年而西賊殪 服戶咸自在城皆安樂退劉之頌與太平之舞作重爲歌曰天甲昭旋明堂開

兮義取殷中燁何來兮巨骨長顧揚以灰兮尺咫之磐焉足材兮後夫達凶天所播兮臬羹無音不可懷兮
虬虎仍執殲渠魁兮爾亦吾民無所猜兮宇宙靈清絕纖埃兮皇帝功高尚懋哉兮

黃漳浦集卷三十七

詩

四言古詩

丁玉明者古之有道也歐溪陳靚夫凝甫二兄弟皆從之游沒身不衰今其子弟猶守敦篤有二生之風聊爲識數言歸之勿謂好學從師者之皆無用也

昔維元晦引掖安卿暨於子充實歎林子剩夫之起子然無徒謂我有漳邈惟三士斯道不墜在丁玉明誰信從者歐溪陳生厥有昆季靚夫凝甫皆本醇德闇然服古不求聞達不慕浮榮服勞從師萬里於征大雅既衰問學道喪誰以韋布而敦德種譬之農夫惟藝黍稷是耔是耘是寢是食惟其敦朴物莫之奪內本靜專不撼其末我稽古人亦寡與儔愛敬知能厥惟蒙求少則云然壯老則不惟此孩心鬱若終古以眎仁義猶桴與鼓動之曰誠應之曰信非誠與信同室莫應我觀陳生乃思丁君行脩於鄉而應於國衆不媿朋私不媿獨宜爾後人續其初服

甲申端午後四日張觀淵中丞既平漳寇班師過訪鄴山與諸子餞道於東江之渚爰集詩歌先爲引端凡五篇 叙別載

七建之山嶺崇宵深沼德自天民生孽心 於皇張公鎮以靜默細刃鉅斤不缺不折 匪曰平之曰知厥情絕本反原使孽不興 雖有龍蛇共慕其血雖有贊虎共顧其穴 去顧去慕民乃安作潛淵拔地不改其度 用如不疑功如不居禹鼎倕鐘泚以詩書 矛弧是仗芻蕘是採亦矢文德乃儕儻海 漳山既平漳海既清綏以畫干而依磐聲 溫衽義俎以保有室道津禮液而洗斧鑕 四方眎茲亦曰懋哉天子命

公獲所樹哉微我張公雖有甲兵又曷怙哉

右十章一章至九章章四句末章七句

師武桓桓曰表江漢乃秉七德以戡斯亂維我張公文武是憲淵塞厥心器與道貫 念茲海隅亦服鄒魯
有蠢不知如犢觸乳卷簾而嘯投竿曰舞帝軫不除俾受公度 公順長道以御雄略驕服膠不掣楸狸
首之來成辭其穴 公曰念哉天吏逸德勿爲猛火以燼玉石巨慙既得皆安厥室人人慮廬子子翼翼
維公之來甫及三旬維公之歸夏初受春鷹鳩俱化醜醜皆醇田疇孔脩畔路是遵 公既飲至不留不處
整如嚴君暇若處女曰將帥力曰神明與我則何功而惠此土 帝曰能哉相我羣工莫如爾諸居圉且荒
匪天降災爾有風力則吹塵垢彼尸素者如食斯餽 何以錫公有馬有車園袞介圭赤誥金書雖有茲錫
公殊未喜曰彼四海未有圖止 安得皇途既平且康蠹賊不生八蜡永臧公立帝庭扶中植央乃矢岡梧
以鏘鳳凰

右九章一章二章章八句三章六句四章五章六章章八句七章九句八章九章八句

倬此禹甸是秉文教覽譽不消其末迺掉稂莠不鋤嘉禾曷蘇雖有油雲委之泥塗 維我南服豈曰荆楚
蛇虺相師遂啓厥侮屢屢招匪類乃驕畜豺牧羊其豎不遙 粵維張公實壯我鎗拔本塞源以贊於鑠
順命者扶千命者誅無縱詭隨以恩驚愚 顧彼飛鴉安有好音烹蛇禦風不恬於心取民鑽草尙曰無赦
豈有養魅以司宵夜 炮然之羣用死博活公曰弋之取彼在穴一夫伏鑽千室鳴絃若彼羸生蒲不敢輒
以公之憲式我邦國萬羊億犉孤童子牧世道將興則維憲方况爲長師以奠吉疆 四馬之駸六轡如
琴剛柔載調以敷德音奇功茂績則世亦有大人載道澹若元酒 漳江之濱而無彼姝炮膾膾香薄於菹

菹遣公千言以雅以頌視彼來茲吉甫張仲所不敢云六月出車薄伐四方以匡王居

右八章章八句末章十二句

光天喁喁則維遠海馬童騰蹕以震方外帝曰靈之則維重臣帷幄之謀而消甲兵 無曰悍馬亦顧厥御
毋曰盤節則視彼錄我有山子亦走萬里我有素虬亦蹈海水 爾往駕之勿隨勿追爾往象之以和以威
四野將逃勿駭以鼓去厥害羣乃獲我馬 靜烝遂心維公則能碩畫遠猶不違其經營彼第種有相之道
不以嘉穀畀於豐草 漁梁之山九仙之谿翠旄采旌而蘇貞妻降於漳江以居梁麓友鼻辨髮無思不服
顧彼佻夫戮力於原載檢攻駒則操其端亦有罄控亦有縱送二八之蹄乃悉其用 車至徹微無堅不
播蘭表稻畦成行轟轟工安其肆民安其畔南仲召虎則循其貫 燕喜勞還乃及旬朔膚敏之功爲今古
獨鴻鴈嗷嗷曰歸其家籩豆壺觴而揚斧柯江東諸賢有孝有德實頌清風以鏤金石皇路將夷爰聞是詩
登於九天勒爲穿碑

右九章章八句

文德維和武德維斷和斷之繩則維彼岸遼陽隕師曰維不和楚豫潰離曰維不斷顧此四海茫無其畔
世有哲人必灼厥因相彼病原而痛乃身不尸厥功不違厥馬乃從蟻水而獲其野脩文德來繫長道順非
獨標治亦曰本論 君子明功先廣厥心鐘籥在宮外聞其音戰勝在堂豈必臨戎 安于之喑矇憤不下
尹鐸之邑蛙魚所厠或峻或平廣德所經佻佻躑梁安知其型 鑿彼四方先悟厥敗碩人容容良士蹶蹶
亂生微圖病加少愈實有毛倫衆莫克舉 高位易尊高功易驕廉閭區區猶知本標嗟彼世人舉鼎絕膺
益錦以石蓋非其任 楚豫既喪乃昇秦晉猶曰標治異於本論哲人實聽勿輕鄙夫亦有翳桑以扶輿樞

芻蕘禮樂而佐上聖喪亂宏多則靡有定楊葉百發其的不競 載聞載收如雨農功寂然體虛乃與天通
勿謂道謀不足與同

右八章一章十句二章十二句三章六句四章五章六章八句七章十二句八章六句

絲求逸致共在農山正叔老儒樂觀垓下雖穆如之詠多慙而點爾之懷不絕如使世道休明尚從干羽
以誦歸昌即令黎庶粗安亦脩鑿耕而忘帝力彤弓鐘鼓瞻言一朝珥筆興詩邈焉千古歎夾谷之難從
愁率野其何極式歌且舞我德伊何載寢載興公歸未遠既發綿蠻之音爰終驪駒之典令帳下歌兒能
勝鐵綽板者奏此大江東足資撫掌云爾

五言古詩

庚辰五月二十三日辭墓就遠時緹騎尙在南昌中夜出門諸友環顧不及爲別匍匐至水口揮手
謝同人惘然有作

買屨一出門灑血已萬里六月踐青霜千春沸楚水誓墓若已還懷湘母乃始大海欲枯孤棹安得理明
時離齊誅到入巢許耳衡泌無安栖岱華鑿虎齒冰鐵徑寸心灰湯百部史臣罪如傾河當於何者起親朋
但道古引涕便不是危途心所經難負久自矢幸不當二人千勿語妻子

適中驛道別某某并諸同學二章

道人不決皆達者不揮淚懸崖千仞巔撒手得所貴生平少屏語臨難乃自遂疾雷破孤峰要非物所碎親
亦不受憐怨亦不得媿虎穴曾高眠龍拏豈得避但非徑寸珠炤影中如醉
日月有蔽虧風霆何所私明明一寸弦不爲晦朔移白手鍊黃金要當有試之桂火燒崑岡未變貞瓊姿所

惜廿年前不早事未餓女子一許人膚髮非親遺取水當就烹析薪當就炊幸爾諸親鄰知吾耕織時

南昌江中別某某及姪止子

去矣勿復道寶劍雖不快猶及割蔓草去矣勿復云燮火播孤松何必牽芳蕩男兒各自愛扶檣上漏舟決
非力所至男兒各自謀爲善母近名近名生百憂去矣且分手千年一瞬間石泐金方朽去矣且勿遲驥驥
脫血胎安肯陰鳴悲爲謝諸倪髦當何相見期

以六月乙丑聞遠以戊辰別諸子前十日庚申爲先慈諱日

傷足猶未癒到手又重及冰鐵播肝腸安能不泗泣壯年寶慈訓風濤度桂楫濡柳十五載遂爲衝瀆入杖
痕不可捫指痛安得戢前月夢慈顏皺眉屢於呂孳持忽杳然攬被涕猶濕人非剖腹生誰肯赴其急已老
白頭烏復念斷乳汁感慨古甲兵一坐爲十立安得還墓前風雷共呼喚

十三日癸亥爲家兄誕辰時家兄七十有二淵姪在予舟中

遠嶼集桑鴻志不在稻梁喋啜蘆葦間游泳日月光飛繳從何來四翼分蒼黃豈不樂徘徊收翻心心已傷
宛頸相顧鳴湖海爲悱涼憶昔親在時四哇少遺德吾兄日拮握手口俱憔悴息肩能幾何風雲又顛沛經
時變髮髮枯眸老涕淚世間諸歡盤到我輒破碎周盧數松竹動影如夜魅馴兔亦已散慈鹿亦已瘁諒非
兄所居家人各懷畏倫可留餘年開尊定殊慰

已別諸老而彭達生欲送予維揚辭之不得

此酒不可勸此機不可擊大風吹緒圻一夜化嶮石從行六七人各已掃去跡病鳥無勁枝毒雲無健翼區
區碧血心恐非世所識季布重新交魏舒喜疇昔才與道難兼名嘗與命敵樂鹿好仙羣故爲豺虎得况已

負矢奔跂足何顧惜青天團曠野亦欲省矧七刻卻衡與華即爲平界尺擲斧割危樹吾何愛腰脊生平禮
孤影一旦破絕壁大鳥夾青蠅要未謝弔客感君骨月交凝睇乃脈脈

再示同學二章

吾聞諸夫子仁人無死地呂梁蹈輪波焦原出炤熾當其剛足時與衽席何異苟復知忠信即有水火意兩
者比疑間焚湧不可避古賢治精神皮膜非所治膿血得金腥味骨得玉氣所有諸灰礫烹鍊了一致龍比
生陶唐禹契落二季膚體各不尊毛跋安足貴况彼溝中瘠輾轉欲羹沸而我委紳佩如鳥與獸跡上乃愧
魏闕俯乃愧苦次引艾坐醫門剖肝爲納計徑寸獲所安千載謝吾事飲水觀浮雲採薪贈當世難易心自
知不在隱與吏衰鳳未易毛傷磨不綴轡區區蹄羈間日月爲決皆倫逢尼山人爲雪尼山淚

疾雷破寒山凍手裂鳴琴俯顧床頭雖風雨無殊音人生非松舟奚忍自浮沉中田一號涕象鳥知其心澤
畔行哀歌魚龍爲悲吟豈不樂南薰優游披素襟乳血在君親霜露不敢侵悠悠行路人安足相追尋澗水
亦已泓入海方知深泰山爲物宗非直有危岑神明集眉端百鬼伺其陰臣子無他能微誠聊自任遂志爲
骨山委命爲肉林總此未墜生呱啼亦古今箕文垂福祿後死其縫衽穹途結細績北極通磁鍼豈必呼市
師爲牽覆足喪行矣加飯餐此道未髡蓬空言撐天地星斗何蕭森遠爲萬里鄰近爲數尺泮形景雖參差
夢寐猶能誌慎勿辜鱗鴻寸楮千黃金

偶有屬賦知已動色以爲非宜復作此謝之可謂場羹止沸矣

貞父謝文綺不復造桑下豈不念鴛鴦久離舍貞婦甘葛絺不復思屬纊豈不念霜寒溫煦非所尚漆
室諸姑姊纂組皆餓神欸勉分素絲手持心不親黃鳥啼我前峽蝶繞我鄰掬水爲朝餐鋤麻爲暮薪姑姊

惠一簞一簞十拱壁此意豈不嘉孤身與誰適解衣覆薄帷宛見諸繡鶴亦有羣鴛鴦掩涕思舊服我棗傷
故園斷機觸前緒共此幽人心抑鬱安得語東家少女兒十五爲姑嫜襁褓畫飛龍珠翠填下裳西家宿留
姑五十爲少婦繁華白鬢間翔蜂不忍去姑姊勿復云限牆恐有耳採花莫採刺炤鏡莫照水東西牆頭烏
長嘴舍利齒寒莫從狐栖飢莫從雀徙病莫從蛇醫苦莫從薺理有命縣在天誰敢信吾是

哭魏倩石

崇禎十四年辛巳六月望日己未前翰林院庶吉士改兵科給事中以直言降補光祿署丞倩石魏
老先生卒於京師一時名賢哀號動道而道周獨以曩臣羈繫請室不能身贖踊擗莫聞嗚呼傷哉
自去歲五月道周聞驟徵捧檄辭墓中夜就道公乘單車下至廬墓執兒子手揮別草屨又走二百
里及於水頭告誡諸朋友僮僕凝涕遠望凡四晝夜目不交睫手不輟筆者公也而公今安往乎公
既傷僕就逮形影自弔子然塊處無嚙昔朋從之援又以生值明時荷覆蓋之恩不敢自爲敝屣蹙
躄入都冀一旦得推鹿車與杜伯山同誼而竟以憂傷忽然蚤去嗚呼痛哉天下之可以死可以朝
夕死而猶未敢即死者獨黃道周耳以公之才掌華蹠河支厦鎮藁樹百世之業包帶絡王與召畢
永年何所不可而顛覆明時與賂賓王齊齒又抑鬱不得爲天下所嘆嗚呼傷哉天耶人耶道周既
不與哭泣之列又義無爲位之處僅與諸僮僕撫心幽慟猶恐爲扞擻所窺乃裂素旆附以長言倫
九京之傍未必辟咤或有肝蠶致其悽愴也

麟數何已奇鳳竟得巨創况此龍蛇年渴爲真宰用岱華自觸膚斲面目相向鄭僑傷尼翁祁老動叔向人
道既蕭索風雨失悲壯皓霜下六月迸破青雲障疾雷摧孤山亦喪達者鬱古人豈不死要不蹈肯妄錢彭

信履德達比亦危唱遠瑗雖暮年齟史何所讓俛仰宇宙間如一鬼食帳龍鮓不再飽馬肝亦一餉唯有仁與孝可爲淡醢醬夫子本慈衛進退得義尙當其意所赴樂葛豈足抗朋射知舒長窺井邈袁量淺水無巨舟泮波忽已蕩世岸方圻頽衣柳安所放豈獨附螿者啓口無適仗塲師盡天下所泣爲郢匠鮑叔既已亡管隰坐彫喪釣孰與爲綸狩孰與爲餓飢孰與爲餐寒孰與爲曠萬一我遽死又誰收我葬帝子皆精誠九巫悉虛誑魚茅屬莽草筮與固不諒已洗青蠅羽足禁大鳥吭旦夕行赤霄莫作白虎况鬼神多嫉妬魂魄易蕩漾千古敬靜丹九閭膚敏狀文孔諒猶在冠劍亦闕闊步趨未傾灰履視何不曠微言排天紛眇語解帝障倘有不適意雲絲足下上吹塵見城郭驚御自跌宕憫此溝瘠人抉彼譏讒塊舊交有張理顏蘭亦航麟榮瘁共寶惜明滅各條暢膚髮對尊罍兩啓幸無恙卷淚謝牛醫逍遙約雲將生死信何別寤夢遂曩臯浮沉在岸谷形影隔芒碭所有諸詩書兒曹久標獎親鄰失縛節槩不入元瓶萬里射駒隙累割神逾王白月東隱開青潮荻港漲誦有鄉人碑記有柱下藏飛鶴來島間孤雲與之迸杳然若收涕欲挽未得當生當從婦謀日夕就函丈死當從親依綢繆祝嘉貺生死未可期恍惚此惆悵

宋子建兄弟過訪大滌山時何義兆攜姚有僕朱康流往觀樓真子建據梧獨觀康流所著三易漫成數行

靜者喜專居遊神滌百籍當其意所都十城堅雙壁文字既易窮神理何所宅遠示諸丘索恍惚龍馬跡不知羲星前何必表金石周問亶聰明鑽仰無所得當其廢餐寢必不爲雙績多識關姓名多畜關道德兩義既差池何爲圖前畫緬想回賜間跋足但太息

宋尙木過訪

宋尙木過訪大滌山攜經濟文編四百餘卷日繙其目不復能竟也信宿欲別草草書此謝之

大滌既東注龍蛇享鐘鼓星漢浸其波日月爲歌舞七朝諸名賢吐辭如芳社委蛇及千年著華又布濩吾友夏陳間稽古卓自樹同游六七人各復奮高步閱覽包淵山脩詞恥章句盛明五百輩一一與之遇蘭芷生衣裳煙霞出毫素雖有千鼎鐘不爲易所慕幽薊尙弓馬當塗寶執綉區區諸子心俛仰傷叔暮彌縫欲其淳繫馬安足顧

戴初士爲予樓遲江左草草書此勸棹西還并慰諸知我

憶與諸名賢乘風過樵舍危帆不相接揮涕白日下鳶鷂銜魚蝦對面相顧詫匡雲不敢留鐘岳亦惟卸洪濤變陸海蒼茫動晝夜吾生等毛髮名義安可借所慮諸名賢鬼域坐彈射愛憎友親戚水火避掌蹠所賴天精靈胡尾未狼藉鼓棹歸大江岸谷猶如昨寄語親交知勿復重畏怕

贈呂漢憲

人才不易得似爾何清深見爾大滌山微言滌我襟斯道未全彰遺緒猶可尋語孟垂日星虎兕安敢侵清明苟在躬雲霧爲破陰洪濤簸天地北斗無浮沉顧影行空山鬼神何蕭森取君明月珠投我滄海金一言鳴素丹賢於千鳴琴聃耳明人形僑札明人心抽橘各芬芳非慕衆所欽墜雲爲德波落葉成道林努力事清時莫如我不任

錢聖月世兄清切屢見於詞用韻言謝

韻士今不少君獨稱善鳴揚芳出眞烈振筆生華英璇海流珠波其源浩以清纂組不足爲雕蟲古所輕觀彼朝槿花薄脆如春冰何況從少年俛仰弄浮榮古道雖孤危百折非所驚衆詠習風濤猶不沒堅城三代

有緇衣好尙何其貞感君投雅言抑才陶至情

答郭彥深用原韻

世道少法拂他山託寇虜下士無遠猷中夜心自撫古人重移楹舉酒自勸柱積血不忍瀉往往侵臙腑雪
窖成焦原繫狙爲雕虎豈有大蘇車可想螳臂斧尤悔生所招感慨徒懷古賈賦與楊辭鹿鹿投湘濬賈生
毋乃躁揚雲失舍吐吾道本居簡亦藉世知阻太行不可移龍門安敢怒已掛神虎冠即與市門伍濯足謝
江神洗眼望二祖補浴豈人功扶持還泰宇衆鳥翔朝風亦爲義駕屨屨齒與杖頭各自勉支柱名教依介
立軒裳等鴻羽車航既破裂定非繩所直油雲一線生膏澤萬里普此消視良朋努力事明主

壬午七夕題於三宿巖

懸崖不可涉琴響何凄清洪濤撼龍宮素虬爲哀鳴伊人暫相違兼葭白日生生非女與牛安能相偕行帝
子喜參商心昂離二京偶爾樓河傍可知非淫朋謫罰心所安難爲百世稱東公起泰岱金母巢華庚兩家
集帝庭未必傷和平阿閣樓羣鶴驚鷺餌瓊英大呼如鐘鏞小呼如簫笙一朝聞風雷巢鷗遂縱橫梧葉摧
頽岡蟋蟀爲弟兄鵬鳥嗟爾來墜隔中怔忡羽翼不得齊伯勞東西迎仰視雲漢間波浪何轟鏘爲橋諒已
難方舟無乃輕所恨諸襄章不得自颺賡錯處箕斗間貞良難爲名漿酒一簸揚龍脯味豺羹辛勤諸女兒
蛛絲終夜縈豈有結網羅而當帝子情勸爾停茶瓜一石與一松一瓢與一觥米汁歸齋宮翠篠環楸枰上
不爲列宿下不爲長城逢山一巾車逢水一葦柁問彼支機檢宛如枯草莖寄語諸星辰何必傷零丁篇中
有脫句

別節之兼慰諸友

牽舟出湖口南風正清發楚客欲沂江懸眼射帆末松陵忽已過咫尺吳門達梅尉不可求梁鸞亦超忽自
顧形影間汎汎成何物手持雪堂詩但爲嘆奇越英年已感慨吾老安足惜憶昔十年游胥濤兵衝突買舟
入包山坐探林屋窟相知三四人各已落白髮搖漾獨吾存又當弔賈屈黯然問精靈母乃喜勃窣節之貽
吾詩十章太清脫緬視十年前精華猶未竭灑筆睨古今鐘鼎如鵠掇慰我憤眠餐誨我善巾襪出入謝風
露晦息審明發古人感青蠅知我難屢揭幸有好同堂吟嘯相頡頏堅石久未磨蘭香老未沫放浪遺形骸
瞻眺留日月安知我所歡不復勝簪紱魑魅亦畏人山水亦護骨不作悲離聲不著窮愁筆不蹈辟支禪不
弄飛騰術蕭然寄天地風雨絡膠漆寄語諸先生勿爲吾愁疾

沈鄰秋追送語溪數行識別

宇宙既蒼黃相將唯名教斯道一以頹鐘鼎千不效瓦缶雖適意安可格清廟白日卻龍燭燐火遂騰叫管
晏百里才由商五毒料亦各當其時非爲不精妙吾偷信迂闊師孔失練要抱膝未安坐猿鳥墜悲嘯對面
落銀河化作泥與淖非無陋巷琴所乏市門調何不臥土室掬雪自相照幽居瀉石竺盤水澹清鈞出入攜
所親泝泳豈高邵有時買雜綵亦有薦草屨明發懷二人青春展危眺劍寫謝明公風濤贈野棹立言豈在
多龍德自隱矚此語非至人聞者鮮不笑安得夕復朝與君探道竅

涉江行寄諸舊識

涉江采芙蓉踰湘採蘭芷豈不畏魚龍所愛貽君子芙蓉未吐華蘭芷未抽英豈不畏江寒所愛清且盈江
湖既翻覆蘭芷傷寂寞美人行無家牽羅補茅屋桂楫改爲薪蘭舟買爲炊君子相捐唐野水漸車帷袖橘
雖芸芳化爲菴與齋覽鏡炤綠苔一日刊雙睂中年既如此薄暮安所依然香濤江神裳裳拜湘女蘭菊生

春秋天地變寒暑豈有齒莖身獨與淖泥語拔身謝七襄尺布猶當織瑩瑩白榆間黃姑舊相識下爲望君
山上爲支機石精誠石可穿風濤何太迫

郭正夫文宗構尊經閣詩以序之

照漢信在天經書尙比屋四海爲魯殿側壁動絲竹輓世尙權譎稗子散醇樸遂以申韓言強爲堯舜讀津
梁溷三豕搏觸競五鹿阡陌開儒坑椎埋覆公餽刀筆既可師孔顏安足錄哲人察其端喟然念明倣遺編
事直韋周鼓發逸璞譬彼開河山不敢後嶽瀆根源出藻茆餘實被百谷五曜循星榆字彗乃攸伏王者司
天彝康回守地軸不以罔象珠而泣鬼神粟不以妖鳥符而起龍蛇陸出道雖鼎沸吾學未掌覆豈有鱗鱗
皮遠慕蟠虎腹弓馬多健兒如噉屠狗肉俎豆一以羶箕壁爲陽蹴仲尼值戰祭自矢得勝福雖不躬膺懲
諒不至凶馭所以七聖人未肯渝尺幅敬簡師德心清明爲道目于城寄置兔長算坐帷幄吾鄉諸老儒頗
亦事追琢鄒魯五百年風采尙新沐一爲過者存後至各先覺聖明表六子引轂導正鵠此意非區區要使
羣醜服先生秉文秘遂與六子續以爾伯夷風煥爲多士勗非獨八州登允矣九閣獨

讀郭正夫集并觀校士有作一作贈宛在堂集

斯道失崑源文章少淵海騷雅雖薄技亦已湮其會詞林屢喪七鷲鷓雜粹縹緲隆萬不可追花輒漸蔚蒼水
子本英儁矯然發清嘅投稟爲典客離車未改佩龍變禮樂親岡梧雲物藹鳳羽貴孤鶩豈必逐鸕隊球圖
在東序斷不吐光恠辭館授職方巍峨重先輩相史挾慮兒恍惚見異代要以扶化柄不爲衆草穢日月自
中天星辰無面背巨秤出袖間雄風播海外約此元冥篇以作昭明輔藜火但一室若華乃四屆金箭收下
陳齊難集鈞帶異文盪古胸新響突地嶺鬱彼寶樹燈靈爲五雲蓋弟子三萬人一一躡珠琲陸昔諸同儕

奄然託縞料持踵坐曲室如搔經史疥出門無車帷側足見櫛櫛清晨須眉心白畫花粉噴高抱渾沌鏡竊
照疑殊態因之解臙角不復憶舊說纏綿千羽意凌蹕千秋旆噓氣蕩氛餘閃破曖曖陋矣馬蹄間錦漆
擁口袋以此际東觀何異鷓蓬艾諒有姬孔心各得鐘鼎在

三山林守一入萬松關有作見懷用韻和之

山州愛嘉客新意動軒翥每每欲拔地突出爲人助半壁絡羣峰江流不敢去豹隊方陸梁獅子忽頭踞神
人相咋喙乃稍就部署平疇三十里鷄犬寂皇遽風雲自一局不與戶外據白首遠行歸指顧辨其處橘柚
初締花香氣重撲絮裳度阡陌不復見深阻諒彼共沿前顧亦閉闕於遠事輟纏綿湛然發神慮鷄鳴榕
樹顛青海澗星曙幸有千里人抵此千春語

率爾別陳宣公

相別已廿載吾初無所得見龍素服膺祇在能靜默奮筆凌霞霜援碎敵國嚼齒飛于錦自知不得力聃耳
觀蒙俱能復有態色文章視雲根引藝掃晨夕至於性命間杳然失蒼碧楸梧亦我師鷓鴣爲我翼斷簡尋
伊臬無乃太逼側雪老使守關蒙莊爲狎客要於敬簡居確不爽尋尺此道何有哉於爾見遺則

送宣公道三山

宣公秉淳德冲遠平三淵讀書本經史探索窮蒼園退處虛無間達者不敢先似欲反才哲鼎俎於自然世
道貴脩脩扁跳爭輕優安得練要人與義軒前以指當闡揮正容如着鞭相去數十步星漢垂宮懸食當與
之游出當與之眠此理不可期筆舌徒熬煎何當爲塵塗漂鑠金石年
查毅齋將還錢塘寄懷其弟伊璜并示彥升康流諸友

屬地斷青虹垂天見投蜺龍乍失珠風雷動閉噎草味呼真靈猶未覩英傑令弟何慨慷嶺曲欲嗽鐵解
麾超謙旗以掃莽草血握別能幾時鱗羽俱橫絕鍾陵道路長老驥服跛鼈安得兩虬騰化為雙蜻蛉陸顧
多弟兄管隔相心舌白板獎王室藉茅起天園兒曹命鄧竇下走得樂葛顧盼三千里運於牛戶臬何當爲
醜鷄相對坐嗚咽

癸未三月十九日再至蓬萊峽歸舫借者呂而遠壇張最之鍾鎮樓璣魏心尙習江虞韓曷仲放曇追
遊有胡仲求諒侍坐有賦

刈蘭不刈足移山不移址九載昨離心今復集於此松廳湊鳥髮石影激人齒竦島憶舊琴驚濤尙夢底拾
級逾迴互轉擊或疑似中年百不支所藉一筇耳泰華久破碎嵩霍亦泥滓拳石躡肩背猶未失鄰里況有
諸丈人崑崙借孫子豹攫既我助龍拏復予起斑草享台雁殺饌薄女几便不翦茅竹可以倩堂祀雲泉無
新故春緡漫議擬豈有讀書窟瀾於公超市夷石尊妙方藝芝採逸理所貴各有得不爲精物使赤手搏崑
岑白汗走江水小結一榻脚遠勝五嶽時豺虎蕩乾坤魚龍散漢米安得千歲人琢此數尺壘洪澤未翻前
孟門未蹈始縱有神禹功不及旅人矢當時遂懷襄萬類同浮蟾安知巨靈躡尊於圯橋履俯仰發浩歎纓
流幸清泚巢顛今未非穴墊古未是但使同心人共嘖洪濤隨指顧六六間一一平如砥

翁呂宗屢共游因寄數行壽其尊公祇文

世道有叔季人心無晚暮達者恥榮競所秉在高素抱膝事詩書散懷寄庭步風雨停小車陰晴問芳樹時
時探湖山溼波瀾逸趣况有佳男兒清舊包古度蘊藻及明時席珍獲所遇吾游雖放浪折枝屢相顧從此
識庭訓并以據情懷

陳令威中丞守關外撫薊門網繆甚至以義州狀議見左

大世中樞每念往事爲之慨然予亦以學義州買愛率率書此不盡興懷白鶴本缺此篇從大瀛函書

補錄

仗鉞出國門大將不中制况復當危疆豈可等兒戲義州抗西遼京輔重左臂壯哉陳中丞孤軍審其勢前
棘開營屯絡繹漸布置層齒藉松杏牙角樹幽薊一以探虎穴一以絕狐竊正論駭邪鬼竈議從此異欲賣
盧龍塞遂翦涼州翅尺檄徵中丞金贈謝 騎義州既不存八城遂以棄堂堂經遠猶反爲介 忌湯豹不
敢築葭蘆坐割界傷哉籌邊心中彼偃月計長城日云懷傷功何可異信有干羽謨偷亦念三季

陳彥升舟次追舊示其弟次升

漢唐都關中終年事隴右豈有燕雲都中朝自爲守遼瀋初破壞河西猶輻輳圖前少卻敵錦義尙如舊道
謀不可齊但爲歎所逗象虎使虎騰教探得探就棲遲十數年衣襦日以漏蓬蓬萬斛舟蔽以小衿袖彥升
有高識出關相厥簇折箸告中丞綢繆事鞏後竭力爲守謨焦唇道欺謬不獨一仲淹亦復百純佑負乘在
中樞市欄自致寇聞 但誦經反爲達者咎胡銓坐陀罵 遂陰授中丞既玉碎太史亦蒙垢雲雷網白
日翹翹行清晝以此林鶴驪託彼梁鷓鴣極目視中原憂心爲孔疚

偶書寄陳令升

神州信陸沉吾徒何顏面以彼覆杆安化爲先集戰天子亦明察而受羣奸煽煽饒食腸胃終不獲所戀初
以拚飛蟲究使龍血戰告者日以勤讒者日以倦災嘗不足懲焚梁恣雀燕銅駝偃深草薪麥上高殿九鼎
繫一絲江河細如線夫與片紙書口於十日電野老扶杖觀奸回手欲頭壯士揮雕戈健兒拂箭箭文人集

敗鼓老嫗染赤銷所貴日方升不獨雪見眼騰騰仰明詔揮涕濕素弁
東山偶書
垂老談爲仁了不見精微細懷七尺軀膚髮蔽天地斯民既顛躓骨血安足恃抱頭入林莽亦與狐豕類况
可負日月而竊鬼火氣管子膠日時已得禮樂意宏才不可遇季路亦其次孔門道成人於此無二義蒼黃
既可參生死何足異顏回委陋巷正則蹈水瀆當其并命時要一無所繫須髮懸華嵩骨隄照百世試問古
仁人成就無乃是

痛言二十四章

代序能幾周義皇倏已遠宛華亦吾徒得道豈不晚生值瀨氣齊遂執天地權廣成初少年雖然爲化本沿
時守澗漠其意亦凡近義皇與之游聞教但婉婉古人貴至德不貴明聰重以此循帝崖億載忘餐飯
民俗方淳庖吹漁母已番罔罟與粗粒哀樂遂浩浩六佐不敢諫五龍芥迴抱庖厨一以充鳥獸厲牙爪想
其生已久決塞從其道豈悟後世人人權委藉草
觀古帝作者一一師昆蟲其智不足師愛惡以相攻遠人者時全近人者時窮龍鳳爲鷄豚安知庖不充所
惜彼靈龜誤爲神所憑不如蟠腹君叫赫長林中
哲人起禮樂意思何偏卒抽蠶未及衣遽以披琴瑟豈不謂後人保此無羈疾吹填歌扶袿撫掌迎日出曝
曝畫地中遂爲萬歲律嗟哉千聖賢猶未詣其室
天地寶易簡變化行精微六爻三乘之鬼神知者希生爲上帝心手差日月暉星辰眉睫間開闔安敢違禪
秦書云云味遠知是非現有未繪圖未能測所歸回賜待仲尼隻字驚崔嵬想彼金烏明瞭然稱忘機

曠矣遂古初何曾知粒食塞兌寡所營翔行無味息嗚氣充其中霞玉益顏色一有厲山農遂長千智識渴
有不及泉寒有不及織雖解毛血憂已鼓漁吹翼雄者飽補梁雌者但偏側俯視田畝間亦已生蠹賊
來義十五世蓋未解醬道一讀太乙書慨然傷其躁賦散深醇元始成末造日遇七十壽此意殊悲悼至
人慎長願因貳途明報豈不識服氣可以資遠到畏彼後逸主縱心奉引導所以立方書網繆得辰告
治亂古相乘征討安可廢辜贖及鳥獸已自翦殊類兇手敗天方於義何所愛想自燧巢來接手關草味媧
皇誅共工廓然起敵愾莫云伊祁年爰始討補遂

炎帝生神靈亦學老龍吉三辰備言語蛾子圖時術不知悉諸翁何以得教益至道卑乃尊至治簡乃佚高
矩在老成危坐亦吾 燭火成日功非必避日出

眞宰多憂民所以重耕稼人知禹稷功明德食天下不知九井間再世爲司化亦歷三十帝禮樂播時夏陶
器易汗樽腥醢從此謝豈悟太樸雕畫衣將玉笋

文明在中天有熊舉其最同時六十聖縉纁與之會先後命七相追琢極函蓋雖云啓方且驅策中利害今
世非無才錯置各顛沛稽昌爲履肩虛高爲劍佩若明爲杵曰歧雷爲戈介即有斐然觀已各救其敗神哲
問精微視渺欲透背握極命星光凝然制無外五要不可窺披圖發浩嘅

昆臺初息關投策方嬉遊四方生靈心一日叛數州絕轡始再頓解冤爲兜鑿中身五十戰甫有圖諸侯至
治安可常至道安可求刈莧逃爪牙園珠浮瀛所重天明功未寒先庀裘大君無吉凶日月靡所諷靜正持

乾綱四海生春柔
沮史涉難讀圖緯何恍惚想其續義皇以易命日月贏縮靡所遺因之定罔律丹鳥於焉鳴龍書於焉發豈

必鑄神鏡以照人骨髮曠矣素問篇影響見素越
皇人寡異尙道廣衆所託一自表神智遂不及淡漠世主談軒轅何殊里社醜老者尊眉須少者事綽約白
日爲變化仰首問烏鵲安知大壩翁此意猶未鑿
拔世出戰爭罔風已不靖屈軼生戶庭疑竇起四聽栖鳳與遊麟母乃亦爲佞所賴盛德心廓然成順應不
爲瓜距搏不爲奇采聘投金還荆山藝竹還曠徑鼎足生鴻毛擗蓬謝七聖念彼涿鹿勳儻亦傷凌競垂手
視裳衣固未失其正

貞朝不可慕勿嘆陶唐時陶唐爲渾淪警澤無滯滯邪正方殺陳忠佞同孚孽世族秉化權何暇詢茅茨側
陋雖升聞亦爲帝胄者青鶴鳴藪中誰能知雄雌

陶唐諒猶可大小各賓進梯榮及世系選德及寒峻老者錄其名少者策其僞包荒底九載良楛足堅韜自
非湛文教頑鈍彌禍孽以此師歲功序成得餘閑

如天想魏煥孔老思精微爲上能寬仁吳蒼良可希沈然銘火德貫月生辰輝喻彼君臣間安能測所歸
介涸居巢下民亦不排諒有浩蕩恩上帝爲齊威

徵符在仁聖了不關頑祥重明來漢朝海內方披猖甘露承赤盤漚然如水漿金鑿紀化元准易猶荒唐不
如瓊與璣辨程爲平章不如嗜與吝景慶垂明光滯雲生棟間宵若棲石房安得偕赤松與之聊徜徉

古今齒禪業端不自堯始帝擊爲神昆遺世已如雁手擊四海撲以投放勳聖至人外日月向况變生死倪
缺三四翁慨然揚其批不命許由面不提巢父耳天地未成平逃曠將焉底菁華已垂竭吾自飲吾髓傾兩
下江湖何所著水萍此道在圖籙後人安敢擬

神明治家秉幽居相講求巖壑諸曠人安知古春秋岳牧重教化草澤通競練都聚既以成勢不圖諸侯吠
畝得天下豈必興戈矛聖人善因時因風爲苗蒐因之藪巨凶百族安其區不肯說夢卜開海納洪流但云
雷雨功已當千咨諏

崇丘多會薪泗川多會鱗君子秉虛冲四顧多瑣人重華爲魚販七友皆麟响尙有州支公及於石蒲民貧
窮無禮樂討論何所陳日月自週天眼耳生其身救世非庸流歷艱苦不親華貫十六賢聊爲鸞與麟負軛
登長途胼胝心知辛

寶露滅雲壇淳風猶未散明刑每致意此道豈救亂少小不自得覺有輓世歎興作信拔俗動止自璀璨具
有義皇質豈受傲遊謾神禹防逸心斯言未河漢

二八各適種底績維臬陶人材良已難荃誰久要瑚璉未可珍况敢崇漁樵當時貧賤交無一登熙朝善
卷非不賢鄙志在宣騰鳳鳥不攬輝孤鴻安足招

曠哉五百會明良萃一時大禹雖神人後輩遂罕儷天工妙已窮帶精勞亦衰日華麗九州冉冉爲崦嵫伯
益開西秦臬陶行吞姬維有園鳥孫巍然得所師

雪後觀山中出雲

梅蕊自宜雪孤雲將安之白鹿有去來巖岫多傾虧達者鑿混沌藝竹爲須眉上有肉芝翻下有香乳垂新
徑迷樵翁舊窟誤園嬌霏微一縷間王屋看將移鈕耒與斧柯亦復何所施登山採琪花當及清明時龍蛇
直園冬諒亦懷其私勿以浮游根徒爲談笑資

奉祝入會稽閃士覺見贈三章率爾答之四章

神界三千年中間十八姓當其騰簸時嶽瀆靡有定玉柯溷野草香草雜泥滓血者爲奔河酪者爲曉磴不獨堯舜憂三皇已競病禹王所疏導不過其庭徑龍蛇放菹海虎兕坐幽巨猶有仁義心不能變臯鏡始悟尼父功亦與神禹並纒鋪開詩書環轍啓明聖雖未踰江漢已爲四海鏡安得神禹工巍然保其盛尼父衷星河軋然從斗柄清者自爲流濁者自爲凝膏血通精神萬物保性命草木生肌膚毛腠安股脛龍蛇從予遊虎兕消陷阱縱不題春秋日月自爲正鼓腹歌義皇予豈敢爲佞

慨然念宇宙河漢生弓弧日星爲之彈四海爲鷗鳧安得天地仁長生黃與虞蚩尤不肯降防風於何誅秦鹿餐麒麟胡狸攫鷄雛大鼎鑄神姦得無滅醇醜堯裔存關中亦三破其都樓遲一兩載收削還廉隅唯有典午時五嶽如搏蒲導安亦吾輩蹇產追夷吾世豈無毅單不過猶田狐猛獸踞虎頭濛濛霖其軀駭隄走千里往往充庖廚哲人秉珪璧不肯從屠沽買楮賽江神畫壁爲皇圖黃河一萬曲卷栢翻斯須安能係小舟而從龍尾趨滄夷知我心弱水無園珠搖頭問靈威扁跳非丈夫天地會平成亦非人所謀稽首告上天臯益何區區

騏驎自追風感恩則已淺亦或有癡氣欲共日烏日烏自上天騏驎自成繭樂駕與鼓車垂耳充閑選見者爲揚裾要非心所善問驥亦何爲頓足微流泣自昔穆皇時四海何博衍毒蟒一噴張陵谷遂傾填四蹄不可開孤吻爲薄韃回首顧其背筆烙如苔蘚嗚咽問九州無非禹所吠猥獮旣已死風蟲旣已甯朝爲一掉尾頓使天地殫神鼎多遺奸龍蠖少清辨巨跡或不到乃爲一勇福五子能廢歌瓜面滯誠讞澆瘴鬱長弓元凱不得識嗟哉九日烏臊十翠釜贊何如走空廓健倦與雲展安能係束芻總轡於石絃世自有高人出言如洪鐘知予入海心不爲流潦宗琴高負赤鯉王遠寧班龍大兒命泰伯小兒呼仲雍種

盡何喬耶狐裘而鬼繼私心爲報仇卷尾如雄峰鷗夷與鷓鴣半繫於心椿一朝毒氣散岑溧歸窮冬浮沉五湖間沙草明微踪安知古聖賢變化多春容夷變爲韶簫集許扶柳筇妻子日周旋親黨無殊凶遣種溝壑傍各各生芙蓉脫然日月陰比戶安可封朝沐昆明池夕宿三茅松焚香酬子姬反唾謝干違何須鑄黃金強面爲人備覽君秋興詩鬱鬱悲高春

題倪鴻寶松石圖似獻汝

倪公稍動筆便與世人別觀其作松石古秀蘊精傑體意不可意似以飽霜雪感此感此撼元風令人坐嗚咽倪公再出山殷勤祝其弟委宛奉慈堂丁圖清且細溫樹與揚羽各復纏心系渡江初擊機天果章其義觀其兩屏書一一足百世

端午後別稽山似瀟長觀察

彌月行稽山稽山略相借陰晴時一面溪艇數迴卸親朋寬老軀但不撓中夜名園日招訪杯罍環青樹江淮未斷流煙雲足呼咤鳧鷖俱泛泛竹葦交狼藉賴有同心人欲結夷吾亞邱報日見示相與商微罅溫陶不可呼宗岳久云謝不踐越王薪怒發明州駕朝議多園黃水火日薄射縱虎逐林猿吞血爭冷炙賢哉賢乎哉夫我則不暇

示諸友

一作書陳天若大易書序未有
咄哉陳子書脩與古汲二句

易理在易簡不從言語入姬孔繫爻象亦非古所急龜龍初負圖舉一遂包十纜一著文字頓使鬼神泣一晝十八變天地爲嘘吸如以九尺杖橫豎自起立日月生其端鬼神步原隰徒就言語觀如作木偶掛賈石不可餐况復嚼其汁

書似倪子新子封兄弟

中身不好道五十稱文章掃筆如落葉無風常自忙晚憶王龍門髫年師其鄉出言必定慧置步殊安祥雖如無名公以澹蕩自將一一變十年不自畫所長何況生末流願盼生黃蒼賢者滿街衢選人如選羊一語不當心白晝生清光以身入品題眉目生痲瘡譬由基穀中百步懸青楊恒不如塞默掩鏡臨幽房老來六十年開花爲枯桑每見舊時書當庭陳敝襜恨不斫竹杪掃此紛紛糠白髮縈重心退密漸結縵雌落鳥其毛似欲爲鳳凰及其羸復生依然皂車囊噉然時一鳴瓦礫隨其旁卽如孔鸚鵡集爲輿隸裝哇頭朝舜英日暮爲園霜所以古至人大率皆深藏上者貴無文次者靜以莊神鬼泣蒼書此哭深有當而壁諸老人豈不避面牆恐有後悔時顛倒無衣裳卽此規矩中得其要眇方從繩與屈伸入動無倉擗投之萬舞中可以立中央昔吾有畏友辣氣分芥薑大語成鐘鼓小語成笙簧落筆不艸艸艸艸亦芬芳少余一十歲而有千歲強今也亡矣夫顧影恒悲傷

秋後至故居過阿舅宅上見海色明淨而阿舅將遂入燕偶成數韻

海嶼湛清秋小渚涵白澤瀟氣識歸帆銀鵬自促側常懷萬里心盪以負山力一鬢暴東洲一羽橫西極徘徊十年間依然見人跡抱膝吟介丘中夜歌伏櫪麒麟自鬪爭日月猶爲蝕何況令吾曹坐使傷寥歷春風發明河潮水通碣石霓虹垂宛窳穹窿映空碧揮手留餘波猶能蕩八域纓長足自清天高準且直俯視方壺洲相去千百尺誰復忍居諸俛仰隨續七

癸丑春渡江出省舊居甫數日生平所愛強半分袂與仲翁待僕至心言爲別如復千里言辭不及執手悲猿槍鶴何能爲懷燈下作詩擬黃鶴遠別雖非其類情見乎詞矣

澗草何盤盤不出石流間巖松當危峰往往鳴天寒非不羨所居路側輪難寬十指向三峽急欲爲君彈晨風離上枝音多故不憚百樂羅上堂總以頹人顏言思千集胸夢寐何能安昔者稱交遊日出河星殘愛如飄荷花春如斷雷旂追求無多方徒爲除朝餐越雪寄炎南雖淒猶太難况彼長離居一心含萬端揮涕至吾言滂瀾不可乾君裳亦吾衣安得比雙輪遠者日以疎近者日以單攬佩多傷心所以碎琅玕白雲問山川哀哉何時還

贈崑泉游瑞圖

朱鳥從南翔威毛何離維銜來尺素書緣琢如文璽綴以紫流霞藻以青石髓開函視尺書寶氣當胸起上祝岡至陵下祝孫與子入門烹鯉魚清淺堂上水亦有白玉橫宛與璠溪似顧此傾轡尊如躡雲中履我訂東華圖已識君家史告我吹玉笙娛樂盈千紀

小酌高君鼎宅有感

筆研故勞人辭章寡逸致霓虹借日光餓麟自相噬儻莽言千秋久矣非吾志疇昔太史公亦不喜韻事鴻鴈鳴河梁得與遠相棄寂寞園白間誰與辨其是

久謝詩歌見大小杜率爾似之

驕鴻薄四海馴鳥狎葱萃遠近非不分霜羽顧顧頹頹風昔耽雕蟲恆言非所貴霞雨襟邪虹信採殊異類猶云蹄翻間未能改毛毳倏忽三十年吐語紛失味謝葉見晨華攬鬢忽自退漱漱溝水間焉知昔爲累夕秀日已夕老醜空代匱見君兩弟兄使人結夢寐

責躬六章

天地何高深日月相循環星宿陳其顛動靜恒無端舉翼不能翔而作醜蟻觀大命一以至不復能研鑽鬼神欲告之翕吸近若難傷哉草木頽不得留朱顏

姬孔亦勞人心緯何其微馳驅道路間研慮精且希雖非耳目功觸緒知所歸大者接星辰細者呼風雷安有蟠首年棄身忽如違浮雲不可刪日華爲之虧

顏原在藁門餐寢嘗不保金石滿戶庭流微何浩浩長松蔽霜雪其下蘊芳草亦有澗底蘭葉萎花逾好君子慎寒凋不爲物所造屈伸或可借勿以傷懷抱

言行生風雲神明喜庸願造次一以乖日月爲嗔怒豈不審歎端或以纖忽故規矩天所師平蹙準其度斗柄與河魁徑守故步才智安所資百草呢霜露

古人不可攀往往稱善卷蓮子避國郵季札辭家亂仲尼不之非數與相往反以此知師聃龍稱不爲嗟哀哉鄙書生窮涉不到岸百里已九十遂以委道半

好道不入微閱物不至細影響自相答杳然無所繫大易重存身春秋本大義詩人多微思委宛出至意草草一世間遂爲稀與秕江漢下明河忽已失所恃

辭墓

鬱鬱墓上松青青園中樹之子何所思出門捨之去去之遂二年陵更谷亦遷浮雲迷所歸墓草空芊芊禽鳥啼林端婉婉相與語蟠蟠橋大人豈不知道道猿狄離其巢日夕恆悲號廿年灑掃心一爲虎兕操悠悠泉下人委我如鴻毛

寄友

平生恃良友緩急難相支死者未爲歸生者乏其資飄搖形影間匆匆重苦離淵嶽既以翻鱗羽將安之高言不得重微言不得隨昔爲鳳與麟今爲塗與茨白日入虞淵巢鳥安所知君子寶其身勿爲風雨欺

告兄

吾兄七十八已復近大耋相差十六年不得聚一室少小從讀書炊爨與負笈老大不相見青雲翳白日兒孫哀我窮相從患難中出門數丁圖念叔與親同鈞當理其緡射當覽其弓募士從其游負載從其戎俛首思吾兄老得兒孫力安得割所愛使我坐感激揮手謝兒曹歸去秋鳥疾兄年日以邁王事日以棘勿爲復栖栖決皆一歎息

誨子

生子不苦晚賢子不苦貧吾年近五十始與兒子親今有四男兒庸福誰與倫覺兒年志學雅好似醇篤不器不可雕而當秉淵穆孺兒亦清灑每不離膝下與吾命小同但恐讀書寡廢兒有雋氣頗已知文字已識吾艱危諒不慕聲勢費兒在襁褓吾猶未得見但能讀吾書即是展吾面明侯誨諸兒澹泊與圖靜吾今所誨爾亦惟愛與敬愛敬與天通一室侔元穹出爲四海歸入爲鄰里宗吾生未能馴勿復談父風

自詠

煒燦朝陽霞峨峨泰山石瑩瑩七尺劍溫溫半尺璧化爲石板宮宛宛置路側漢人一顧問人爲嘆息狐狸踞龍宮好游暇白日蘭膏空自煎瑚璉空自擲妻子不得知親朋爲酸鼻寒從孝陵衣飢從孝陵食孝陵何淒淒風雨蔭松栢

贈呂漢堂以下附

漢憲本英年所學何精遂拔身入蒼園俯首噉儻貽我四義篇居然動明誨其一取威重恐爲濁友其累
二取兼善不以獨穀貴其三論成人幾欲絕其類其四師文孔稱詩相藉慰感此聖賢心誦言悅如醉舉世
尙颺藻誰別淄澠味君從劉先生湛然得其粹以爾含璞光拭我溝中淚園露下明河蛇蟬自解蛻洵矣顏
閔儔吾今得所畏

仲馭在茅山風雨夜作因弔前賢得十四哀詩命余記序聊述所懷以代引跋二章

築匠固不同亦貴審所濟刀鏡有圓方冰水自通滯受命或爾殊風松塔霜蕙當時十餘賢骸髒安可繼昔
從繆宮詹親親應山事徒手搏猛豺兩臂自中擊庭檻不可攀逸圈遂滿噬魏顧尸其謀餘宰但微睨帝計
成奔河崩流倒梁欄相憤方就燭天心已殊察初念惟涓涓末流破天地緬彼汪劉時猶有日晴曠如何光
華中旁輝改李藝百戰洗塵豎儒送獨勢縱有丹藥千豈解鳩縷細安得平心人一與傷往逝

逝者多可師感歎亦奚爲苟爽誠李膺遠害無瑕疵延生思蘊寧微妙通園雉曩昔逢廓園羈縲渡淮時立
馬話漢唐痛腹傷絲夷述彼孟博言冰涕黏須脣提騎十數人盤鞭及吾綏臨別誦宛鳩已矣焉足追綿貞
至阜城乃爲書見遺云人如干將終有缺折期自於同輩中在軼猶如斯况負一世名能無千古悲讀之不
忍聞仰見雲飄馳仲馭且莫哀聽吾近日詩木有數頭奴桑無十畝絲黃河雖欲清鯁魚安得知

贈程生二章

程生有奇製往往凌郊島富其得幽雋如出華山道翠斧鏡枯崖纖刀剪碧艸呼猿集棘端遺鶴上雲表三
年再相見跳叫忘人老

高寄在白門如隱荒山下不逐五侯鯖不繫七貴馬得意附往還微園動啞嬌如驚霜鶴拔松拓秋駕視

彼諸細儒齒欲吐礫瓦安能復拘拘營肥博笑罵

壽沈母

沈母有令節夙負鸞鴛姿下鳴循高丘解佩稱女師翱翔蓬海間鐘磬呼朝曦若木生青華結實如星垂銜
之哺其雛旁皇帝苦飢神人爲指言琅玕方離離鳳葆雖信芬遂亦忘其私雛成俯四海顧盼何巍巖搏爲
上帝驂步爲仙子騎歛爲紫微方吐爲蒼醫羣真子敢從百族推光儀當時龍根翻素虬驅文鷲風雨挾
毛鱗顛沛紛鯁鯁猶有鶴雛來百樂供追嬉苦者忘其茶甘者忘其飴艸木榮巖阿一一成靈芝惠光照日
月香氣生瑤墀鴻涯奏清曲王魏呈妙辭人間錦繡章河漢天孫絲下裳組以綵上裳繪以絺應龍與共翔
八極相追隨邈矣飛黃馴矯然吉量馳塵海有飛躡曠曠安所知

壽邵母爲旭如尊人

蘭蕙非不芳所爲少筠節脩篁亦森然安得滋香烈敬爾吳氏母檀塵薦翠雪矢口得清韻操躬獨貞潔一
如琪樹中裏露酬明月邵翁老負僂唾壺每爲缺俛首視幽閨輒爲解憂悵惠連既少孤道韞亦晚訣上有
垂白親下有銜哺血啓帳留墨光下漿餘能藥不以異胞乳而爲隔膚髮古人親女師綖冕飭巾櫛亦云禮
宗者輒輪生羅幟此豈其流亞翼燕表貽厥旭如從吾游文采方嶢嶢有弟如士龍亦與麟鸞悅嬉戲當母
前藹如雙髻疑天道衛貞盧人道寶慈閱覽諸古賢媛若個羸後達絺綌山龍其始於覃葛衰繡成三縷
母乃感絲叢琥珀生巖阿豈必松所結鸞鶴託明丘亦本於丹穴奉七念邵翁髮背煩荀熱仰睇聞黃鸝俯
睇聞青矧十載糲飯羹昨欲下瓊屑蓬蓬六幅被首自裹袍第甘露湛慈柯竹栢同縹緲獨蓼蕭詩可以
頌伯鳩願盼婺雲間惠風來珠璣

濶廬口占

我自用我濶吾亦愛吾廬無有了吾我好豈關詩書不過此兩句百歲行趨起靜觀萬物中本一無二殊濶
既無所著廬亦還空虛譬如我與吾對炤難相如有時負陰陽形影不能俱况行彼世中兩兩分脣須一有
吾我心陸帆而水車兒子自謠歌筆楮自分區當其適意時亦自為詩書要知吾無濶猶之天無廬及於義
畫前初無詩與書此意近禪門萬勿云起予

偶書軸幅增

舊花如不研新花豈更好舊實如不堅新實豈更老所遇皆故物翻然費大造體道苦已忘聞道苦已蚤逐
氣為物吹何以殊百艸

黃潭浦集卷三十八

詩

六言古詩

小儼庚辰十月辛未
時病瘡八十日

稽首穹身卑耳風霆莫惱君子昆蟲有罪自知燈火熒熒不欺我會脫巾如廁日與廁神近視我會觸手搏
牛手血幾洒牛頭六月自汲井水不及投錢井底荒年一過姊家半餐為辭咄嗟我曾不領雜麥棄地自委
餘力我曾自炊蘇蒸不知為鄰墓新墮見蒼鷹搏爵救爵不能匍匐荷鉏欲適火舍失手不護交蛇我曾恭
承面唾以手拭面還坐我曾誤觸親名當筵涕泗縱橫少年讀書貧賤中年知識離散風霆容有不知穹身
卑耳知之上抵炎融霹靂下抵蛟龍魚鼈昆蟲有罪自將臣心自焚燈香

大儼庚辰十月辛未時
臥病正八十日

為臣努力當忠為子努力當孝排山倒海莫酬折骨還肉不效丈夫三十耕田可應涕泣呼天有道平格昭
然何當才藝自憐憶昔負未莘野一旦翻然駟馬彈琴陋巷自佳何為褒衣樹下子長母少當嫌就并并蜂
不廉望炊瓜發未占持飯攫塵大纒自是鋤瓜草艸貼親每食不飽找床叱狗聲高東鄰西鄰伐喪會應多
集聖賢撞鐘考鼓昌言呂公還釣渭泉夷齊掩口暮年雍仲解衣龍子夷吾節節市裏端木殺馬焚車甯公
終蹙牛矢不見西人去國經日樹下一宿祇今宮室巍峨從游居徒繁多

七言古詩

十定詩

君不見空山老猿掛絕壁手投橡栗與狙食垂髯坐壓蒼松枝閉眼下炤巖水碧虎兕逡巡不忍號爲銜猿
子臥白石又不見寒潭千尺朱鱗魚方腮徙尾雙筋餘日影翻崖映潭底紫苔不動鉤微鬚又有翔鸞到寥
廓凝身紆翮如槃木表徧腋下生勁風長嘯似欲輕鼠璞君不見鳴蜩秋後黏枯枝精神去身身不知因鞋
掛樹貌零露沾足猶不離樹衣又不見孳蟻腹擁綿花毯軟白貼壁通軍柔紗塵透窻掃不落幻殼已悟輕
於漚又不見十年豐草盤青蛇一朝宛委遺袈裟灰踪欲覓渺無處圍鱗坐捨瓊瑤花人生各有定時節風
雨通年十二月飽帆正面如射期一日岸頭繫鐵檝君不見蚌胎重疊涵定珠依蟾吐光若虛無不於此中
攬母腹驪龍未敢吞方諸去年霹靂破桐樹瓊枝片碎委道路呼師裁爲五尺琴炯炯明星淡夜露蒼茫萬
里開洋船馮夷擊鼓驚長年牀頭盤鏃對檣面南海北海張靜筵手持盤鏃奉古宿眉簷不漏齒光日雷靈
欲惹鼻頭塵坐下森森出茅竹世上盤鏃何處少不向風波趕魚鳥蒲團已朽棕團新虎巢石窠泥塑人千
聖百賢各臥盡留君踵息銷千春

已別諸子依依不去欲同淵姪北上毅然麾之並示諸同學

君不見古人裹足走流血歸羣散盡飛鳴絕又不見都亭吏卒無姓名赤轅揮手驅青蠅方今明時安敢擬
纛臣客送三千里生離死別不可知友道君恩已如此汀漳山高入雲章貢水駛如奔軍六月囚徒脫桎
梏諸子何苦悲離羣人生報主各有道孤身掩口銜青草人生師古亦有時結束鞍馬騰茅茨英賢致身解
血骨不向蛇蝎求異術焚香庭除樂事多彈劍送人將奈何天上巍神輕意氣琴筑哀絃安所實斯文未喪
應能來湯火花花仍能開垂飛不食尋常事加餐勸我何爲哉且往治吾廬且還牧吾駒青穹眸子晶於珠
定不隨人銷居諸君不見次公從此傳尙書

賦得陰崖結茅屋 庚辰廿三 日燈下

北陸簷足日影短鷄號鳥噪恆苦晚腰鎌補屋簷茅茨出門恐有豺虎知壁間漏泉瀉漉濁腹蛇間游戲青
竹繩床倚竈午雲頰床頭採薪去不迴寒蠶人帷燈火死摸鎌斫石石不理清晨探雪爲朝餐搜書引火傷
肺肝書囊欲折三五段長天久已無飛鴈人生焉得長少年結髮短於結茅錢市門刺繡展纖指不識茅簷
爲魚齒穿鍼月下紫榴裙但指陰崖爲墓門爲誰鉏茅再盤結一尺茅根三尺鐵秋風莫掩茅屋飛天下尙
多人無歸雪花莫壓茅屋倒天下幾人猶未老黃金青繡瓊威蕤故積久掃生苔衣夢中曾到知是非

竹刀篇

手持竹刀爲君說天下負心無義鐵胡兒斫人如斫蒿槍兒刈人如刈毛雪邱舌長三五尺不吐一語擇人
食解腰奮臂來青蛇嬰兒鷄雛孕婦瓜下廚不復辨鹿豕紫血當茶白當水鍊銅七鋼參分銀猶嫌鈍生力
太淳穉鷄膏薰孔翠膽差當薄酒爲微噉誰持此鐵訴上帝鉏斧不與分不義祇應當治爲長號自呼不願
爲君刀君家葵園大節竹不噉腸胃充皮肉捨身自喜當君庖頗能剖事稱君曹翠雲鏤開明月片便與純
鉤發生面一朝爲解十蹲鴟滿志躊躇人不知秋蓬春菘脆於紙紅絲不復血人指二十七種難播鋒捷書
不敢誣君功力微刻輕少注意要不當場誤君事煩君浦拭三兩巡退身藏器銷青春風裁小可已如此不
帶傲腥累孫子吳鉤繡遊花蛇纏魚腸悶昏輪一錢鷄豚鷄鴨皆安眠老鐵不復當人前藥王殿頭缺素
作重環坐相向圓丁亦有一割心莫道此言無快狀

素詩四章

方池苕生漚白苧美人掩仰不得語橫江波平擣白絲男兒渡江人不知清霜未零蔓溥露飄飄葛屨動行

路菊花開盡野水寒疎帷襲風袂單隻雁南征何所寄啼痕漬帛少行字帶長纓短心自敲萌屋雪封何
日消園葵已摘薤苗老半徑蕭然滿荒艸蒲團不定裘敝裾竈中合焚柿葉書太古希音久已斷一絃琴中
得一半竹簾布簾招枯禪烏啼白日安能眠與言夜語踏明月畏聽杜鵑瀝紅血銀河着天當戶垂燈青
熒三星微椒盤不復想冰藕牆頭那借鄰兒酒刺縲索落劍不霧開匣香無蛟龍腥五尺鮫綃滑如漆欲畫
梅花點未得床頭自禮木頭香不與黃金借顏色

皎皎團團不可借當機擣杵不得下與君結束十年知猶如繡襦竹馬時寒燈疊裳炤婉婉體然揚灰出火
浣與君同處錦繡帳不脫茅竹舊時樣與君同踏湯火坑能翻六月涼城冰約鯉當筵留君住便化元蟬咽
行露四馬並逐穿肉林馬頭解衣安鳴琴木腸石肝空青髓不信爲指江心水梨腮桃鬢玉環骨不信爲取
江頭月團團皎皎誰得知爲君擣結心自悲

峨眉石橋結雪骨道人晨梳鑿毛髮太白峰西水瀑飛道人胃竿啼苧衣水流寔深人人見荷鋤自收五尺
劍與花散爲鼎頭煙自此天青無閃電種梅十里無清魂猛獸茹蔬夜候門貝葉鈔經墨蹟淡紗窓寫竹月
華昏禮斗壇荒瓊樹老百尺露盤不得飽白石爛黃釜中丹便化大身爲莖草昨日移家遺藥白桃花未開
鷄犬漏風風託采成鷗兔莫怪道人如老婦

白髮老翁天下有白心少年那得久絳帳先生初上書曳履途窮懷趨趨後堂枝樂醉無色欲去隴西苦不
得中郎中年還朔方括囊不復談貂璫百日爲官未話故女兒飄飄踏行路白足女兒天下多白手丈夫空
奔波洛陽黃金散明月歸對機頭如對雪負郭能鋤十畝田銷除六印猶安然淮陰市曹上屠狗安知解劍
爲負帶當時但從漂母游儲室丹草青人頭貧兒開齋齋到底富兒開齋三日起長源娶婦分北宮帝奴鳴

鼓婢撞鐘憶得松楸穩龍背縞衣山人如夢在北橋公子多從師東園赤松稱舊知一椎已散黃金盡便作
神仙人不信晚張早李同分齋不元不白愁驚埃華陽畫牛牛放草白雲自鎖華陽道高徒清晝登天宮悔
不焚書消藥功陳橋驢夫笑道者卻爲他人忙墜馬麻衣楚楚無姓名真氣着人如涼城怡雲晝灰數 卻
便脫麻衣與君著西湖西畔西孤山竈煙初起鶴奴還鳳凰山頭苦相向便取孤山畫屏障思君不如天水
翁布被覆首藏被中一筆青丹點不到何處銷金鑄生貌笑人執扇被苧衣翩翩來思久不歸臙脂畫形並
畫骨柳汁青青是何物感君新詩歎白髮夜深莫惱屋梁月

詛洞 庚辰十月十九日時
臥病八十有四日

平山搜山愛洞壑搜山無洞心不樂每言欲洞遊頑山如面交者無心腹山空結想心幽癡中夜寤夢嘗見
之石罅餘符藏窈窕擔簦赤脚相追隨此中勳冥少日氣蝙蝠撲火掠黑地咫尺不辨三辰光那得神仙丹
篆字讀書蚤不登高明朱檻高樓相與清鏡胸強作元奧窟要使鬼谷傲華閱果然精魁爲都君扶床張燈
坐黃昏削瓜面前隱嘗語狐窠兔館未溫存夢中似見洞王說幽元到底是癡物幾人垂翼此中來尙與晴
翁訴明發因思生平失探討不合略破潛雷道江上二十四雷山腑臆疑人安得好第一渾沌見委羽大翻
已堆成糞土次則林屋稱乖崖半鐫側身不得迴魚龍石鐘亦腥穢華陽良常但味味大抵潛雷委蛻來笱
空髓徙心悲哀或有散髮髻梳屬我往從之何爲哉於今歷歷成精恠一竈一床不自在日光漏線不 垂
飛鼠飛飛欲盡晦我昔貽爾雙青鞋君今報我枯涎蝸我昔貽爾單鐵杖君今招我覆盆盞三辰冥冥何時
晶伐木山中空鳴嚶遷喬幽谷亦成夢勞君窈窕日相送

白雲庫中伏枕斗室如椰子大不見三光自揣平生喜探幽窅窮極之趣呈於夢寐援筆記之勿使見

者疑其晦也

洞詛作詛洞已復晦如答客
嘲者後人見之可爲發笑

洞壑精靈不捏怪開襟揖客了無礙何處白雲起庫中強捉人裾作芥蒂交深交淺心自知夢明夢晦夜何其與君乾坤共一壑蜂房蟻國空相持丈夫曉理識精秘要識世間無怪事玲瓏心孔開慧園何者洞房塞素門儘有通人納軒殿如穿水竇負門扇一尺席地能精專飛神越空騰青天古人面壁十載一息捧蓬夜渡海今人壯遊三十年自賃籛條數百錢夷吾當年適東魯膠目上車安足數立談數語酬伯主高子當轅國子鼓元成昔日亦當珠今吾非門不敢呼自非房杜存舊識太平那得如唐虞遇合有神交有命青天一一爲人正心鍼理線細於系不與枝頭說幽靚君惡洞幽軒殿明此中莫有通人情君惡蒼苔蝙蝠氣此中莫有燕雀志世間蹄尾滿青山委羽林屋除關魚龍石鐘付鮫父華陽良常辭卿嬾自是君家少元貫琪樹瓊樓不肯讚現前祇作鷄棲看遂使閩風成絕岸君家亦有王方平驅羊如山餐杜蘅亦有王生採石隨丹書百行寫寸紙初來昏琢成樵夫中年霞光開眉鬚夷吾元成何足道要與赤松展懷抱鷄栖狗竇安足猜專心一神雲日開恨君當時交已淺溷廁塔頭說媿婉悔不留君作鷄犬

方密之屢索易象正未之敢授爰謝乃翁仁植

古人間關寶古文寇賊不鋤火不焚夏黃貫械談尙書一篇尙書如一君憶在少年喜易象束髮危襟日相向於今忽過五十年九草七箋未得上真宰惡人塵務多韋編不得揮陽戈文臣素相各悱憤垂老欲墜將如何白雲庫中百二日宛轉呻吟裂血碧元黃初寫十二圖龍馬已醫三寸膝桐城方公愛比經苦無部署相批繩自言詮經家三世義理象數猶未明黃霸杜林亦人耳豈有朝聞夕遂死片楮隻字皆收藏但願生

存畢此理筐篋一日臨五門風雨瞥天雷尊尊迴顧白雲不可見經書化蝶皆驚翻細想方公食三嘆定謂此書終河漢丁甲欲取補鬼愁恨見數行未一半嗚呼生死會有時九京尙有義文師龐眉高官人何恨呼理不應如呼豬膚肉可潰理不奪自信此心如白月右手貫鑽左袖書解鑽寫書尙帶血淹留北寺五月餘仰鑽亦已蠱成書二十萬言動指節欲斷不斷形模殊此書方成未一夜糲粗又過白雲下方公含喜來庫門薰薰未施便欲借小臣叩首稱天恩年來北寺誰能存已甘垂翼歸地火何敢開眼談乾坤開朝水火暮嘗恐諸儒爲理悞偶將水火爭炎涼遂使乾坤鍵門戶方公好學天下無手捫北斗生觚隅一冬已盡一萬卷何必覽此增噫嗚昨日明廷戒吾黨血肉狼藉爲開講此道既不存詩書白心致主更清敵餘生儘得還茅齋閉眼藏書手不開義前一書無爰象啾啾哭鬼何爲哉

題汪爾陶所藏謝思忠書卷

古人命筆多元理常若愜意無知已君不見謝思忠暮年策足走湘水中歷九華與女兒自登峯上及匡廬俯視山川如鍊紙推窓拓絹三十尺平批巖壑四千里遠近疎密皆精奇崖樹雲波不相似有時飛瀑出曲澗野艇驟槽走行李重重藏剝深且幽村落往往具臚子秃筆不肯搔皮膚欲破青樹出白髓營丘北苑雖精詳遇此得意安可擬當時舟中殊無人更無攬持去飛駛此老願盼自珍惜願寄少溪草堂理自云少溪具賞鑒若無賞鑒銜十指悠悠此卷一百年忽然生翼致我前猶餘宣德舊時箋使我渾手燕雲烟一枝垂成神鬼憐何況吾道關蒼天

方孩未侍耶灌園

案方諱震錫
惠諱世揚

寶山欲楚天墮陰寶苗一寸千黃金蓮柱高宮已蕭颯板枓安得安山林昌啓年間諸君子十手何曾存一

指所餘惠公與方公庖廚有命涸鹿豕惠公生還十五年至今開顏臬陶前方公猶自託林下姓名始得通
御筵東海欲翻北海倒繁風縛雨苦不蚤飄搖屋無安居龍蛇相呼戲珠草方公此時未登壇油鷄鬪鴨
皆高冠捉鼻鼻花恐不免白日擁竹圍琅玕自云少翁亦抱鸚鵡菊花頭發春夢牙籤往往挑青哇石几遙
遙謝塵鞍當年瘦馬行遼西胡駝不敢排深蹄須叟豺狼起輦下貂狐撫掌宜長鞶魯連之書晉陽甲麟驚
一一逢射獵懸溜暴漲雖崇朝折柱壞梁不可涉天步未肯迴艱虞蒼散檣机翻居諸廿年重開北門寺方
公躑躅還愁予此道分明尼名世豈有庸流拔深刺王曹張趙俱搖頭云與舊事不相類人生鬪饑天繫絲
魚鼈蟻蟻安所私屠狗刀頭任公釣但爲通人發一笑偶爾生還樓大江方公攜酒開銀缸去年間關寄魚
腹開械宛然尚可讀感今憶故恒傷魂當年駿骨今誰存鳴鶴欲化沙蟲猿伊呂久遠難俱論嬰兒一果譁
當門安能與衆爭騰壽日暮誰保芙蓉園且當傾杯嘆酒澆乾坤

青巖

青巖鬱鬱盤青龍十圍百圍青芙蓉真人既得歸真宅樵子仍可樵青松青巖樵子手玉斧曾直天門震天
鼓一時號爲龍與夔四岳九牧安足數一再出山未嘗羸秣馬飼騶盡芳杜青松約約期君歸猿招猿跋巖
頭樹翱翔忽忽二十年山中強半藉松眠歲星不滯金門下劍氣頻援北斗邊以此浩然想樵舍白雲窈窕
青巖下解纒濯足滄海流時兼魚政寒漁舟往返辭家不數里朝風暮風送樵子一葉青荷一局碁一聲黃
鳥一句詩吾鄉既自飽袖橘况有白潮吐明月蟹蟹如車丹於砂占城百斛不過家團傘荔枝已結子火齊
木難如泥沙况復諸郎各懷抱看山亦得青巖道時作燕語呼平頭復怪蕙蘭如青草阿翁鬢髮殊依然不
與佳期爭白元從此但自稱八百何必椿史談大千青巖山阿三百戶個個人識舊時路爲君吹笛爲君歌

爲君放牛橫山坡上山祇今惡誇詡莫說青巖樂如許恐復煩君脩玉斧

題鄭峯山集

十年以來欲爲鄭孔肩峯山集序未能也曹木上以壽子元子意勸筆爲之率率數行附馳帛上使
孔肩九京聞之必爲發榮也

鄭公孔肩猶青蓮拔泥出淖常嬌然隱身雲巢蓮池上而能絕口謝狐禪爲官五斗不適意慨然投杖生平
地退視兒曹聞讀書手寫珠璣百萬字當年出口推名花一篇脫藁喧千家須叟風雲已變化數行孤鶩餞
流霞長君壽子既精奧冰盤勝出遂高蹕亦曾手解十三經曲臺武庫俱深造次公元子更絕倫新書往往
難弟昆峯山玉池吐玉髓真無一水侵塵氛我昔許作峯山序十年棲遲不得句元豹自有玉 光何必南
山乞元霧方今名位多上頭銀河闌星星不流湖石淮碑改名姓菊蘭安敢司春秋勸君讀書速秋駕藍田
合出玉峰下有日標崇鄭公箋不從閱閱看游夏

書示郭彥清

大道昭昭何所求一行一節不足謀澹簡之心春與秋榮華之言後有矛誦詩讀書賢聖儔靜琴娟釣鉤千
愁生不聞道猶猿猱周孔去人十指頭平津再罷未封侯謝安五十猶烏裘苟成事業如泡漚安足與君爭
清脩床頭易書精且幽我欲與君分鴻溝

大滌山寄別陸魯瞻

我行猶未到湖右衆口已誦賢太守我行再至湖西峰太守賢聲如晨鐘蒼生凋敝已如此雖有龔黃安得
理丈夫但盡已所懷安知世路閒乖崖閭巷小兒俱高識至今猶識蘇與白蘇白兩公爛文章又爲太守車

馬香老翁經過但旅次何爲亦有知名字小舟三日泛江濤江神嶽色愁驚號皖城風鶴蔽江下勸余暫憩
餘杭駕餘杭三洞幽且深六月樵子揮遺金況去湖州三百里豈敢一畝湖州水郭文舊居大滌西三里兩
里真人棲恨不移家向此住又當擊楫大江去大江源頭沉與湘石笈藏書多芸芳明時幸得一游目一令
游目亦意足但得洞庭澹微波敢望衡雲開如何老翁心神白如雪不與太守輕話別上江米價今稍平烽
火諒不擢詩城襍被圖書已如箭江風不看西湖面努力何期得再見

寄別臥子兼懷鴻寶

紹興使君萬斛珠隨風飛灑千澤蘇文章經濟各大雅出之我口寧爲諛雲門蘭亭坐親切雀子下堂啄碧
雪客棹不敢問移游猶請老翁看五洩天下水無匡廬奇鴈蕩無聲差勝之五洩壯險不可及安能過於倪
公詩倪公與余最相契一字動有千峰勢每頌使君明且清董賈韓蘇失位置我行當過三閩江若耶溪情
橫相繼迂迴二千三百里不顧白璧黃金雙使君偶來再夜坐剡舟如鞋載白墮不知身在智井中恍惚槎
從銀漢渡倪公抱我如抱鷄五年兩過靈峰西一夕折杖各分去無情潮到難爲啼聽君微談動四壁倪公
新詩在小冊匡廬水瀑瀉蕩漸五洩奇觀走辟易只今天下多風塵明州山水清絕倫褰帷帶星亦間暇蘭
漿桂楫搖青春老翁西去洞庭水不著些涎弔屈子不死還來此中游樓團竹杖報知已

讀李寶弓詩

李賀願况杏不作琳宮銀管雕寂寞雲間使君翻新聲小語龍啼元鶴驚與君隔離未得面雷車扇邊閃赤
電燒煤破凍鈔君詩不知右手如枯枝九梁弄珠滄海奪朽儒失精那得活天青莽莽愁無才此人何處橫
飛來剗鷹屠鳳謝上帝斯文幸未委平地百鈞舉鼎千石弓安能鼻頭爭斤風

將出大滌許諸山靈兼別諸友

十年三過大滌山折杖荷鋤未閉關嗜昔相知各相看孤雲野鳥紛躋攀道小不足當伐樹時平猶敢舒頰
顏古人作客不及顧血踵窮奔去如鷲十里一報健督郵三更猶卜神含霧豈如今日遭明良夷猶江風及
雲杜辛壬兩載翻青春金鷄夜語聞雲屯陷淖馬深不得去每煩明詔哀曩臣咫尺日光睹一線喜與羣賢
得晤面勉扶病足經崎嶇不忍道身出鶴箭可憐朱李生衰朝安閒牖下樓顧腰東岱南衡不得到又將魂
魄依洞霄我今別爾去湘水千頃煙波浸蘭芷橫雲迴鴈七十峰不知何峰勝於此

出大滌將復泝江西上別姚有僕並爲明春勸駕

瑤花不趁春風吹鳳羽不爭上林枝五色雲霞各有託驂驢奪水騰清池古今獻書上紫闕幾人拂衣坐明
發天子十使催酒家山中三旬薦薇蕨男兒得意不肯翔覽輝往往迴清光躊躇山中看天下救時肯紫行
周詳澹泊明心得吾素審括欲似千鈞弩何當燕火隨路人聊且裁衣近芳杜彈君琴開君書越溪美人行
覓嫁夷光安肯輕登車灑君車秣君馬球圖自合在廟廊虎兇何須問中野龐公有子能負薪黃石無家看
避秦明良魚水各自奮功成長揖還臣鄰然後與我談高真

古長歌贈別林六長再入虞山

君不見虞山錢牧齋盤桓丘壑生雲雷譬之古柏千百丈羣鶴衆鵠爭徘徊大枝偃蹇託華棟小枝孺柯支
高臺去年吾友劉漁仲雪柱水車話寤夢一言契以黃金千明月之珠坐相送今年吾甥朱伯勳下床答拜
哀甥存每道漳江無死理仰天灑酒行逡巡昨日又見林六長賈孟新詩被欣賞短歌贈別百餘字字字爲
我開悲愴文章有道交有神木門柳下皆路人史遷中身已破綻杜甫晚歲多酸辛幸有牧齋得相識詞林

先輩同太息珊瑚鐵網玻璃心吞血相看未化碧爲君取酒爲君歌錦帆往往蒙青裘冬衣吉貝夏衣荷蓐
鱸適意知誰多歸語虞山醉山阿虞山亦奈蒼生何

憩一枝菴有作

從大滌出禹航復傲舟而上搖漾之間諸友尙以筆腕相役慨然深意如魏挺之劉安世皆以作字
潦草爲深恥僕既垂老謝雕蟲之技廿餘年矣射御無名釣弋寡致猶且未忘筆墨時弄柔翰作少
年伎倆是不可恥孰可恥也解纜憩一枝菴值錢去非作觀作書歌以是例觀當比於公孫大娘矣
撫必惡焉因索筆再識數韻猶解醒以酒也

索靖王羲俱高識圓方妙詣義文畫生晚不及軒農時坐爲墨兵真可惜少年兩臂攜竹弓每獲狐兔雙雌
雄擲刀空中接日月收尖入鞋間從容猶憶當時十六七庭下狻猊擊白石小者猶稱四十勛每弄三巡方
就食自云神明天所交唯餘筋骨還親胞三十焚書及筆硯追猿攝鼠登松巢偶爾投封謁天子拂中抱册
稱惇史龜手欲斷探銀叉眼光漸細如元蟻栖遲倏忽二十年臂柔筋弱牽蠶眠丹經赤緯苦不効坐今豺
虎還窺邊戍寅九月謝神武 提戈撼東土白日嘔血登秦觀恨不以血膏畫鼓辛巳二月羈北門桐魚
纓帶愁批根豫楚諸藩半墜覆恨不四體贖王孫祇今餘生宵崖壑欲翔不翔行葉落顧視脾肉能幾何竹
刀刺魚苦不屬古人聞道唯蓮生開口不肯談著經前後出關十數載卒以舒卷完其名其次讀書唯樂正
下堂足瘳猶自病先人遺體不忍傷會閔徽音遠相映感此沾襟殊縱橫迴診此御生凄愴豈有園葵未衛
足能使禾木迴春陽造物勸人但元牝風雷鐘磬各深省金屑著眼眼不開懷壁當胸起禍阱少年不學空
多才魯戈夸杖生悲哀子蘭斬尙亦賢者不許驥足侵氛埃勸人讀書但靜坐坐看青團青個個崇虛道士

舞鶴羣鐵限門中尖飯裏便從張琦手指揮略看石竺言希微乾狂坤簡已如此屠龍咒虎將安歸停君歌
輟吾手長庚一星臨二酉白鶴不關還當烹銅靴自在人知否恨不生當義農前爲君一畫銷杯酒未脫雕
蟲仍老醜合爲僊神噉雙肘千春萬春傳庸朽

武林溪上辭別曹木上時復微吟以當鐵篋也

曹郎抱奇抑鬱久不開况我亦衝鶴箭相徘徊乾坤眼耳坐蔽塞古人心舌交播積慙無扛鼎拔山力使君
哈指垂嚙膝慙非通臂白猿精受君劍術辭書生天下岱華已破碎男兒脩書下中饋萬卷低頭師白丁神
龍仰首望鳳皇君今送我臨大江白衣白冠還蓬窓人生窮約不足道要使龍象齊心降不然彈琴陋巷堅
閉戶倘有孔顏白日開寐寤安能與衆狸虎爭清路

過靈隱寺

壬午四月十五日移病過靈隱時雙足未瘥逢陳彥升太史翁呂宗孟長民諸孝廉勸余試步遂至
飛來諸峰之巔偶爾迅筆使僮奴歌之足供撫掌也

篋圍不避山鬼妬又向風雷竟雲路放寬跂足投青谿攢尾猶罽崩崖樹操蛇錯怪人移山陰羈欲封九豹
關賴爾相知有筇竹明予額外逢生還愁猿怨鶴與誰說誓墓辭家悔不決阿游浪作補檻師曠生自創擊
彘訣可憐虎兇橫滄洲擇人磨齒長搖頭將軍不遍拜御史丞相似欲兼通侯天下高明有綺季蚤向赤松
稱弟子商山未必有紫芝嵩陽倘可寄石髓十城百城寶尊足魯國王貽未躑躅要從杖履明珠恩不使青
桂坐寂寔牽船到岸逢良朋問誰飛來飛未曾蓬瀛處處有翻覆不獨兩翻慙驚騰殺吾良馬焚吾車斬君
鑿弧藏君書江左夷吾久不見蒼生愁我更何如去年欲往華山道今年華山鞠茂草去年欲往二室游今

年二室成荒丘紺殿朱闥豈牢固青苔白骨生朝暮安得杖頭常百錢一日百局消萬年四壁書山不可到
啞蟬斷刺發悲操高不採首陽之薇卑不隱釣魚之磯春茉莉冠夏荷衣鯛魚不瘦鱸不肥三湘濯足洞庭
歸九疑峰峰知是非幸得不死相因依買家湖西師桃推出門看山山不違安知此身殊飛飛

癸未六月江東送王豐功北上公車

焦桐山中神仙窟百尺屏風青瑣骨投壺拔劍安足云要使台廡精魂奪主人十年營此山不得片瓦樓其
間一朝諸賢肯卜築蒼松翠篔簹齊牽攀豐功於我最親切乍向此山輒話別豈有熊豹驚淹留抑爲麟鸞獲
神烈世間豪傑如牛毛曾無半組繫鷹餘兩年十月復六月黃鬚長鬚爭河槽孝廉之舟孝廉馬一去一來
千金瀛道傍防寇與防兵龍驤或出豺狼下安得同心六千人桓桓呵雪生青春舉袂揚風播萬里頓使四
海無飛塵他時坐我焦桐石秋蟬一彈酒一滴但云天子真聖德長嘯悠然湖海碧

讀三山林守一潭帖因迅筆識之

三山韻人古有數國初十子已難遇盛明作者林宮端奇逸無過鄭騰部邇來矯筆紛如林葉公曹公渾清
深慢亭在杭各雄麗猶與王李爭呻吟葉公當年擅條幅眼中頗有董崇相豈知僑胥歸諸生啓秀披華更
道上董公宗連董漢橋近體朗秀如笙簫於中最喜林守一玉軫嶧桐細金膝守一爲詩多新聲芬芳華燿
鏘璆鳴婉總每出珠翠外劍氣恰與琴書平迂儒見此發殘趣如獵山水破答句芙蓉大鵬臨長江固宜有
此與之遇吾生不樂圖百艸中年割詩如割蕪吳兒往往輕聞音恨不移情上珠島島中千竅穿魚龍素濤
拍穴播洪鐘平塘篙師每欲哭十日擁鼻捫腹胸今年還山見諸子頗亦開喉道此理大東雲漢與崧商決
不爲人惱纔指海內作者今雲茶誰當吉甫芮良夫石倉選詩二百卷卷卷明眸放蕙倩定欲一語傾人城

何處千金露五面白沙定山亦賢者生當盛時振大雅遇其灑發無纖埃不在關雎鵲巢下二雅變終起陳
檜緊袖翹歌漸荒味呻猿驚鵲無安徵安得沈沈見其大陟彼高丘眺遠海手掬明沙洗塊磊與君上下高
駝迴臥然若華炤千載定心廣志澹中央離立經嶽表四方微言朗咏生清商蛟螭踞視鸞鳳翔風雷崑崙
神不傷夷夔歛跡生幽房區區子安敢當

甲申春閱紀石青广史焦書系之以詩

太白山中採靈芝天台澗傍拾瑤草芝堂已盡不復生稂莠逢塞田道與君帶鎌行荷鋤平分百畝耘苗
蔬休龍歇象二人俱既成黍稷搏明縉雲門之笙咸池鼓東芻飲牛隨牛舞竈頭一握聞鸞聲居然天格親
天語還將糠粃燒黃精烏頭紫蓼白茯苓退鹹去豉浸一世籬間鷄狗餐杜衡此時益君長顏色經旬不餐
坐亦得廣心定志胃氣香臥看厨兒煮白神明嗜好知何常各以適口爲馨香瓊茅之菹既蕭索且與黑草
齊烹釀合眼相君得仙骨餐服備非人間物不知周孔開賓筵果有龍鱗佐清醑與人攜手遊人家撤飯不
肯爲丹砂冬簪之酒清明茶平頭雀髓煎胡麻榴皮數行誑穉子金薤四垂洞里耳韋編竹簡青黏書乃不
如今之毫紙當年帝臣使鬼哭畏有異人生斷樸天地破碎星辰翻遂以風雲亂雨粟還君使還君經還君
澹莫稱先醒和平簡至神鬼聽蒼茫千古留石青不與世界爭樗星

偶說易象正寄朱康流

康流看我讀易四十年畫圖十二萬餘言個個鏡背參瓊璇此意得無非偶然明興二百七十五細與姬囿
分鐘鼓幽平燧絕歸洛中瀟瀟東西龜食土十二圖中皆云云玉麟吐書排蒼口仰思待旦申慙慙要與達
者搜真文二十年來四百友無人啓關享敝帚但道排箕如藏闔不知此象明於斗康流看我還山纔三卷

幾人紫閣盤丹輪扶桑一夜播爲薪野老未肯吐玉麟試取從頭一參玩後來幾個河圖半要知吾學有所云不作啐盤坐空燦

陳獻可來梁山數月矣寂處一室無外物之交猶買長頭

從首陽下游也又當板蕩猿雀沙蟲不知所化梁山距繡水尚三千餘里彈鋏過關或謂腰下有物則當解衣刺舟李何曩笈捏書使行者指其竹乘乎往時長安貴人見僕爲文章必語人曰作速持去無所用此令暴貴人仍作前語吾知獻可竹乘之穩也感今懷昔不覺泣然率筆冗音聊當灑別云

鷓夷不死生計疎胥眼未懸國仍許南屏北斗如樓直蟋蟀當春聽鐘籟讀書至此將何爲黍離麥秀空生悲中山兔毫輕於粟不及朱亥袖中椎晉唐帝居亦蕩析未有天子死社稷遺弓帶血哀蒼生但恨諸臣盡巾幗諸臣剖心誰與明昆岡烈火燒瓊瑛豈有百人同殉難而無一介懷忠貞多寶閣前玉鳳最福華編頭勒名字都門欲破爭跳身狗寶藏頭得深利長鬢肥體稱重臣尖弁皂衣橫北鄰白日開門放豺虎遂使蟻螻緣龍鱗嗚呼人臣致身託哀斧安忍偷生負明主天高閣遠雲霧重夫人無子蔡愁苦永嘉世界紛諸王宜和皇帝花石綱千秋亦云無失德况爾宵旰憂元黃蘿圖將窮赤字短鳳巢翻風亦毀卵恨無微力支不周曾史居然謝蕭管與君深談八九年仰覆指掌明蒼天銅駝金狄何所識見爾沒草殊流連載馳之詩屬女子多少丈夫不肯理江濱泥滓鈍牛蹄馬前囊空無三矢西顧襄郢東淮泆士言安石知是非與君畫圖二十四指點神倪得幽闕華山道士安且眠成都下簾辭取錢麟足仍可追日躔行人何必愁下泉

熊遜木言別急筆慰之

遯木孤生何太奇翹離破巢啼早枝風刀雨箭刮毛髓雖有五采誰能知憶昔丹丘初韶少大鐘細磬鳴清妙環珞結實不肯餐欲向帝前振微嘯須臾阿閣翻波濤梧桐百尺摧蓬蒿岸谷滄桑不轉盼海鳧落羽紛如毛嗚呼爾生何不番桃花楊花亦耐老不見擊鼓吹馮夷但見呼風捲秋草我欲談此中已悲安能曲折爲君詩男兒努力開須眉風霾何處無晴時莫作酸皺女子爲

寄建昌張恭錫太守

恭錫之守建昌也甚得民和上下賴之癸未臘月流寇陷袁州臨吉震賊湖東諸郡盡聞風雀益府怵於鳴鏑亟謀利遷恭錫斷鞅卻車留王不得王徑出居邵武舉國騷然恭錫晝夜拊綏閱月乃定盜賊消弭乃勸王歸國古云疾風知勁草如恭錫可障迴瀾矣因爲長詩歌以紀之

建昌太守何貞堅手支崩崖挽百川楚波欲捲鄱陽船一夜十起人安眠臨吉旰食本無寇麻姑草木自奔驟但云帝子不可留金根束轅如束轂太守拔刀留王車閉門不肯歌虛徐以璧睨柱欲碎首自視何如蘭相如帝子潛行適異國太守開門安反側城頭裹飯夜授衣隴上芸鋤不改色移時水落石亦平溢江湖口微深清啓箋迎王歸王城不用浼水渝刀兵十宗諸王十六府玉葉金枝委如土豈有守令稱長城但見龍鬣戰刀俎建昌王孫安且關隕雨不絕還經星當市豺狼既不見鷄犬入巷梳舊翎太守上殿稱無功稽首帝力歸文宗神明護持安可同流涕四海猶飛蓬安得更如賢守數輩支江東

微吟當長嘯八章 甲申六月初二日

爲龍莫嘯大江魚爲虎莫嘯空山鼠魚鼠已盡江山空枯槎反根含秋風君不見建圖熹平廿餘載天下健者歸趙醜又不見元符淳祐時黨人來摸端禮碑前車已覆後車看後人又發前人歎火雲燒天海水竭龍

虎自嘅元黃血插刀入山不可拔空使壯士噴白髮
多寶閣前掩畫卷偃月堂頭賦執扇蟋蟀開籠不敢啼丞相抱頭藏雞棲唐朝舞馬識生面奮啼不上兒
殿丞相何爲朝不餐短衣露踝稱飢寒兩卒夾草銜木丸悔不剖腹納龍肝沱淚河長汎瀾
君不見袁公橫燒朱雀門無鬢男子纏瓶根又不見海仙欲上石頭道官家往往稱甘草沙蟲猿鶴安足猜
星辰經日生飛灰世間幾個爲君死卞壺稽紹李若水明朝頓有六十人冰城雪窖行青春年少書生何足
論眼光白晝開青燐

烏臺使者馳馬蹄黃金如山青玉犀爲官兩載已太久恨不繫印如銅斗千箱秦廟萬鳥貂平頭騎馬花驄
驕起第連雲欲侵漢一縣腴田得大半烏臺風力真可憐安得此官常百年漢鼎雖移周囿改斷不移田爲
滄海新街直指又西臺蒙面藝贊描青灰去年此日猶茂才芒鞋草衣穿蒿萊如何不死今人哀

杜陵老翁走蹇蹇不與鄭虔共播秣拾遺偃蹇爲幕賓從此坎壈終其身正統初年水東老拔刺又上長安
道曾無一字迎鸞輿至今人說葉少保男兒身世如彈丸脫手便做自家官瀉水出瓶復何物不取黃金鑄
馬骨嘉肥到處稱天山歸人灑酒欣生還油車青蓋朱醜顏柵門東西不敢關拾遺少保交團樂日夜開籠
看白鷗

中婦罷啼出門去不得迴頭顧絨縷拔刀搥胸何所爲御溝落花東西歸可憐不嫁又不死蛾眉青鬢爲誰
理東家少婦初入門薇香砂粉沾輕脣稱身百寶行遠巡中夜下床難具論玉釵垂垂改頭面錦字銀牌看
不見去年簾前雙舞燕今歲春來斷紅線可惜朱絃不掛箭空使鄰媪淚如霰

縣官養兵苦無錢募人捐助常悲漣富子潛家移海邊一邑月餉須三千貧兒四壁枯魚懸朝餐上城不敢

眠松明無脂當夜燃研桑黃金不鮮分籌揚沙空垂涎君不見賊中新迴諸長老啄肉人羣鷹腹飽羨金
不得攜歸家餘錢猶塞長干道

莫舉義旗義旗之舉何太難雲錦爲面珊瑚竿百鈞之鐔千金之盤乳虎居其下飛猱集其端執手欲戰責
育寒義旗之舉何太難雷沙搏胸神鬼彈拔華跳河冰樹闌臂何以當足何以安馬服負書廉公罷餐騎却
題封而驅田單義旗之舉何太難高不與猛虎整冠卑不與蝦豕拔鞍勇不與屠兒登壇智不與蠶兒呼攢
寧戚飯牛未遇齊桓園德無家徬徨曹瞞劉琨羈旅棲依匹磾宗澤暮年空希謝安淮流欲枯江流倒瀾義
旗之舉何太難

山中偶書示何義兆二章

芙蓉憩匣澹於泉谿子不得常張弦鍊金久知兜羅綿神龜文猶五銖錢有道則細細則傳至人往往師枯
蟬癡龍舐黍洞中眠戲珠墜雲空蜿蜒天目老松鐵少年不與衆華爭標鮮仲尼已誇綠圖肩猶爲明翁輕
後鞭

天陰老姥避雲隙手攜神簡八九百亦有下廚春作役自稱身是麒麟客勸人道心與道力眼如日盤金甕
碧籠以麻衣人不識恭桑敬梓思無數玻璃心胸畏白石夏陽冬陰行踟躕不敢履影開蟲蟄猶恐上帝除
神籍薄簿春冰銜丹日安能與人爭繩墨

予既渡胥江何義兆曹木上送至嚴灘書此爲別并寫雙臺八松以識分手同志觀者聊用發笑也

烏龍山空溪水碧桐廬江寒隱蒼石溪翁敲魚鳴竹柵鷓鴣穿波出如織崖前削壁成高臺二分垂踵何危
哉猿猱不到古藤絕亦有展齒銜莓苔鳥墜魚驚風色緊天下無山可高隱蘿裳荔帶荷葉冠白日文鱗化

蚯蚓何君曹君來何從畫圖翻風銷澤中客星夜寒炙螢火豈有威焰生征蓬古人送客不百里君今渡江
又到此夫子已識趙河津乃翁不在吳門市我歸作炭與春傭眼前四壁成孤峰鸞鳳無聲失長嘯有時厭
竹棲危松從此辭君各千載故園門前千尺海海中竦島千高駝記得投竿雙膝在
癸未春率爾偶作并示諸同人

東郭先生久寂寞牽蘿葺戶塞漏屋圍牆一半青珊瑚破瓦穿籬墜脩竹當時弟子坐談經白晝肉翅生雲
青鳳凰山頭數飛舞荔風橘雨開醅醒倏忽於今三十載黃金鑄成付滄海明珠撒飯不復施元冠數毀籜
冠在廣成已老無崆峒藐姑山化為窮桑三秀六英不可食髯燕不肯巢蒿梁行人笑指龐公宅將軍樹前
罽襪袂縱無都館棲千間可少盧門敲圓席先生強顏無復慙絳字朱闥吾不堪少年祇想權皮屋孽葦安
敢纏華簪提筐拾椹探朱草金谷蘭亭那得保平泉百載更三家洛陽名園又何道去年擬買屈原潭今年
欲結遠公庵頻年碌鹿無一可白髮垂耳空鬢鬢諸君相期各千歲五百中身講進退一半納足坐筓中一
半抽鋒出天外腰間差池三百年始得貼坐稱團圓柔絲訥賜榕樹前猶恐辨力難安眠只今四海輟葦棟
安用束車突陋巷蝸封查廈爭昂低岡梧尙有鶯鷓棲哀毛宛宛垂桃谿諸君負才各千尺勿復拔檀理鷄
柵東華嶺上自留松孔明廟前自灑柏詩書今已出破壁勿使精恠鏘金石東郭依然坐虛白
爲倪子新子封兄弟題卷

龍宮欲頽海水舞陽侯踏足破鼉鼓鳥王番腹不肯飛素虬淵宮失道路崇禎末年天下空始以司農歸倪
公五尺白麻闕如寶欲剪柔襄爲青銅倪公赴召初出時手無寸鐵批熊羆三日五召十起草身如不周爲
天支未經百日已中變轉竦橫天日色亂章華臺上多眉鬢不與暴蘇講同貫須臾賊至開城門倪公號宮

排天閣九關虎豹穿狸羣多鬣暴公翻傾盆盜賊亦猶有涇渭忠臣之家不敢毀柳燦已死懸藁街希烈播
勛弄傀儡反几鼻遍城南門與人乞食稱卓恩 賊雖俱唾罵此人安得操天鈞倪公當年纔五十珊瑚
骨髓金壺汁開眸電發聲清商天子自謂已不及若令初至發璣衡簡除文武搜精英命將討賊收名城四
方援師集都下十庫藏金散物價即無鎮惡與牢之亦有老種張叔夜倪公既退脩經書廷臣徒食武陵餘
武陵糞珍爲上供遂使厮養稱中樞觀軍尖頭看鎗鎗賣國偷家何不樂空令吾友騰英魂上帝殿頭歎疊
鑠何不生當堯舜時拍肩坐諷泉陶詩何不生當宏治與萬園坐展湖山爲紙筆生張巡死蘇軾少眞卿老
長吉千秋有手明霹靂安敢爲公坐太息

又書似子新兄弟兼似獻汝二章

崑崙山頭湧星海不因口蒲洗泥滓丹丘威鳥生文雖不與孔鵝爭山肩宇宙精靈倪少保落英隕葉生瓊
草况有庭訓兼異聞過子邁子安足云一日從予下宛委眼光碧捲銀河水試爲拔筆呼千峯華頂欲攤秦
觀東子新吐鋒欲削玉蛟螭趨風折其角子封巖然如斷山桂樹喬森不可攀但能一語破千鐵飯喫珊瑚
如喫雪少保遺徽今不忘茯苓琥珀生芬芳唯有當年三尺劍悲龍銜水失光焰男兒豈必誅樓蘭韓讓往
往成天壇稷下老翁笑飛菟駃騠初生跳其父方今四海未安波熊羆性粗豺狼多應龍斂身蕉與棧案頭
焚香柰若何

倪公有弟亦清淑與吾穿雲嘯翠竹一日成詩三十章恨不起公與之讀買舟不裹鷗夷皮掉頭不顧光與
施床頭老易註百遍鞭撻迴縈誰得知自言有園三四畝呼童製筍與縛帚竈間湧鯉供慈堂尙有餘魚給
朋友天下噍噍羣盜毛鷓鷃束身生青膏會稽百里千重濠馮夷簫鼓娛畫橈六龍不來虎不嘍烹雞作黍

焚鳥號十年成詩一百卷更能圍棋三萬遺

率爾答孫孟璞

孫孟璞好古負奇何卓犖早年投我詩百篇百篇語語稱絕作當時婁江太史未登壇君已駭鷺駕鶴呼羣
驚數年望爾欲飛去胡爲廓落仍儒冠崎嶇相逢二十載鼻額蝸頭遍滄海壺蜂象蟻橫囁人當日交遊今
安在瓊柯一夜播爲薪銀河列宿成飛塵豈有書生勝天子而能百寶護衣市湖海樵漁各洒洒臬羽無才
失風雅不能保箭登雲臺何必媛姝坐人下閉君門捷君戶闐仙東野未必過四千詩得四個萬戶侯何必
更與京兆馬頭橫道路

騶虞行二章

飢不噉騶虞肉寒不割騶虞皮白文黑章安足奇上天自有清明棗瑤臺穆然盤陸離元豹胎濡白熊脂小
臣生不服蝘蛙骨酪瘦削如枯崖安足侑君之尊蠡老麟失足東方道忽逢虎兕伏秋草抱書掩袂胡以爲
古今豈有不食人能肥昔也來已遲今也來已蚤揮刀削脯爲君禱古今豈有不食人能老騶虞仰首語沾
臆聃耳史官但歎息吾生八百二十有餘年不見虎兕腸胃獨安全

渴莫勸騶虞酒凍莫覆騶虞被騶虞聞腥百日醉騶虞溫存千日寐階前十耦射騶虞蒼茫不見騶虞意人
言仁獸合有靈攢簇不聞騶虞聲世上分明惡白黑不合君身自體別西園駁馬交鵬文朝食杜蘅莫芳蓀
圖形尺寸栖金門行者不敢傷微言爲君鑄金鎮屋角十行龍種關白目射鳥小兒來掀脣昨日爲吾承抽
軸落落騶虞安足論

散歌板橋溪中

先年我柄園雷山君欲從我扁園關買山直住白土嶺一里二里相盤還今年從我探高穴禹航溪深不得
發孤舟常繫大亭邊與君臥處又一月問君家世居姚江先賢講德稱無雙四海荷種至千里一行經笈翻
車轡未至會稽已十舍劉公章公久親炙天下名碩推二公何必更住同雷之山下同雷山中多新書十字
五字如樓直安知宛委不吞吐早晚寶笈問蟾蜍當時山中語諸子但說晦翁與伯紀兩公豈是兩朝人遂
與南宋北宋相終始老來作客易生哀與公復登越王臺越王不是大禹之苗裔安能屈折興起而王哉買
輕舟乘安流湘湖尾鑑湖頭千浦百瀨勞幽求掛書漁竿棲白鷗胡笳無聲羌笛收不談興衰空悠悠同雷
山白土嶺禹王破舟越王井此中無復神奇書青舲無風白晝整不須更向湖州去一日取醉千日醒

題畫龍贈盧司徒

君不見文明之世龍在田祥雲組織平如川飛塵不動碧空懸倏然宛轉窺宏淵秦家有龍見二噀漢家有
龍見成紀當時野戰皆園黃文明之世圖如此邇來紫氣光相調習習融風生不周蒼茫海色淡千頃歷錄
皇輿騫九旆厥有靈公稱名佐萬里甘霖來咳唾波濤萬掌鯨吞聲桑田已化龍能臥自昔華駟曷足倫六
淵倒挽登天門須臾一手揮霹靂末鱗猶可支崑崙已掃蒙朧開清霽攢拜俯辭上帝領間明月照寒秋
馮夷簫鼓趨江濤君不見仙都東頭百尺潭朝朝鬱起烟如煎甲光照夜天爲曙錯落琉花手可探今我圖
歌歌德普五色相從誰不曙墨池欲起百丈身珠簾便捲三山雨三山雨百丈身恍惚龍來如有神世人好
龍不好真真龍蜿蜒參大人龍今願我借顏色願借龍劍驅蛇虺世間未必無真龍倘使黃鱗翠龍翼

龍行

神龍偃蹇蟠重淵乃不在田不在天紫拂鬣髯皆縷玉火齊鱗甲如如連錢須臾鼓翅三山捲曷不在田不

在天上白榆枯河漢蟄蟲血戰皆黃園阿香無靈上帝怒不如偃蹇蟠重淵君不見巨鼉戴首都郡仙欲
舒一脚神爲鞭又不見龍伯燒香灼予骨罰來百尺空孱隄鳥王有喙詎橫海豫且之網能彌川龍今爲舞
余爲歌遲疑回首龍無然鯉魚未化樓六月波光共擊橫三千嗚呼爾龍何必在田復在天

醉中放歌似仲純永基子甫

墨蹟崇禎二年五月醉中
迅筆後劉魚公至舉買之

月明碧空隱少微文章嶺傍銷光輝仲尼既死游夏沒紛華毒腊刊道肥荀卿案頭出督責董生帳下籠是
非吾門豈無好弟子據木覆水當從誰濟南李生蚤結社茂榛兒子跪床下解劍遂爲不解仇宋閔齊昏坐
笑罵劉生亦愛魏秀才高引何孝開虜埃華采不復成習雉萬言一旦分鹽灰窮達限人既如此春蘭秋蕙
孰爲理潭潭涉夥不復云何况當時從父子日南鳳鳥冠金冠銜魚衆鳥填溟池鳩喙鳶肩各婉約魏脚鬼
眼誰雄雌自是吾才不服衆不關騏驎難爲用仲綵拔虎逐巖間閱冉輟書來牖上鳥圖不至亦已矣化胡
無術枉藏史借來人衆何足疑五千文繁尹何喜北山王子隱土窟三丈函問各安穴向栩竈頭三尺版不
知磔狗誰爲血吾門諸生成聖賢杜家兩郎稱峨然不獨添樹巖崖裏亦能畫帝當象先乃翁杜老亦蕭散
雖貧不貧肆摧燦蟬頭吸露來當餐青石膏精各加飯杜陵老甫即噉名亦無嘉名豐其生荒妻穉兒覓釣
渚那有炎海當涼城君生漳城故麗地車轍不出開元寺有時曝背南榮間偃佺安期皆下吏草鞋門限皆
鐵爲安知門前人食錐醒中索詩千不爲醉後疾書如風飈世人相皮皮無肥安知仲純永基皮如嘶風之
枯雕公自跋天下有兩仲醇陳仲醇已登薦謝婉未有能
舉杜兄若書此俟吾家孝翼至必有舉大白呼我名

中緩聲歌

日月之傍居者難日傍已炎月已寒寒水吐火吾不敢安能斫桂燒丹山麒麟足長鬼足短鬼走已急鳥走

緩風力夢人安所歸廣成老苦風力患崆峒一丘高幾何南溟水淺膠漁篋屠狗牧羊既敗與首陽薇蕨橫
嵯峨嗚呼生兒隻手不能迴天地便當對人斷臂雪中取舍利臨河發歎胡爲哉豈有獨絃長過市圖鳥眼
胸亦寥廓不爲抱橋結遲速蓬瀛變翻鱗羽來蒼黃猶未改梧竹馬箠朝楚暮稱王歌啼獵飲誰當狂膠目
薰衣各相信豈必舉袂明東方學道無成仍落拓鷗鳥玩人肆諧謔吾徒出處如天鷄欲啼不啼皆廣樂明
時七聖慎車塵未聞灼艾薰賢人猥賤騎龜不騎馬那復知人在馬下但云播融能爲山不復知山何處安
終南自遵海自舞鵬鳥吹笙鯨擊鼓殺君馱馱贈君飯男兒何事不能斷大行不肯避樵蘇大行已頑神已
愚授君鱸頭爛白石不補青天補白日雙虹蜿蜒輕如煙誤人無著珊瑚鞭約君騎魚走滄海莫持虹首橫
上天

蜚遞篇

蜚遞先生千古人盛時不肯耀苞鱗其志似欲渺天下圭組安敢纓其身中年著書二百萬一萬明璫爲一
卷此道已奪天所慳豈復荃宰得貴賤出門往往思焚車樂葛不忍橫蘆盧岱華弟兄苦相勸勉爲猿鶴謀
趨趨昌啓之文始迴軫獨決冥鴻謝高隼不三四載行者傷始歎先生悟遐引即今天子摻幽賢爲君龍尾
張華筵薦書兩吏舉始上其如版築倦高眠斗魁去天天半尺宰相非爲不相識寸筳不遺賣菜傳以足扣
舷如木石去年開山初種松今年開梅遠百重去年繫泉初得洞今年洞尻連高峯眞文不爲諛墓起百錢
分給六丁使捫蘿臨寫响嶮碑殺青悔貴洛陽紙古文諒如先生稀不園不素輕時師豈有雄名遍四海而
能歛足局巖屨當時平交十百輩蘭膏強半失負戴龍鮪鳴臚分魚羹祇有菰蓴得自在天明眼開能幾何
銀潢白晝生橫波先生傲然意甚適不知石鼓殊銅駝常言麟鸞下阿閣何異鷄豕就圈牧山中之秀開朱

英忽欲下山賣舊屋郡吏時逢林薄間且勿賣屋依山婚嫁遲多藍鬢小高人何必皆商顏從容與君畫
兩壁百三十人相對膝中間尙容一兩人剖肝取髓爲君食稽生太僕孫太孤子明太板中山愚宏景太仙
說太釋戴公可有聲伎無尋常卜翁張有道戲作成頭發一笑遜者不肥肥不飛古今罕有通其妙昨日清
談清且諧此門一杜安可開敦煌長者無餘財尙爲郎官何爲哉先生於我稱牙期交三十年今始知不敢
更說文與詩世人噉官如噉蔗留滯周南得漫罵我應獨坐張公下

倪晉源年伯八表賀以古風

以下從別本大
蘇函書補遺

閩河桂子逸枝纏何知明鏡當天懸園夷真人探宛委秦觀帝子思飛鸞不如我翁沸丹粒羞與香社爭開
蓮滿堂玉筍恣蘭蕙編籬銀管成珠簾自有新詩來解鼎况逢榮樹舊曝行路合知驄馬貴抱關安識青
牛園坐使瘡痍出九地豈有故舊呼二天兩岸不知秋水漲花溪猶作秦人傳

觀徐霞客紀遊急就草

崇禎庚午二月霞客攜小舟追余至丹陽感念昔日萬里造膝今復依然得陳夙諾爲之道故不覺
盈篇

天下駿馬騎不得風鬣雪尾走白日天下崎人癖愛山負鐫瀉汗賁白石江陰徐君杖履雄自表五嶽之霞
客鷹肩鶴體雙瞳青汗漫相期屢不失事親至孝猶遠遊欲乞珉珩解夜織萬里看余墓下棲擔囊脫屣驚
鳥啼入門吹燈但歎息五年服闋猶麻糍貴人驛騎不肯受掉頭畢願還扶藜自言蚤歲適鴈蕩緹藤級梗
還下上天台石梁平如兜青霞括蒼白於掌中年復走西鍾山焦飯十日支霜盤道逢採藥授雲餐帝子欲
爲歌路難匡廬老僧亦下拜鷄足道人分沆瀣磨頭豆覈石泉茶夜中日出嘯滄海聽君言下何蕭然引人

拔嶺捫青天所探幽奇既如此豈有人嶽當君憐東魯仲尼去千歲西羌大禹死何在書生抱鄒空吟晤即
化喬松安足賴去年先輩繆西谿起草授楊天下疑精神已上蕩烏兔未有人識其端倪何況操蛇窟穴底
千山爲貌隱千水乃欲搜剔窮真靈不畏巉巖不避死世間兩物惟鼎劍燒海剗山與涼燄少年學道須及
時簪紱累人孤書詩當時諸公歎鶴唳悔不從君煨蹲鴟即今關門散百一醫巫吹角愁銅狄蒼崖黃窪不
可尋邊臣灑血迷故迹君猶跋涉從東來兩頭不突生飛灰城郭比人更柔脆田春史義安在哉男兒不仙
必良將驅龍淩波破蕩漾挽河洗甲天下清安能對鏡坐相向中身潦倒爲時人牽船引纜傷路塵彎弓聞
虎行遠巡寂寂寞過冬春何不還家酬所親聽君霏語當探真跂足北窗箕頰濱而必棲棲攫此身

又示呂漢憲

敬靜兩字已七分尙有三分在何所讀書不破聖賢關不知聖賢作何語周公仰思坐待旦仲尼發憤忘寒
暑此中豈有硬慮者如彼書生尋端緒即如四情未發時亦無氣象可標舉當知篤信好古中確有窮盡至
命處如此竟有著實功不墜頑空與虛所若於告處參三分用舍春風吾與女

偶筆似爾房兄丈並示諸同人

從自書
卷增

東郭先生久寂寞牽蘿葺戶塞漏屋圍牆一半青珊瑚破瓦穿籬墜脩竹當時弟子坐談經白晝肉翅生雲
青鳳鳳山頭數飛舞荔風橘雨開醅醒倏忽於今付滄海明珠撒飯不復施元冠數毀簪冠在廣成已老無
性峒藐姑山爲窮桑三秀六英不可食髻燕不可巢蒿梁行人笑指龐公宅將軍樹前罽襪縱無卻館樓
千間可少盧門敵圓席先生強顏無復慙絳字朱闥吾不堪少年祇想樺皮屋壁葦安用纏華簪提筐拾棧
採朱艸金谷蘭亭那得保平泉百載更三家洛陽名園又何道去年擬買屈平潭今年欲結遠公菴頻年碌

鹿無一可白髮垂耳君鬢鬢諸君相期各千歲五百中身謹進退一半納足坐甯中一半抽鋒出天外腰間
差池三百年始得貼坐稱團圓柔絲納賜榕樹前猶恐辦力難安眠祇今四海輾囊棟安用來車突陋巷蝸
封蚊廈爭昂低岡梧尚有鶯鷓棲衰色宛宛垂桃谿諸言負才各千尺勿復拔檀理雞栖東華嶺上自留松
孔明廟前自麗栢詩書今已出破壁勿使精恠鏘金石東郭依然生虛白

九言古詩

書示汪爾陶

我欲與君汎濫觀百川我欲與君升降繩萬年我欲與君鎮坐明窓前我欲與君納足元霧巔我欲與君開
眼消晴煙我欲與君發辦懸飛泉我欲與君結舌忘話言羲農上頭時書皆不傳鴻濛以往日月猶高懸秦
人銷除文章猶安然鸞鸞毛羽不在雕畫邊鷗青鵠素各自飛上天炎涼安能侵我北斗權且莫笑人尙白
與尙元我欲與君極深而研幾道德門中不與分後先

九言六句

林間放鶴看野老畫圖花外小車記先生棲逸於今從樵子拔劍梳翎有時向浮家翻身擲筆安能偏處乞
灑石桃栽更要去菴溪買田種橘

